

中羽集

[金] 元好問編



中華書局







金元總集之一

中 州 集
下

〔金〕元好問編



中 華 書 局



中州已集第六

馮內翰壁一十五首

王內翰若虛三十三首

麻徵君九疇三十一首

劉御史從益三十三首

宋內翰九嘉二十一首

雷御史淵三十首

李右司獻能二十首

王右司渥二十一首

冀都事禹錫二首

馮內翰壁

壁字叔獻。別字天粹。承安二年進士。歷州縣。召入翰林。再爲曹郎。宣宗朝。屢以使指鞠大獄。權貴如歸德知府。宿州總帥。聲勝焰焰。朝廷知其跋扈而不能摧伏者。叔獻以法臨之。毛髮不貸也。幼有重名。就所長論之。館閣臺諫。與賓客言。乃其選也。徒以小心奉法。不畏強禦。故屢以城旦書屈之。識者有用違其長之嘆。興定末。以同知集慶軍節度使事致仕。居崧山龍潭者十餘年。諸生從之游。與四方間遺者不絕。賦詩飲酒。放浪山水間。人望以爲神仙焉。山中多蘭。每中春作華。山僧野客。人持數本詣公。以香韻高絕爲勝。少劣則有罰。謂之鬪蘭。所釀松醪。東坡所謂歎幽姿之獨高者。惟叔獻能盡之。客有以京國名酒來與之校者。味殊不能近。正如深山草衣木食人語。覺傭兒販夫塵土氣爲不可嚮也。是後松醪鬪蘭。遂爲山中故事。叔獻少日在太學。賦聲籍甚。

866182



3 0526 4169 7

其學長於春秋。詩筆清峻。似其爲人。字畫楚楚有魏晉間風氣。雅爲闕閑公所激賞。制誥典麗。當代少見其比。尺牘又其專門之學。風流蘊藉。不減前世宋景文。左丞董公紹祖。奉使江左。得其詩餞行。喜見顏間。詩四韻。每誦一句。輒爲一舉觴。李右司之純。談笑此世。爲不足玩。見叔獻則必爲之懷然。王延州從之。公於鑒裁。爲海內稱首。敬其名德。至不敢以同年生數之。北渡還鄉里。年七十九終於家。

墓碑云。所貴於君子者三。曰氣。曰量。曰品。有所充之謂氣。有所受之謂量。氣與量備而才行不與存焉。本乎才行氣量。而絕出乎才行氣量之上。之謂品。品之所在。不風岸而峻。不表襮而著。不名位而重。不書文而尊。是故爲天地之美器。造物者新固之。不輒以予人。閱有千萬人之衆。歷數千百年之久。乃一二見之。向乎其時。非無孤獨偉傑之士。從容於禮文之域。角逐乎功名之地。唯其俗不可以爲雅。劣不可以爲勝。故自視缺然。陳太丘事業無聞。而名重天下。房次律坐鎮雅俗。而舉世以王佐許之。施之當時。未必適用。然千載而下。有爲之歛衽者。非品何以得之。元光正大以來。天下大夫士論公平生者。蓋如此。

子渭。字清甫。以門資叙。仕爲密院機察。清慎而文。天下有馮孝子之目。今居鎮陽。

同裕之再過會善。有懷希顏

寺元魏離宮。十日來凡兩。前與髯卿偕。齋奠少林往。其時已薄暮。諸勝不暇訪。今同魏諸孫。再到風煙上。寺僧導升殿。雄深肅瞻仰。柱礎門限砧。追琢成大壯。不見磨琢痕。瑩滑明澠朗。摩挲三嘆息。後世無此匠。晚登西南亭。碧玉對千丈。如王官天柱。如太華仙掌。留宿贊公房。秀色夢餘想。夜靜耿不眠。泉溜琴筑響。惜髯今不來。聯詩共清賞。

和希顏

虎守天門未易通。庾塵無扇障西風。主人何負盜憎主。公論不明私害公。老伏固非千里驥。冥飛似是五噫鴻。紛紛往事渠知幾。都付崧巔一笑中。

送國醫儀師顏企賢得請歸關中次朝賢韻

心平窮富恐欺天。面有陰功蓋有年。歸去青山仁者樂。祕來丹訣老而傳。尙醫冗食渠百輩。公論共推君十全。技道精微仍遠引。就非輕舉亦幾仙。

河山形勝圖

書劍丁年記昔游。中條之麓過蒲州。地形西控三秦遠。河勢南吞二華秋。晉魏兵爭一春夢。漢唐壇祀幾荒丘。披圖弔古令人慨。不必重登鶴雀樓。

龍帥覓蘭作詩以寄

雲插高牙畫戟森。春移寶檻燕堂深。水南紅藥初退舍。嵩麓紫蘭今嗣音。繭足赧肩坐香累。高梁華棟豈渠心。使君有問花應語。玉樹誠佳非故林。

明皇擊梧桐圖

三郎耳譜趁花奴。風調才情信有餘。天寶錯來非一拍。霓裳中節亦區區。

送人出使

陽春有脚蘇癢癢。水鏡無心照潔汙。九道澄清天意切。人才一一似君無。

習池醉歸圖

襄漢方屯十萬兵。習池日往不曾醒。紛紛悞晉皆渠輩。何獨王家一寧馨。

東坡海南烹茶圖

講筵分賜密雲龍。春夢分明覺亦空。地惡九鑽黎洞火。天游兩腋玉川風。

陰晦中忽見華山

吏部能開衡嶽雲。坡仙曾借海宮春。蓮峯清曉忽自獻。二公何人予何人。

草堂春暮橫披

遷客倚樓家萬里。五陵飛鞚酒千金。草堂澹與春山對。幽鳥一聲春已深。

元光間。予在上龍潭。每春秋二仲月。往往與元雷游歷崧少諸藍。禪師泮公。方事參訪。每相遇。輒揮毫賦詩。以道閒適之樂。今猶夢寐見之。兒子涓。近以公故抵任城。禪師附客詩以叙疇昔。未幾。駐錫東庵。因造謁間。出示裕之數詩。醉筆縱橫。亦略道崧遊舊事。感嘆之餘。漫賦長句二首。

性理諸方已徧參。歸來一錫駐東庵。山中蓮社舊招隱。旅舍阿戎新對談。詩筆如君僧有幾。文章

媿我老無堪。綾書大字拈香疏。須趁微之酒半酣。

少林脩竹欲天參。竹外幽閑草結庵。願我雖存唯白髮。與君曾此共玄談。干戈橫絕境猶夢。草樹荒殘人豈堪。臘甕松醪髯莫預。商歌悲壯不能酣。

雨後看並玉所控諸峯

並玉如高人。壁立九千仞。一日不見之。令人生鄙吝。春深木葉敷。秀色益濡潤。結茅寄僧藍。晴碧時得趁。老宿詔孫峯。隅侍到巒亂。連延青一色。枚數須諦認。溟濛空翠間。我亦疑未信。朝來雲氣昏。埋沒瑜匿瑾。如蒼梧政愁。湘妃鬱思舜。重陰俄解駁。霽澗夕暉襯。娟娟忽層出。歷歷分遠近。雲峯互吞吐。千狀纔一瞬。出奇如孫吳。相降如廉蔭。如衆星拱辰。如侯伯入覲。接武如朋簪。承迎如价儔。負固如吳楚。爭長如齊晉。怪詭如夷蠻。駢羅貢琛臚。窘蹙如擒獲。係纍將就繫。如應龍神靈。蟄臥時奮迅。如天駟超軼。垌牧稅羈勒。如雄對改容。失筇駭疾震。如猛士無譁。攢槩俟嚴陣。獨兩峯巍然。魁傑儼崇峻。光輔岳柱天。鬱爲中興鎮。降生申與甫。周室債復振。詩傳配崧高。百世磨不磷。

同希顏怪松

崧高地氣靈。花木競妍秀。玉峯西南趾。有松獨怪陋。偃蹇如蟠螭。奮迅如攫獸。葉勁須髯張。皮

古鱗甲皺。菌蠢藤癭怒。支離節節瘦。月上虬影搖。風度雨聲驟。子落慰枯禪。枝樛礙飛鼪。盤根萬乘器。平蓋千歲壽。樵斤幸免尋。庖匠矧肯構。龍化會有時。天早期汝救。

王內翰若虛

若虛字從之。稟城人。永安二年經義進士。少日師其舅周德卿及劉正甫。得其論議爲多。博學強記。誦古詩至萬餘首。他文稱是。善持論。李屏山杯酒間。談辯鋒起。時人莫能抗。從之能以三數語窒之。使噤不得語。其爲名流所推服類此。釋褐鄜州錄事。歷門山令。入翰林。自應奉轉直學士。居冷局十五年。崔立之變。羣小獻諂。爲立起功德碑。以都堂命召從之。從之外若遜辭。而實欲以死守之。時議稱焉。北渡後。居鄉里。癸卯三月東游。與劉文季輩登泰山。憩於黃峴峯之萃美亭。談笑而化。時年七十。從之天資樂易。負海內重名。而不立崖岸。雖小書生登其門。亦折行輩交之。滑稽多智。而以雅重自持。謀事詳審。出人意表。人謂從之於中外繁劇。無不堪任。直以投閑置散。故百不一試耳。自從之沒。經學史學文章人物。公論遂絕。不知承平百年之後。當復有斯人也不。子恕。字寬夫。

摠憤

非存驕饕心。非徼正直譽。浩然方寸間。自有太高處。平生少諧合。舉足逢怨怒。禮義初不愆。謗

勛亦奚願。孔子自知明。桓魋非所懼。孟軻本不逢。豈爲戚氏沮。天命有窮達。人情私好惡。以此常泰然。不作身外慮。

贈王士衡

王生非狂者。乃以善哭稱。每至欲悲時。不問醉與醒。音詞初惻愴。涕泗隨縱橫。問之無所言。坐客笑且驚。王生不暇卹。若出諸其誠。嗟我與生友。此意猶未明。絲染動墨悲。麟亡傷孔情。韓哀峻嶺陟。阮感窮途行。涕流賈太傅。音抗唐衛生。古來哭者多。其哭非無名。生其偶然歟。何苦摧神形。如其果有爲。爲爾同發聲。

貧士嘆

飢無糜。瓶無粟。北風蕭蕭吹破屋。入門四顧何悲涼。稚子低眉老妻哭。世無魯子敬。郭元振之真丈夫。故應餓死填坑谷。蒼天生我亦何意。蓋世虛名食不足。爭如只使冗且愚。大腹便便飽梁肉。

感秋

西風撼庭柯。疎葉鳴策策。天地一蕭條。羈懷亦岑寂。青春悅如昨。轉盼年半百。自從長大來。轉覺日月迫。功名非所慕。老大不足恤。怛然感時心。自亦不能釋。清晨梳短髮。已見數莖白。刀鐻雖可施。殆似兒子劇。此身委蛻耳。毀棄無足惜。況於毛髮間。而乃強修飾。青青如陸展。星星行

復出。畢竟白滿頭。復將何所摘。

生日自祝

空囊無一錢。羸軀兼百疾。況味何蕭條。生意渾欲失。清晨聞喧呼。親舊作生日。我初未免俗。隨分略修飾。舉觴聊自祝。醉語盡情實。神仙恐無從。富貴安可必。脩短卒同歸。何足喜與戚。一祈粗康強。二願早閑適。衣食無大望。但要了晨夕。萬事不我撓。一心常自得。優游終吾身。志願從此畢。

失子

妍妍掌中兒。捨我一何遽。其來誰使之。而復奄然去。平生三舉子。隨滅如朝露。願我能無悲。其如有天數。自從學道來。衆苦頗易度。有後固所期。誠無亦何懼。人生得清安。政以累輕故。婚娶眼前勞。託遺身後慮。百年曾幾何。爲此雛稚悞。願語長號妻。此理亦應諭。

憶之純三首

幼歲求真契。中年得偉人。傾懷當一面。投分許終身。燈火談玄夜。鶯花逐勝春。何時重一笑。胸次欲生塵。

面目三年隔。音書萬里遙。宦途俱蹭蹬。日事各蕭條。志大謀常拙。身孤道易消。本無當世用。隱處會相招。

雋氣輕天下。高情到古人。銜杯曼卿放。下筆老坡神。時論誰優劣。人材自屈伸。窮愁須理遣。不必淚沾巾。

復寄二首

志大言高與世違。拂衣真作竹林歸。黃塵道口風波惡。未必先生自處非。
自笑趨塵亦強顏。食謀未免敢言閑。紫芝果可充飢腹。從子玉屏巖石間。

病中二首

學道今何得。謀生久不成。藍衫幾棄物。絳帳亦虛名。事拙應天意。交疎即世情。煩憂時自解。感觸又還生。

鬱鬱窮愁意。營營久病身。詩情渾欲減。藥物但相親。求得驅窮鬼。終須問大鈞。三時勞慰拊。甚愧故人真。

感懷

枉却全家仰此身。書生那是治生人。百憂耿耿填胸臆。強作歡顏慰老親。

自笑

酒得數杯還已足。詩過兩韻不能神。何須豪逸攀時傑。我自世間隨分人。

別家

到了身安是本圖。何須身外覓浮虛。誰能置我無飢地。却把微官乞與渠。

慵夫自號

身世飄然一瞬間。更將辛苦送朱顏。時人莫笑慵夫拙。差比時人得少閑。

西城賞蓮呈晦之

晦之自號放公。

舊賞回頭已隔年。高花又見出新妍。偶成濁酒狂歌會。恰及斜風細雨天。樂事適來偏有興。閑身常得分無緣。作詩莫怪多誇語。差比放公先着鞭。

題淵明歸去來圖

五首。此下皆中年所作。

靖節迷途尙爾賒。苦將覺悟向人誇。此心若識真歸處。豈必田園始是家。孤雲出岫暮鴻飛。去住悠然兩不疑。我自欲歸歸便了。何須更說世相遺。拋却微官百自由。應無一事掛心頭。銷憂更藉琴書力。借問先生有底憂。得時草木竟欣榮。頗爲行休惜此生。乘化樂天知浪語。看君於世未忘情。名利醉心濃似酒。貪夫袞袞死紅塵。折腰不樂翻然去。此老猶爲千載人。

翰林閣閣公命題城南訪道圖戲作二詩且爲解之云

得道由來不必勞。癡兒舍父謾逋逃。閑閑老子還多事。時向招提打一遭。
竹木蕭森蔭綠苔。幽襟自愛北軒開。主人無說吾何問。乘興而來興盡迴。

答鄭下辨禪師見戲。代防禦高侯

酒肆淫房總道場。偶然游戲亦何妨。阿師自墮泥牛趣。更笑春風柳絮狂。

還家五首

日日他鄉恨不歸。歸來老淚更沾衣。傷心何啻遼東鶴。不但人非物亦非。
荒陂依約認田園。松菊存亡不足論。我自無心更懷土。不妨猶有未招魂。
山杏溪桃化棘榛。舞臺歌榭墮灰塵。春來底事堪行處。門外流鶯枉喚人。
回思夢裏繁華事。幸及當年樂此身。閑立斜陽看兒戲。憐渠虛作太平人。
艱危嘗盡髮成絲。轉覺謹譁不可期。幾度哀歌仰天問。何如還我未生時。

山谷於詩。每與東坡相抗。門人親黨。遂有言文首東坡。論詩右山谷之語。今之學者。亦多以爲然。漫賦四詩。爲商略之云。

絕足由來不可追。汗流餘子費奔馳。誰言直待南遷後。始是江西不幸時。
信手拈來世已驚。三江袞袞筆頭傾。莫將險語誇勍敵。公自無心與物爭。

戲論誰知出至公。蟾蜍信美恐生風。奪胎換骨何多樣。都在先生一笑中。
文章自得方爲貴。衣鉢相傳豈是真。已覺祖師低一着。紛紛嗣法更何人。

王內翰子端詩。近來陡覺無佳思。縱有詩成似樂天。其小樂天甚矣。漫賦三詩。爲白傳
解嘲

功夫費盡謾窮年。病入膏肓豈易鐫。寄語雪溪王處士。恐君猶是管窺天。
東塗西抹鬪新妍。時世梳粧亦可憐。人物世衰如鼠尾。後生未可議前賢。
妙理宜人入肺肝。麻姑搔背豈勝鞭。世間筆墨成何事。此老胸中自一天。

麻徵君九疇

九疇字知幾。莫州人。三歲識字。七歲能草書。作大字有及數尺者。故所至有神童之目。章廟召
見。問汝入宮殿中。亦懼怯否。對曰。君臣父子也。子寧懼父耶。上大奇之。弱冠住太學。有聲場屋
間。南渡後。讀書北陽山中。其詩云。讀書空山裏。落月低巖幽。山鬼語夜半。怪我非巢由。又云。壯士半凋落。鐵花繡吳鉤。始以古學自力。博通五經。於易
春秋爲尤長。少時有惡疾。就道士學服氣。數年疾遂平。又從宛丘張子和學醫。子和以爲能得其
不傳之妙。大率知幾於學也專。故所得者深。飢寒勞苦。人所不能堪者。處之怡然。不以累其業也。
嘗爲鄆城張伯玉賦透光鏡。欽叔傳之京師。趙禮部大加賞異。貼壁間。坐臥讀之。興定末。府試

經義第一。詞賦第二。省試亦然。簾試以脫悞下第。知幾先有才名。又連中甲選。天下想望風采。雖牛童馬走。亦能道麻九疇姓名。正大三年。右相侯蕭公趙禮部連章薦知幾可試館職。乃賜盧亞榜第二甲第一人及第。授太祝。權太常博士。應奉翰林文字。知幾資野逸高蹇自便。與人交。一語不相入。則逕去不返顧。自度終不能與世合。未幾謝病去。作詩工於賦物。如夏英公篆韻。其詩云。態了不同。哭鬼號神。白蕊始。箇如廟裏地上畫。繁如神農日中市。圓如有城乙鳥卵。方如姜嫄巨人履。傾如怒觸不周山。邇如逆上蠶叢水。積如女媧石未煉。碎如昆吾瓦經毀。蚩尤旌張尾後曲。黃帝鼎成足下時。五丈車斷禹戈。九日橫天落羿矢。流繁不去龍垂髯。銜書忽來。感挽臂。方相四日闕門闕。龜牛一脛蹄隨。貌似心猶未必然。賴君注釋車南指。及手植檜印章等詩可見也。字畫正書八分皆有功。詩最其所長。少時猶失持擇。近詩精深峭刻。似其爲人。他文不及也。明昌以來。以神童稱者五人。太原常添壽。四歲作詩云。我有一卷經。不用筆寫成。展開無一字。晝夜放光明。合河劉滋文榮。六歲有詩云。鶯花新物態。日月老天公。劉微伯祥七歲被旨賦鳳凰來儀。新恩張漢臣世傑。五六歲亦召入賦元妃素羅扇畫梅云。前村消不得。移向月中栽。其後常隱居不出。餘三人者皆無可稱道。獨知幾能自樹立。一日名重天下。耆舊如閑閑公。且以徵君目之而不名也。壬辰歲遇亂卒。年五十。平山常仲明之子德。葬之小商橋傍近趙莊。

賦伯玉透光鏡

太陰淪魄元不耀。太陽分光成二曜。嗚呼怪銅盜此幻。透影在壁與背肖。奩開燿燿光走庭。劃如

剗犀乍脫鞞。泓澄秋落百丈潭。疑有龍向天門跳。秦娃漢婉化鴛士。龍雨恩雲埋鳳詔。當年椒塗鑑桃李。身後泉臺映蓬鬢。枕簟無情草木香。笙歌不暖鼻狐嘯。燭燄一醜不再妍。不知持此將安照。萬斛珠璣委侑人。喚得偷兒成鬼剽。借問金椎一控時。何如海上青蠅弔。壽如金石佳且好。此銘此篆兩奇峭。今誰子後曩誰先。贏得紐樞經蟻竅。千古繁華一夢醒。恍然入手稱神妙。丹砂□紫翠羽青。萬金難買人年少。君侯新自洛陽來。玉臺人物今溫嶠。相看大笑古人癡。收鏡入奩還自笑。

跋范寬秦川圖

山水人傳范家筆。畫史推尊爲第一。竭來因看秦川圖。天下丹青能事畢。大山巖巖如國君。小山鬱鬱如陪臣。大石盤盤社與稷。小石落落士與民。一山一形似爭長。一石一態如布軍。想君胸中有全秦。見鑠削鑠鑠乃眞。掌上長安近於日。千樹萬樹生青春。憶昔岐山鳳皇語。葱葱柞械霑新雨。昆夷束手密須降。不見功勳見歌舞。黃金鑄牛西入粵。五丁雲棧通中國。驪山宮闕九天高。六處屏王走銜壁。不信詩書信法家。關東半被魚書惑。盡卷圖籍亦大好。五十年兒都一掃。章邯董翳舉如毛。沐猴冠委金陵道。北原兵自天而下。漢室傾頽如解瓦。祁山六出縱無功。渭水猶堪飲君馬。螭蟠老將骨未朽。草付那能濟陽九。技癢投鞭抵歲星。歸來鹿死何人手。神武空矜賀六渾。

投機常落同人後。竟令馮翊軟沙邊。東風一夜吹新柳。侵尋卓角相料理。拋擲龍津浮汴水。鵲頭過處已非隋。不覺晉陽人姓李。華清高宴受宮梧。舞馬如何護兩都。縱得青驄還蜀道。肉得沙場白骨無。興亡自取不足吁。可憐神州爲盜區。貪徵往古山川事。忘却題詩賞畫圖。

松筦同希顏欽叔裕之賦

犧尊青黃災木命。羈絆剪剔傷馬性。折松爲筦得之天。此君幸免殘殘橫。初綠形似有代無。不料奇功乃差勝。人間斤斧不須勞。坐中活火鳴笙簫。千秋墊骨養霜雪。一日奮鬣翻雲濤。巖烟擊拂殷雷起。顛風蹴踏銀山高。莫嫌勺水懦無力。如捲三江都一吸。借汝歲寒姿。扶我衰朽質。掃除幻夢不到眼。洗刷埃霾下胸臆。捫霞直與羨門期。一笑桑田海波白。

竹癭冠爲李道人賦

東方有物字豐隆。以鳴爲職驅羣聾。萬頭濺濺囚凍窟。欲出不出愁天公。迴寒作煖出一噓。黑帝不敢藏昆蟲。所以獨爲六子長。揮斥元氣周神功。草蟲鼓震頃萬里。六甲雲風隨喚起。四陰用事合收聲。猶奮狂陽鳴不已。號令非時遭物玩。草木不凋花再蕾。惱得司秋訴帝閭。漏泄機緘法當死。天公大怪下桎梏。推落車中墮巖谷。非程非馬亦非人。化作蒼莖一枝竹。勁氣剛風難遽銷。凌閭風雨猶蕭蕭。聳身直上三千尺。天公又怪干雲霄。鬼壓神縛不聽出。只見白雲鎖三口。雲散唯

餘青屈盤。頤隱於臍。變仙質。道人真是萬物盜。斫取爲冠就天巧。秋霜爭敢上頭顙。常與春風同醉倒。此冠固奇惜未大。有冠獨在方之外。日月爲藤織四時。烟霞爲樺綿千載。天潢絕漢梁虛碧。北斗旋衡簪沆瀣。不隨脂粉侶狻猊。不逐風霜陪獬豸。一任旋乾復轉坤。頭上峨峨終古在。欲作檀那施此冠。不識先生若爲戴。

彈琴懷山中

門前雪垂垂。室中理朱絲。手按十三徽。心飛天一涯。故人渺何許。萬里驚鴻飛。試憑朱絲語。一聲聲亦悲。一彈雪欲落。再彈雪正作。只在此山中。故人今憂樂。我欲彈文王。岐山雲渺茫。我欲鼓曾子。無田可耘耔。道遠望不及。千山復萬水。思君復思君。正恐須髯皓。后變若不來。奈此宮商何。春風早晚起。百鳥喧庭柯。時攜一尊酒。爲君奏雲和。

夏日

亭柯碧合龍蛇影。睡起輓轡鳴曉井。一簾曉雨捲不晴。槐花滿地黃金冷。屈指西風又到門。相思團扇欲生塵。何時萬戶垂楊裏。高揖金鞭逢故人。

牛嘆

誰憐宿料一生無。身後仍遭金十奴。帷蓋却教蒙狗馬。不知何事負農夫。

清明

村村榆火碧烟新。拜掃歸來第四辰。城裏看家多白髮。遊春總是少年人。

暮春山家二首

山煙向晚白濛濛。人過梨花樹底風。一犬不鳴村徑黑。野燈孤起遠林中。
語闌壯氣欲消磨。奈此青燈永夜何。壁上取琴彈一曲。不知天外落銀河。

手植檜印章

梁折山摧入小成。日華留得寸暉明。不盈一握空蟲篆。未喪斯文粗姓名。草木西周朝有暮。圖書東觀死猶生。二千年後司封紐。未信栽時出此情。

贈裕之

向來三度見君詩。常望西山有所思。誰料并州天絕處。相逢梁苑雪消時。賢人樂古聲猶在。聲叟文高世豈知。只恐神嵩不留客。秦川如畫渭如絲。

秋懷

江山如畫。衣冠盡。蒲柳無情。宮殿秋。亦用此韻者也。

昨夜新涼御褐裘。一番節物弄清愁。月懸雙杵若爲夜。人在一隅偏覺秋。敗葉只能驚畫扇。啼蜚終不到朱樓。還鄉夢斷寒衾曉。依舊雲山是蔡州。

和伯玉食蒿醬韻

九尺東方生。不如一侏儒。飲啄各有程。厚薄與生俱。文蒲及屈茝。何乃淡以枯。正如謝三旌。甘心作羊屠。伊蒿本新材。豈足充庖廚。薄雪草堂徑。新霜古城隅。河南地差煖。冬有不死蕪。青來澗邊宮。綠入几上盂。微香能侶菊。小苦賢於茶。酷烈變醃醢。薰醢破脂酥。書生喜倒說。食亦變精粗。借問冰茶者。何如羔酒乎。況爾蓼彼蕭。蓬菲固其徒。偶然躡一等。遽欲忘樵夫。邇來歲頗饑。太半殣在途。攘肉或至犬。首丘不如狐。命賤祇求死。計窮交議逋。尙有執袴兒。朝夕食於株。寧知掃野稗。一飽不易圖。遂令人輕生。不畏鑽與鈇。如君有蒿醬。猶是千金軀。

復次韻

五臟太多可。張頤託臞儒。自非何曾家。安得陸海俱。莊周幸有粟。不至魚肆枯。何勞夷門市。下車朱亥屠。春韭與秋菘。歲晚不供廚。蒿腹不蒿目。大方果無隅。爲醬非負口。猶勝范萊蕪。豈無青精飯。駐顏炊一盂。豈無菖蒲歎。辟邪如神荼。又豈無椒花。除瘟等醢酥。蒿於數品中。頗同武官粗。數品雖異饌。置之醬可乎。猶材各有施。豈必皆吾徒。公綽優爲老。劣於滕大夫。大抵食如士。取之非一途。君詩誌其味。食經有董狐。彼哉鼃羹指。斷棺終莫逋。彼哉萍蠶手。竟死珊瑚株。寧如醬以蒿。不出本草圖。蓋後人好奇。一洗腥砧鈇。爲謝饑崇鬼。渠今離我軀。

又翌日又爲履道所戲其意似欲窮吾技再和前章書呈伯玉

葭可爲炙啖。博哉釋草儒。奈何騷人詠。不與蘭茝俱。青青發陳荳。嫩勝稊生枯。面柔似張禹。氣冽如申屠。忽逢易牙口。一日登君廚。君兄昔在日。作事太廉隅。游宦三十年。不治一室蕪。嘗載米之郡。政如置水盂。不義獲八珍。棄之猶堇荼。相對話終日。茗椀無鹽酥。見客惟恐遲。遇飯不擇粗。無食但有名。窮不亦宜乎。我本寒素士。臥雪袁司徒。臭味偶相似。豈是敦薄夫。見君食蒿醬。取嘲於仕途。和君蒿醬詩。緼袍隨衣狐。詩醬兩情苦。此債無由逋。蒿荻無棄材。奈此蒼松株。何當列銅甕。一依饗禮圖。唯聞廣庭樂。不見轅門鈇。此日雖無醬。猶堪養羸軀。

元裕之以山遊見招兼以詩四首爲寄因以山中之意仍其韻

石華政可採。負我孤舟蓬。胡爲紅塵裏。擾擾槐安宮。山間綠蘿月。一照千巖空。洪崖去不返。清游誰與同。空餘松根泉。雜佩流無窮。人心墮泥滓。不如與天通。舉頭視霄漢。浩露洗心胸。日月兩角蝸。天地一粒粟。老盆可徑醉。豈擇瓦與玉。大笑區中人。朱門丐梁肉。清曉登少室。日夕眺王屋。紫煙晞我髮。碧霞貯我腹。溪中有白雲。萬事付濯足。物物愜幽情。不獨蘭與菊。南風入桂樹。高葉碧嶢嶢。舉手戲攀折。上與雲煙擗。黃金間白玉。遍地先晶瑩。笙簫坐間發。鸞鶴空中鳴。浩歌山谷應。起舞衣裳輕。一尊石上酒。如我浩氣盈。目送飛鴻盡。青雲萬里平。

國風久已熄。如火不再然。流爲玉臺詠。鉛粉嬌華年。政須洗妖冶。八駿踏芝田。青苔明月露。碧樹涼風天。塵土一一盡。象緯昭昭懸。寂寥抱玉辨。爭竟搖尾憐。幸有元公子。不爲常語牽。

許方邨即事

聯句體

披熱達許方。山巔青漫漫。野黃麥初割。畦綠蔬纔灌。村籬綠葉深。巷樹春花亂。煙長見新治。風遠聞清鍛。濯衣女在溪。販鐵人棲館。牆危壘破石。路黑沾遺炭。山雲頃刻雨。沙地須臾曠。鐸鳴駕犢耕。罩密防雞散。綠餘殘繭挂。釣罷么系貫。沽酒有客賒。嚮李何人喚。朴慘官始威。牒煩民更頑。歷險小車多。逢人黯衣半。縣遠肉難求。山近寇可遁。何當卜隱居。尋我杖藜伴。

梁山宮圖

梁山宮高高切雲。秦家簫鼓空中聞。宮殿作雲王作龍。何人敢謁瀉池君。珠圍翠繞窮天下。道上行人衣半赭。不覺生靈血液枯。化爲宮上鴛鴦瓦。朝盧生。暮侯生。師事二人學羨門。焉知以政藏其身。神仙亦死何曾神。空能詐取六孺國。不識盧生真間客。種成間隙盧生去。尙令道士作鬼語。祖龍竟墮此機中。以壁見欺猶未悟。魚腥引得扛鼎來。梁山火滅漢旗開。何如後世丹青手。一夫不役千樓臺。梁山之圖却傳世。梁山之宮安在哉。

跋伯玉命簡之臨米元章楚山圖

巴東峽壁如駿霞。天鑿荆門當虎牙。下有奔湍沉碧沙。直衝北顧如投家。雲煙昏曉互明滅。朝看
沃日暮吞月。遠山如指近如拳。過客那知空一瞥。高人廬此恨來晚。不厭孤蓬疊往返。莫言造物
好窮人。許大乾坤富君眼。以心爲鏡照諸山。山如人面紛殊顏。扁舟日日青山上。青山却在滄波
間。人道癡兒固貪取。我怪高人亦如許。已將胸次枉長江。更把豪端扛巨楚。薺列楓林葉浮舸。巧
促魁梧入么麼。丈尋收拾無邊春。千里遊邀坐中我。自此頭吳尾甌越。蠻烟五月髡人髮。江山多
處乃爾毒。始信中原天下甲。楚山可覽不可上。水氣昏昏且多恙。畫山縱不到真山。有楚之峯無
楚瘴。靜明居士見山饒。想在庵中得飽參。戲呼老李臨君畫。已坐君貪我更貪。

秋雨小霽湖陽道中

一雨初晴菊瘁花。朝來啼殺報晴鴉。地鄰異域空懷古。人對殘秋更憶家。十月紅爐是明日。往年
新火醉流霞。忽忽又上湖陽道。何處還堪駐客槎。

秋望

雲氣東南壯。風煙正北長。遠人投屋小。寒草帶城荒。馴鴨便秋潦。飢牛背夕陽。閑情儘堪畫。未
要雨浪浪。

堂谿城南感寓

斷岸崩崖帶草長。茂林高塹晚生涼。田頭經水成駒臥。雲色因風變狗蒼。戰地尙餘唐壘柵。故城曾入楚封疆。牛童趁日貪捫虱。那解興亡事可傷。

俳優

施能賣晉移君貳。旃解譏秦救陞郎。多少諫臣翻獲罪。却教若輩管興亡。

李道人家山圖

見說高齋住太行。溪山襟帶古祠堂。圭桐葉落周家雨。鐵樹根盤晉國霜。烽火不堪耕夜月。畫圖猶可掛殘陽。自憐不及汾川雁。春去秋來過石梁。

李道人嵩陽歸隱圖

城郭維崇。井里維通。冠蓋維錯。執綺維叢。云誰之子。招子歸嵩。舍我箠筑。樂彼潺淙。食彼瓦缶。遣我鼎鍾。云誰之子。繪子歸嵩。離人友鹿。避俗朋松。石嚙我足。泉癭我嘯。吾恐時人。笑子歸嵩。有山有怪。有水有龍。盜出寇沒。嘯兇咻熊。吾恐狂人。誑子歸嵩。子謂我言。決意歸嵩。歸嵩何如。如鴻避弋。如鶴脫籠。與幻俱化。與化俱融。是以歸嵩。南山重重。翠如植葱。北山隆隆。紺如堆銅。仰嵩俛嵩。雨濯雲烘。嵩之爲我。我之爲嵩。我聞子言。衣如張風。心先去鳥。屑雲盪胸。靜言思之。富爲目蒿。貴爲心蓬。飾說于令。詎知任公。歸嵩良是。生龜脫筒。子不歸嵩。送子歸嵩。

陽夏何正卿作疊語四句未成章。予復以疊語寄之。凡四變文。

縹緲蠢蠢何等民。矯矯亢亢內守真。昂昂藏藏獨異俗。落落莫莫不厭貧。歸與歸與且餬口。鳳兮鳳兮德衰久。樂云樂云無絃琴。命乎命乎一杯酒。匪鱸匪鮪故爲藏。避言避世必也狂。至大至剛秣吾馬。爰清爰淨修我牆。用之捨之時所係。晉如摧如寧復計。煖然淒然任春秋。優哉游哉聊卒歲。

紅梅

一種冰魂物已尤。朱唇點注更風流。歲寒未許東風管。澹抹穠粧得自由。

劉御史從益

從益字雲卿。南山翁攜之曾孫。大安元年進士。拜監察御史。坐與當路者辨曲直。得罪去。久之。起爲葉縣令。修學講義。聳善抑惡。有古良吏之風。葉劇邑也。兵興以來。戶減三之一。田不毛者萬七千畝。其歲入七萬石故在也。雲卿請於大農。爲減一萬。民賴之。流亡歸者二千餘家。未幾被召。百姓詣臺乞留不聽。入授應奉翰林文字。踰月。以疾卒。時年四十四。葉人聞之。以端午罷酒爲位而哭。且立石頌德。以致哀思之心焉。雲卿博學強記。於經學有所得。爲文章長於詩。五言古詩又其所長。雷御史說雲卿在太學時。年甚少。嘗有詩云。黃金錯落雲間闕。紅粉高低柳外牆。時輩皆推伏之。其卒以詩得名者。固已見於此矣。

雲卿詩。如荒烟斜日村村晚。衰柳寒蒲岸岸秋。兩鄉留寓風絮。面千里相望月滿襟。予美不妨衣露肘。長卿猶有賦凌雲。春

雪云：千層寶樓閣。一片玉山川。臨終云：壞壁秋燈挑夢破。老梧寒雨滴愁生。此類甚多。不能悉載也。

有蓬門先生集行於世。二子。祁字京叔。郁字文季。俱有名於時。

題蘇李合畫淵明濯足圖

天機本自足。人事或相須。東坡畫三昧。迺與龍眠俱。黃州富丘壑。餘杭渺江湖。已困口嘲弄。更堪手糊塗。其來本游戲。所到非功夫。平生斜川翁。尙友千載餘。可聞不可見。風標定何如。笑倩李居士。爲予巧形模。臨流想有詩。滄浪元非漁。不入聲利場。政恐吾足污。二公有深意。百年留此圖。不着色塵相。澹然如游天地初。主人牢緘滕。丹青有淪此不渝。

過尉氏懷阮籍

朝來國門遊。暮抵蓬池宿。有懷阮步兵。豪氣無檢束。嘯歌陟高臺。長風振林木。老眼何曾青。四海無一物。萬古留詩名。九原消醉骨。居然方丈家。惜也微瑕玉。塗窮道不窮。先生安用哭。

泛舟回瀾亭坐中作

昔年醉回瀾。猶恨身屬官。今年邂逅來。身與亭俱閑。洗心亭下水。照眼亭西山。溪山如故人。喜我復來還。有酒澆我胸。有花怡我顏。韓鷹乍脫臂。但覺天地寬。山陰忽回船。夜闌情未闌。

樂山松

樂山一何崇。上有千歲松。清孤月露底。秀拔天地中。蒲柳抱常質。桃李開芳容。爭如十八公。笑傲冰霜風。居然喜避世。不肯污秦封。蟠如北海螭。伏如南陽龍。紛紛過者多。匠石終不逢。明堂幾時構。喚起蒼髯翁。

和淵明雜詩二首

俗士苦紛競。此心本無塵。功名遇外物。了不關吾身。吾身復何有。形神假相親。天地開一室。日月挾兩鄰。有生即有化。如晏之必晨。但得酒中了。亦足稱達人。揮戈欲却日。小力自不量。何如任天運。閉門坐齊芳。詩書列四隅。着我於中央。夏臥北窗風。隆冬曝朝陽。但有藜藿羹。亦是充飢腸。

少爲飢所驅。老爲病所迫。人生能幾何。東阡復南陌。急須沽酒來。一笑舉太白。浩歌草木振。起舞天地窄。同歡二三子。誰主復誰客。浮沉大浪中。畢竟歸真宅。歲月去何速。老炎變新涼。游子久不歸。回首望大梁。風埃慘如此。何處真吾鄉。野菊明落日。林楓染飛霜。勸我一杯酒。悠然秋興長。

和淵明始春懷田舍

家食自不惡。菽水甘清貧。學道未有得。讀書亦良勤。雖勤竟何補。俛首愧古人。靜言閱世故。來

者日月新。況復抱沉疴。百憂無一忻。安得衛生訣。益我華池津。恍如一夢覺。不與萬法鄰。野人借問我。恐是劉遺民。

和淵明飲酒韻

日入了公事。援琴洗塵喧。秋堂一燈明。清響到夜偏。彈罷枕書臥。渺然夢青山。山英向我問。君駕何時還。家僮忽喚覺。惆悵不能言。

臘日次幽居韻

世務方擾擾。人生何營營。不如不出門。坐頤天地情。泰中有否來。陰極即陽生。掀髯一笑起。窗外風鐸鳴。看雲偶獨立。踏雪時閑行。最愛朝日外。負暄向南榮。

歲除夕次東坡守歲韻

人生都百年。誰問鬪龜蛇。容顏鏡中換。老醜不可遮。殷勤守此歲。來歲復如何。南鄰祭竈喧。北里驅傩譁。須臾罷無爲。但聽樓鼓撾。明朝四十過。暮景真易斜。初心自慷慨。白首還蹉跎。寄語少年子。雖健不足誇。

次韻別歲

一日復一月。其來不肯遲。一冬復一春。既去誰能追。問歲果安往。懵不知津涯。常於歲除夕。知

是相別時。鄰翁慣禮餞。買酒烹鮮肥。百挽不得留。一別那須悲。年年例如此。華髮吾何辭。惟有學道心。自覺老不衰。

次韻餽歲

親朋餉無時。鄰里歡有佐。況當歲之終。可以具百貨。禮意各示勤。手段不妨大。我貧無往還。閉戶但高臥。藜羹且充腸。珍味不登坐。猶勝許文休。衣食出馬磨。自非揚子雲。載酒何人過。空吟餽歲詩。自歌還自和。

清明即事用前韻

一度清明了一年。溫風嫋嫋雨班班。幾家繡幃尋芳去。何處蹇驢馱醉還。宿草新墳驚世短。落花流水占春閑。曉鶯啼破松窗夢。缺月東南掛屋山。

五月十四夜對月有感

世事易隨雲變滅。人生難保月團圓。淮陽旅舍三年夢。河朔風聲五月寒。何處雲山端可老。向來天地爲誰寬。宦游脚底生荆棘。蜀道而今却不難。

再過鄆城示伯玉知幾

三年兩度過潞陽。鞍馬紅塵道路長。花月不應知我老。溪山也解笑人忙。朔風凜凜頻驚坐。夜雨

蕭蕭偶對床。他日水南營葬地。愧無遺愛在桐鄉。

次韻閑閑公夢歸

眉間喜色幾時黃。滿貯羈愁着瘦腸。萬里鄉關飛不到。十年歧路走空忙。盃心蘸月松梢影。鼻觀通風柏子香。最愛南山舊山色。夢中相覓不相忘。

題閑閑公夢歸詩後。用叔通韻

學道幾人知道味。謀生底物是生涯。莊周枕上非真蝶。樂廣杯中亦假蛇。身後功名半張紙。夜來鼓吹一池蛙。夢間說夢重重夢。家外忘家處處家。

送儀提點西歸

自斷平生不問天。拂衣歸去任吾年。五侯鯖飽無多味。九老圖成又一傳。回首京華瞻日遠。放懷鄉社得天全。綸巾醉臥咸陽市。始信人間有散仙。

再贗

人定端能坐勝天。刀圭有力制頽年。道非出世頭頭是。丹不遺經口口傳。陰魄沉迷終鬼錄。陽精飛鍊即神全。三山縹緲誰能到。目下身安亦是仙。

次韻李公度

餅有儲糧鬢有絲。蹉跎歲晚坐書癡。輞川畫隱王摩詰。錦里詩窮杜拾遺。應舉尙陪新進士。主文半是舊相知。春闈看決魚龍陣。未必尖錐勝鈍錐。

題無盡藏

梁斗南所藏畫

誰開天地秘密藏。今古人間用不窮。眼尾搖光千丈月。耳根傳響一溪風。勝游赤壁文章在。高臥燕山氣象同。二老風流涉何許。後生猶可畫圖中。

三弟手植瓢材。且有詩。予亦戲作

爲愛胡盧手自栽。弱條柔蔓漸繁回。素花飄後初成實。碧蔭濃時可數枚。試問老禪藤繳去。何如游子杖挑來。早知瓠落終無用。只合江湖養不才。

次韻三弟贈南庵老人

一庵礫磳勝巢仙。不入叢林恰是禪。花圃蓮塘閑打景。粥盂齋鉢老隨緣。忘言已了八千偈。適意更揮三兩絃。邂逅我來推不去。坐分一半好風煙。

次韻劉少宣

旅窗蝶夢曉驚迴。默數流年祇自哀。與世迂疎甘袖手。及身強健且銜杯。桐凋翠葉看看盡。菊着黃花旋旋開。杖屨南庵訪幽事。秋光滿眼送詩來。

酬李子遷

曾著朱衣侍冕旒。忽乘羸馬出皇州。青山有約攜琴往。白髮無成把鏡羞。却笑張儀誇舌在。不妨巢父有詩留。柳湖沙徑東南夢。又見兒童迓細侯。

過清川次侯生君澤韻

誰能孤憤效韓非。且喜玄微對鏡機。出得山來無遠志。寄將書去有當歸。閑居已判平生了。眞賞從教舉世稀。日咀道腴深有味。更須口腹事甘肥。

聞蜚用少陵韻

唧唧不堪聞。村居更惱人。青衫傷久客。華髮念雙親。歲暮那逢雨。秋宵未向晨。石心猶可轉。百感本來眞。

除夕用少陵韻

窗送迢迢漏。燈開艷艷花。正愁聞過雁。久客羨棲鴉。放眼春猶好。驚心日又斜。一蓑江上雨。歸思浩無涯。

即事

臥疾劉公幹。躬耕鄭子眞。溪山留好客。天地許閑人。花醉紅沾袖。松吟翠繞身。捫心無所歉。持

此壽吾親。

宋樓道中

十里羊腸路詰盤。過花穿柳幾迴還。馬頭忽轉青林角。綠繞人家水一灣。

過武丁廟

旱則爲霖水則舟。若人端合夢中求。荆王枕上陽臺雨。板築英雄老死休。

戲答侯威卿覓墨

萬松火厄化緇塵。依舊徂徠雪裏春。冷劑香螺夔一足。破慳分與畫眉人。
宮中取張過墨燒去膠。以之畫眉。謂之畫眉墨。

北園

碧梧斜影落胡床。白葛烏巾滿意涼。宴坐不知紅日晚。筇輿歸路麥花香。

宋內翰九嘉

九嘉字飛卿。夏津人。黃裳榜進士乙科。歷藍田高陵扶風三水四縣令。皆有能聲。入爲右警巡使。應奉翰林文字。正大中。病失音。廢居。歿於癸巳之禍。嘗有詩云。浩歌風露下。醉袖拂南山。又題壽安煙霞亭云。粧鑾土壁紅千點。界畫銀沙綠一鉤。其才藻可略見矣。

途中書事三首

幼穉扶輪婦挽轅。連顛翁媪抱諸孫。飢民羸卒如流水。掘盡原頭野薺根。
老穉扶攜訪熟鄉。驛塵滿路殣相望。終朝拾穗不盈把。只有流民如麥芒。
攜絲奪麥人爭略。烘日吹風天有年。湯餅元非小人腹。繭絲都作大夫賢。

館中納涼書事

涼洒塵纓聒耳醒。虛堂窈渺好風清。雀知愛子來迴哺。鼠不畏人旁午行。
每用熟眠酬閨寂。端知固有享高明。宦游非不佳官府。奔走塵勞漫一生。

東州有感

東城衰草沒黃沙。故壘周遭小范衙。牧豎那知真老子。龜趺繫馬臥吹簫。

搗金明砦作建除體

建牙誓諸將。梟鳴軍盡驚。除道非戰事。銜枚幻奇兵。滿鎧霜日輝。行陣寂無聲。
平旦飛出谷。桑柘蔽金明。定知此陳迹。中原遮寇城。執鞭吾不及。范公凜如生。
破碑字仍在。鼠竄臥深荆。危襟按其壘。信哉天下英。成敗翻覆手。
狐兔今橫行。收復會有時。夷吾當請纓。開圖睨督亢。按劍逐長鯨。
閉塞亦已久。一揮氛晻清。

被檄從軍

不巾不幘柳陰行。朝醉南村暮北莊。一旦捉將官裏去。直驅盲馬陣中央。即所乘盲馬而言。

留別孫俊民姚公茂

草根殘日射離觴。主席風生熱肺腸。此去兜零紅照夜。輸君吹笛傍糟床。

醉醺菊

醺醺風味醺人醉。着莫東籬愛酒翁。一夜金英全換骨。冷香晴雪滿秋風。

蓮社圖

野鷺家雞俗好乖。虎溪泉石滿塵埃。壯哉砥柱頽波裏。惟有淵明挽不來。飛卿不喜佛法。自言平生有三恨。一恨辭學之士多好譌經潤文。三恨大才而攻異端。淵明挽不來之句。蓋自況也。

前二恨辭學之士多好譌經潤文。三恨大才而攻異端。淵明挽不來之句。蓋自況也。

卯酒

臘蟻初浮社甕筴。宿醒正渴卯時投。醉鄉兀兀陶陶裏。底是形骸底是愁。

雷御史淵

淵字希顏。別字季默。同知北京路轉運使事。思之季子。崇慶二年。黃裳榜進士甲科。釋褐涇州錄事。徐州觀察判官。召爲荊王府文學兼記室參軍。轉應奉翰林文字。同知制誥兼國史院編修官。并監察御史。以公事免。用宰相侯莘卿薦。除太學博士。還應奉。終於翰林修撰。初在東平。東平。

河朔重兵處也。驕將悍卒。倚外寇爲重。自行臺以下。皆務爲摩拊之。希顏蒞官。自律者甚嚴。出入軍中。儼然不爲屈。不數月。閭巷間家有希顏畫像。雖大將亦不敢以新進書生遇之。嘗爲戶部高尙書所辟。權遂平縣事。時年少氣銳。擊豪右。發姦伏。一縣畏之。稱爲神明。及以御史巡行河南。百姓相傳雷御史至。豪猾望風遁去。正大庚寅倒迴谷之役。希顏上書。破朝臣孤注之論。引援深切。灼然易見。而主兵者沮之。策爲不行。至今以願望爲當國者之恨。希顏三歲喪父。七歲養於諸兄。年十四五。貧無以爲資。乃以胄子入國學。便能自樹立如成人。不二十。游公卿間。太學諸人。莫敢與之齒。渡河後。學益博。文益奇。名益重。爲人軀幹雄偉。髯張口哆。顏渥丹。眼如望羊。遇不平。則疾惡之氣。見於顏間。或嚼齒大罵不休。雖痛自摧折。然猝亦不能變也。生平慕田疇。陳元龍之爲人。而人亦以古人期之。故雖以文章見稱。在希顏仍爲餘事耳。

雲卿父子有宛丘之行。作二詩爲錢

陽春到上林。百卉紛白紅。岸谷稍敷腴。溪光亦冲融。獨有石間柏。不落鼓舞中。期君如此木。歲晚延清風。

漢庭議論學。傾耳待敬向。君家賢父子。千載蔚相望。讀書二十年。閉戶自師匠。異端紕偏雜。陳言刊猥穢。剛全百鍊餘。氣出諸老上。頽風正波靡。去去作隄障。

京叔將拜掃于陳。徵言爲贈。老嫗廢學。茫無所得。獨記其與屏山雪卿襟期所左右。非以爲詩也。

梁苑池塘生綠煙。吹臺草色春芊芊。故人幽局閉長眠。氣槩英英猶眼前。陽春無力蘇重泉。孝子感時涕泗漣。匍匐歸掃淮陽阡。徵予贈別意拳拳。我自頑頓須人鐫。安能視後輒子鞭。姬情孔意星日懸。韓旋萬化中持權。斯文興喪實關天。尋常墨客技藝然。醫巫星曆相比肩。何用雕琢空徂年。即今海縣謾腥膻。獨挽洙泗可洗滌。迺公有志屏山賢。二豪在日予牽連。傷哉未售墳已顛。老我欲種南山田。子之兄弟其周旋。事業絕勝空言傳。

同裕之欽叔分韻得莫論二字

幼安謝辟命。子雲老寂寞。趨嚮豈獨異。時命非所度。我久困流離。一廬求負郭。雖無斬敵功。尙舉力田爵。崧少啓吾封。四履盡伊洛。有客來問津。醉眼入寥廓。世事久閉眼。終日只睡昏。清風何處來。佳客已在門。倒屣往從之。玉色向我溫。妻孥趣作具。歡喜傾瓶盆。清夜襍被往。共就遺山元。嘲謔及俳語。發揮閒微言。懸斷漏天樞。高嘯驚鄰垣。脗合政相和。意到俄孤鶩。恨不倒因廩。矧肯留籬樊。棄屨獲珠玉。披榛見蘭蓀。我肱已三折。醉墮偶全渾。知無適俗韻。量力任灌園。二君清廟器。巾屨華疊尊。蒼生望休息。朝廷待崇尊。出處旣異途。會合難預論。此榮未易得。此

樂未易得。此夕勿憚煩。白酒舉初子。黃雞溷諸孫。水樂喧後部。山餐秀前軒。一醉萬事休。商聲滿乾坤。

會善寺怪松

物生自有常。怪特物之病。嗟嗟此老蒼。怪怪生魁柄。侏儒蹙脾股。宿瘤擁腮頸。蜿蜒蛟龍戲。騰擲羆虎競。須髯喜張磔。意氣怒狂迸。匠石求棟楹。節目足譏評。芻蕘急薪樵。堅悍空盼瞪。靜言觀倚伏。未易相弔慶。雖違時世用。顧免斤斧橫。陽秋莫榮悴。歲月何究竟。盤盤曲則全。挺挺獨也正。小草悞掃迹。伏神還守性。儻隨天中景。廣宇共麻映。

玉華山中。同裕之分韻送欽叔得歸字

洗耳潁川水。療飢西山薇。山川得佳客。草木生光輝。末路風教薄。此道日已微。相期千載事。非君誰與歸。

九日登少室絕頂。同裕之分韻得蘿字

閑居愛重九。佳人重相過。登高酬節物。少室鬱嵯峨。迢遞謝塵土。夷猶出煙蘿。歛如據鰲頭。萬壑俯蜂窩。浩浩跨積風。瀾瀾渺長河。日車晨紅輪。天宇凝蒼波。指點數齊州。始覺氛埃多。我無倚天劍。有淚空滂沱。驚鱗盼奧渚。倦翼占危柯。悔不與家來。結茅老巖阿。歸途睠老阮。廣武意如何。

月下同飛伯觀蛙丁灌園得蛙字

村居鄰老圃。喘汗憫夏畦。輓轡健晚涼。月輪轉天躔。剡剡金融溝。涓涓冰泮溪。黃葵漸蘇息。綠澗俄淒迷。生意續夜氣。甘滋浹新蕒。風露觸處香。河漢望中低。野人無遠謀。且喜豐食鮭。雖愧下帷董。稍悟養生秘。歸懷自浩然。流光挹平西。

濟南珍珠泉

大地萬寶藏。玄冥不敢私。抉開青玉罅。渾渾流珠璣。輕明疑夜光。潔白真摩尼。風吹忽脫串。日射俄生輝。有時如少斬。聲沸却疊疊。風色媚一川。老蚌初未知。君看一日間。巧歷所不費。遊人隨意滿。不畀乾沒兒。吾謂歷下城。繁華富瑰奇。貪夫死專利。帝意憐其癡。故露連城珍。可玩不可幾。若曰天壤間。所遇皆汝資。何必秘篋笥。自貽伊瑕疵。詩成一大笑。臆說量天機。

讀孔北海傳

漢室風流絕建安。老瞞父子力排山。可憐魯國眞男子。也着區區七子間。

賦侯相公雲溪

相君襟度本汪洋。戲鑿陂池便渺茫。解起晴雲作霖雨。更邀明月貯清光。千重複嶺藏仙境。萬斛香泉釀醉鄉。畢竟麟符拋不得。煙波空效五湖蒼。

贈陳司諫正叔

洗兵有志挽天河。補袞剛留諫諍坡。賦出石腸還婉麗。政成鐵面却中和。寒侵桃李淒無色。雪壓池塘慘不波。急手尊前謀一醉。六街塵土澆人多。

濟南汎舟水底見山有感而作

南山已在風塵外。更恐飛埃流碧巔。一棹晚涼波底看。洛沂面目本天然。

洛陽同裕之欽叔賦

日上煙花一片紅。崧邛西峙洛川東。纔聞候騎傳青蓋。又見牽羊出絳宮。事去關河不橫草。秋來陵寢但飛蓬。書生不奈興亡恨。斗酒聊澆磊砢胸。

啓母石同裕之賦

千古崩崖一罅開。強將神怪附郊禰。無情頑石猶貽謗。貝錦從爲巷伯哀。

贈答麻信之并序

麻弟避兵渡河。徑謁裕之於崧高。黃緣一見。相與之意甚厚。既留數日。又將過吾景玄於女几之陰。維元劉國士也。而弟游於其間。則弟之爲人可知已。臨行復長歌相贈。清平豐融。蓋他日未易量也。愛仰不足。詩以送之。

五老英靈未陸沉。一枝高秀出詞林。珪璋自是清朝器。律呂偏諧治世音。此去文章足知己。後來功用只齊心。濟時相約元劉了。索我雲山深復深。

雪

風定雲仍煖。天圍四顧低。紛紛俄擲野。浩浩欲平溪。樵檐歸時重。漁舟望處迷。飢鴉空繞樹。若箇可安棲。

宮鴉

萬樹瓊芳鎖漢宮。羣鴉容與五雲中。曙光先背朝陽日。春信頻呼禁籞風。青鬢巧梳欣一色。秀眉學畫鬪新工。鳳樓未訝啼聲切。愁滿長門信未通。

洮石硯

緹囊深複有滄洲。丈室春融翠欲流。退筆成丘竟何益。乘時真欲礪吳鉤。

馬上見桃花

九衢鞍馬苦塵腥。忽見溪桃倦意醒。未必施朱便粗俗。最憐滌露出娉婷。城東詩老圖幽絕。水上仙郎記窈冥。何似玉堂留故事。賣花擔上有丹青。

叔獻兄歸隱崧山。有詩見及。依韻奉寄

幾百千年一敬通。飄飄歸袂振孤風。平生自處神明在。衰俗無從議論公。韶箭向來儀彩鳳。弋絰何苦慕冥鴻。他年杖屨相尋處。三十六峯雲霧中。

劉御史雲卿挽詞二首

氣幹參天擬萬尋。聖門梁棟自堪任。豸冠岳岳鋒稜峻。鳬鳥翩翩惠愛深。可忍佳城玉埋土。最哀慈幄血霑襟。傳家賴有雙珠在。不爾何如慰士林。少同里閭早知音。投分交情雨舊今。鄉校聯裾春誦學。上庠連榻夜論心。南山松桂愁霜殞。北地乾坤恨日侵。不得生芻躬一奠。西風吹淚滿衣襟。

題黃華江皋烟樹二首

疎柳靜茅亭。亭下長江路。不見亭中人。蕭蕭烟景暮。江山萬里眼。一亭略約之。黃華未死在。看取畫中詩。

送李執剛致仕歸洛

漕計中興屬老成。引年陳請獨嶢嶸。果能辦此公真勇。愛莫留之我惜情。塵釜恐驚黃鶴舉。烟波不負白鷗盟。洛陽去去春如錦。晝日神仙看地行。

梨花得紅字。

雪作肌膚玉作容。不將妖艷嫁東風。梅魂何物三春在。桃臉眞成一笑空。雨細無情添寂寞。

無情亦作

淚痕明月有意助豐融。

有意助亦作真態更

相如病渴妨文賦。想像甘寒結小紅。

河山形勝圖

高峯巨壑與天連。中國關防表裏全。北岸塵氛重回首。不如圖上看風煙。

次裕之韻兼及景玄弟

名腸相煇半成灰。戰退紛華旆始迴。文字喜逢修月手。津梁愧乏濟川材。等閑有酒輒共醉。信口哦詩不置才。最憶平生劉子駿。紫芝可惜不偕來。

愛詩李道人若愚崧陽歸隱圖

我家棧前凡再朞。詩僧騷客相追隨。春葩繽紛香澗谷。夏泉噴薄清心脾。霜林置酒曳錦障。雪嶺探梅登玉螭。重陽夜宿太平頂。天雞夜半鳴喔咿。整冠東望見日出。金輪湧海光陸離。神州赤縣入指顧。風埃未靖空嘯歎。窮探極覽不知老。泉石佳處多留題。簡書驅出踏朝市。期會迫窄愁鞭笞。襟懷塵土少清夢。齒頰棘荆眞白癡。叩門剝啄者誰子。道人面有熊豹姿。披圖二室忽當眼。貫珠編貝多文辭。我離山久詩筆退。摹寫豈復能清奇。再三要素不忍拒。依依但記經行時。道人愛山復愛詩。嗜好成癖未易醫。山中詩友莫相厭。遠勝薰酣聲利乾沒兒。

李右司獻能

獻能字欽叔。河中人。年二十一。以省元賜第。廷試第一人。宏詞優等。授應奉翰林文字。在翰林凡十年。出爲鄜州觀察判官。用薦者復應奉。俄遷修撰。以鎮南軍節度副使充河中經歷。正大八年。河中陷。獨得一船走陝州。被召。以道梗不能赴。就權陝府行省左右司郎中。軍變遇禍。欽叔資稟明敏。博聞強記。輩流中少見其比。爲人誠實樂易。洞見肺腑。世間狡獪變詐。纖悉無不知。然羞之不道也。與人交。不立崖岸。盃酒相然諾。赴難解紛。不自顧藉。雖小書生以愛兄之道來。亦殷勤接納。傾筐倒庋。無復餘地。時輩以此歸之。家故饒財。盡於貞祐之亂。京師冷官。食貧口衆。無以自資。太夫人素豪侈。厚於自奉。小不如意。則有金魚墮地之譴。人視之殆不堪其憂。而欽叔處之自若也。欽叔文章行業。過人處甚多。而天下獨以其純孝爲不可及云。

贈王飛伯雜言一首

東風吹客衣。敗絮逐風飛。曉雪沒寒薺。無物充朝飢。空簞嘖嘖號飢鼠。饕飮蠕蠕緣破袴。人生豈是大與雞。終歲區區守門戶。游說萬乘苦不早。儀秦殆是穿窬盜。六國印。千金車。滿眼榮華鏡中老。孔子聘列國。孟軻游齊梁。能令千載後。名與日月光。男兒生世不虛生。死恨身後無聲名。不然鳴玉游紫京。不然著書談六經。九日可射天可補。鞭笞百蠻作降虜。離騷一篇亦不惡。雄筆盤

盤映千古。君不見彩鳳翔丹霄。一鳴應九韶。寸雲起泰山。霖雨滿人間。丈夫窮達果在天。安用兒女得志相歡羨。失志相悲憐。仰天大笑出門去。四海今誰魯仲連。

夜宿虛皇閣下

倚天青壁截雲霞。一水高懸界削瓜。不惜崙嶸攀石磴。要看絢爛坼雲華。玉峯影裏虛皇閣。鐵笛聲中秘監家。明日川塗入塵土。却應平地幾褒斜。

玉華谷同希顏裕之分韻得秋字

玉龍落峽噴飛流。空翠霏霏晚不收。軟脚山堂一壺酒。暮涼閑對兩峯秋。

四皓圖

弋繒安足致冥鴻。自是兼懷翊贊功。謾說壺關有遺老。望思臺上已秋風。

二老雪行圖二首

自笑膠膠擾擾身。十年疋馬走紅塵。何時雪滿平生屐。太華峯前約故人。
抱琴衝雪又衝風。二老風流阿堵中。未似村翁眇抹眼。火爐頭上話年豐。

別馮駕之

東風弄微寒。吹雪作輕陰。春歸未得歸。愁攬客子心。與君俱異縣。那復重分襟。感時復恨別。老

懷苦難任。憶昨滎陽會。燈火語夜深。縱談間俳語。浩歌雜狂吟。相期梁宋游。感君肯相尋。西園偶差池。市樓成孤斟。相逢涓水涓。暫爾成盃簪。燕鴻還別去。又復如商參。我行落日邊。正馬獨登臨。君方無定在。倦翼思茂林。人堪幾回別。老境各駸駸。涓水不西流。雙魚定沉沉。幸有西飛鴻。無吝金玉音。

昆陽元夜南寺小集

春暈短短生蘭芽。東風嫋嫋吹芳華。暗黃着柳小梅素。月姊新年恰十五。東皇太一來翩翩。竹宮神光祀甘泉。茂陵弓劍沒秋草。鳳燈煌煌空自然。當年曼衍魚龍舞。回頭昭陽化飛土。昆陽客舍冷於冰。破殿蕭條佛燈古。雪消梁苑想春紅。車如流水馬游龍。銀餅載酒隨春風。酒酣一嚼百盃空。韶華過眼弦上箭。人生得酒從歡宴。北斗闌干夜參半。耿耿疎星淡河漢。

追憶潁亭泛舟寄陽翟諸友

十月冬氣寒。清霜殞羣木。輕舟泛潁水。微風吹野服。信流不知還。石艇橫老玉。苔花錦爛斑。懸溜珠麗巖。頗離塵市雜。倒瀉軒裳俗。歲月今幾何。春草萎以綠。懷歸劇飢渴。仰羨雙飛鵲。矯首九山雲。迢迢傷遠目。

郊城秋夜懷李仁卿

日入羣動息。暝色陰濛濛。故人隔潁水。嬋嬋生秋風。輕風捲纖雲。碧漢磨青銅。坐久襟袖涼。皎月升天東。伊人如此月。霽色羅心胸。可望不可親。倏已駕飛鴻。念此太虛間。心交神自通。而況千里月。相望寧不同。孤光透薄帷。儼如接音容。翻翻繞枝鵲。唧唧侵堦蛩。上床轉不寐。高樓待晨鍾。相思夜何永。月落秋床空。

題飛伯詩囊

飛伯以布爲囊。宋嘗世名卿詩投其中。

潁露毛錐祇自賢。智如樽腹但求全。迂疎差似淵才富。羞澁猶無杜老錢。收拾珠璣三萬斛。貯儲風月一千篇。嘔心大勝奚奴錦。要與風人被管絃。

送王飛伯歸陽翟

故舊相望似曉星。平生懷抱向君傾。朱絲不入箎箏耳。彩鳳終儀韶濩聲。三楚迢迢動離思。九山落落助高情。一塵擬就隆中臥。要子同躬壠上耕。

西園春日

的皪冰梢出短牆。泓澄煖綠靜橫塘。娟娟高竹迎人翠。嫋嫋長紅隔水香。病起心情疎酒琖。朝來風色妬年芳。只應歸去芸窗晚。夢到湘妃錦瑟傍。

滎陽古城登覽寄裕之

突兀高臺上古城。登臨人境兩崢嶸。關河落日歲云暮。草木臨風氣未平。虎擲龍拏王伯事。天荒地老古今情。一盃欲洗興亡恨。爲喚窮途阮步兵。

從獵口號四首

蓮燭金紗簇簇齊。宮槐籠曉尚淒迷。景陽鍾罷聽殘漏。萬馬銜霜不敢嘶。閭闔傳符啓九關。一聲清蹕駐南山。虎賁先導三千士。天馬初離十二閑。爛爛龍旂捧日旂。從臣遙認赭紅衣。天王清曉親弧矢。初合今冬第一圍。的礫金鏑墮曉星。晴天霹靂應弦聲。風毛雨血燕雲在。未要草間狐兔驚。

上清宮梅同座主閑閑公賦

厭住盧家白玉堂。琳宮瀟灑占年芳。先生琪樹風霜古。影占銀潢月露涼。物外根株本仙種。世間紅紫避嚴粧。遨頭詞伯今何遜。一笑詩成字字香。

丹陽觀竹宮中移賜

素士如林侍紫清。紫清新許住蓬瀛。娟娟粉節霜勻出。蟲蟲煙梢玉削成。福地根莖蒙化育。中天雨露惜恩榮。綠章封事朝來奏。又聽風前彩鳳鳴。

王右司渥

渥字仲澤。以字行。興定二年進士。調管州司候。不赴。壽州防禦使邦獻。商州防禦使國器。武勝節度庭玉。愛其才。連辟三府經歷官。在軍中凡十年。舉寧陵令。未赴。丁太夫人憂。廬墓三年。服除。復授寧陵。正大七年。朝廷與宋人議和。擇可爲行人者。仲澤以才選。凡再至揚州制司。宋人愛其才。有中州豪士之目。使還。以寧陵課最。遷一官。入爲尙書省掾三月。即授太學助教。充樞密院經歷官。八年院廢。權右司郎中。中牟失利。不知所終。仲澤博通經史。有文采。善談論。工書法。妙於琴事。詩其專門之學。人物楚楚。若素宦于朝。吏事則與冀京父相上下。其辨博又屏山所許。天下談士三人之一也。嘗與予行內鄉山中。馬上賦詩云。霜風十月餘。千山錦嶢嶸。又九日登穎亭見寄云。茫茫襄城野。歲晏多風埃。野田半已荒。草蟲鳴更哀。西風吹白雲。大隗安在哉。七聖之所迷。而我胡爲來。我本林野人。初無經世材。失身鞍馬間。坐令雙鬢摧。安得元紫芝。共舉重陽杯。詩成西北望。九山鬱崔嵬。此詩脫遺處不復能記憶。讀之尙可以見斯人胸懷之髣髴。澤仲穎上詩。不才被棄。翻爲幅。拙計無營。却似高。是處青山可埋骨。誰家白酒不消憂。夕陽轉屋臥林影。急雨壞橋喧水聲。人喜傳之。

穎亭

三載西湖阻勝遊。穎亭聊喜散羈愁。九山西絡煙霞去。一水南吞澗壑流。賓主唱酬空翠琰。干戈橫絕自滄洲。忽忽正馬從軍去。慚媿煙波萬里鷗。

有寄

十年鐵馬暗京華。客子飄零處處家。征雁久疎河朔信。小梅重見汝南花。棲棲活計依簷雀。冉冉年光赴壑蛇。舊雨故人應念我。不來聯句夜煎茶。

寄京文

憶昔相從在寢丘。城南城北縱歡遊。杏花聯句香隨馬。野水添杯浪拍舟。邂逅又成三月別。飄零合負一春愁。汝陽淮甸經行徧。應有新詩爲我留。

餐秀軒

秋風幾日搖霜櫂。秋色南山兩奇絕。野人窗戶終日開。要看千秋秦嶺雪。層崖深谷相吐吞。落日白鹿東南奔。野花雙塔古蘭若。樓觀縹緲煙霞昏。玉山生玉人不識。草木四時空好色。輞川舊與藍橋通。細水至今流石室。一川黃葉長安秋。望望不見令人愁。書生不是濟時具。收得閒身成此遊。主人開筵留客醉。山雨多情濕征袂。明朝騎馬上七盤。迴首山家但空翠。

遊藍田

甲申之秋月建戌。我行商顏正落木。山英似與行子期。撥霧披雲到山腹。古潭千丈照錦峯。下有蛩龍上棲鶴。高風吹雪已多時。熊耳雙尖寒欲縮。新乘一水出龍渦。驚見千峯遮木櫺。南山秀拔

北山雄。劍戟森然對羣玉。崎嶇直過藍田西。始見商山眞面目。悟眞峽口忽中斷。天末脩眉畫濃綠。此峽何年得此名。曾有金仙構華屋。西巖石室懸細水。萬斛瓊珠輸輞谷。行人尙說有七盤。瘦馬已愁疲百曲。風門放眼望秦川。擾擾更嗟塵界跼。去年游騎渡葭蘆。萬里橫行如鬼速。灞陵原下馬飲血。太華峯頭虎擇肉。今年九月未防秋。始見登場有新穀。一鞭暮指古招提。疎雨有情留客宿。主人聞客喜相接。尊酒笑談如昔夙。塞予嬾散本眞性。臨水登山此生足。一行作吏志益違。十載從軍雙鬢禿。官家後日鑄五兵。便擬買牛耕白鹿。

送裕之還嵩山

高懷不受簿書侵。清潁鷗盟欲重尋。老去宦情知我薄。閒來道念見君深。對床夜雨他年夢。滿馬西風此日心。嵩頂勝游誰得共。仙閒仙馭待知音。

宋句用古仙人詩語。

古仙人辭今附於此

夢入雲山宮闕幽。鸞鷺同侶駕鳳流。桂月竟夜光不收。世俗擾擾成羈湫。醉飛星馭鞭金虬。八仙浪迹追眞游。龜玉筌蹄二十秋。摩霄注壑須人求。覓劍如或笑刻舟。陽燧非無用綺儔。元鼎以來虛崑丘。東井徒勞冠帶修。松澹竹飲度蜃樓。崧頂坐嘯垂直鉤。祇應慚愧劉幽州。

知音者無惜留跡。

興定庚辰夏六月望。予與河南元好問。趙郡李獻能。同游玉華谷。又將歷崧前諸剎。因憩於少

姨廟。元周行廊廡。得古仙人詞於壁間。然其首章直屋漏雨。爲所漫剝。殆不能辨。乃磴木石而上。拂拭汎漑。追視者久之。始可完讀。觀其體則柏梁。事則終始二漢。字畫在鍾王之間。東井又元鼎所都幽州。必賢宗子虞也。夫眷眷不忘幽州者。非吾田疇尙誰歟。田復所事之讎。却曹瞞之賞。衰俗波蕩中。挺挺有烈丈夫風氣。其死而亡蓋無疑。其能道此語亦無疑。觀者不應以文體古今之變。而疑仙語也。噫。仙山靈岳。宜有閎衍博大之真人往來乎其間。而世人莫之識也。予三人者。乃今見之。夫豈偶然哉。再拜留跡。以附知音者末。渾源雷淵題。此詩爲仙語無疑。然直謂田疇。則似亦未安。屏山李純甫題。

遊丹霞下院。同裕之鼎玉。分得留字

霜落豐山白水收。歲華全在竹園頭。賦詩鞍馬慚眞賞。載酒林泉阻勝游。野色自隨人意遠。夕陽應爲鳥聲留。仙源回首旌旗隔。一笛西風喚客愁。

丹霞下寺。土人以竹園頭名之。

驛口橋看白蓮

陰陰喬木障晴暉。的的冰葉照碧漪。秋暑困人仍御扇。晚風生竹却添衣。百年蓬鬢關心切。千里蓴羹與願違。杖屨頻來約他日。不妨先築釣漁磯。

蒙城縣齋

穀雨連朝沒麥場。官糧未入長官忙。堦庭有雨青蛙鬧。牢戶無人白日長。

三門津

層崖摩蒼穹。四月號陰風。大河三門險。神禹萬世功。他山亦崔嵬。砥柱獨尊雄。雷霆日鬪擊。悍暴愁天公。劉侯智有餘。始令舟楫通。仍餘石上穴。飛棧曾連空。遙瞻白玉枝。挺植丹竈中。仙公去不返。此事真冥蒙。夫人與鼓崖。怪幻尤難窮。獨喜兵火餘。歸然出新宮。當時疏鑿意。四海要會同。誰知千歲後。築壘防嘯兇。詩成一大笑。浩浩洪波東。

被檄再至揚州制司。驛亭有題詩譏予和事不成者云。來往二年無一事。青山也解笑行人。因爲解嘲

二年奔走道途間。知被青山笑往還。只向江南南岸老。行人應更笑青山。

冀都事禹錫

禹錫字京父。龍山人。崇慶二年進士。調沈丘簿。與縣令者不相能。及令以贓敗。疑京父發之。乃賂遣權貴。誣京父以賓客依託之事。坐廢十年。朝臣薦其才者積數十人。終爲銓曹所礙。居襄邑。部使者起之。攝旁近諸縣。所至有父母之愛。農司治許昌。又爲主事。區處餽餉。上下千餘里。不露聲跡。而條畫次第皆具。雖鱗雜米鹽。若不足經意者。問之即應。如指諸掌。一時吏如康伯祿、李

欽止諸人。多自以爲不及也。正大中。當路諸公極力辨其被誣。乃得以常調守扶風丞。召補省掾。不就。歸德奏充知事。及城被攻。京父爲經歷官。守禦之策。一府倚重之。車駕至。授左右司都事。兼應奉翰林文字。官奴之變。家人勸京父羸服免禍。不從。人有自外至者。京父問賊入禁中否。曰禁中賊滿矣。乃自投水中。在京師時。希顏、仲澤、欽叔、京父。相得甚歡。升堂拜親。有昆弟之義。而不肖徒以文字之故。得幸諸公間。希長子六歲。澤長四歲。欽與京少子二歲。希歿於正大辛卯之八月。年四十八。澤歿於明年之七月。年四十七。欽歿於其年十一月。年四十一歲。京歿於又明年之三月。年四十二。蓋不二三年。而五人者唯不肖在耳。今日錄諸君子詩。感念平昔。不覺流涕之被面也。

僧房

上方樓觀袂衣寒。霜後川原眼界寬。我是禪房未歸客。阿師休作長官看。

贈雷御史兼及松庵馮丈

平生疾惡如風手。力振臺綱事所難。人道千鈞羞射鼠。我憐衆煦解漂山。明時士論知無負。晚歲交盟豈易寒。見說嵩前茹芝老。白雲倚杖待君還。

中州庚集第七

蘭泉先生張建二十三首

張瓚一首

毛宮教應七首

朱宮教瀾三首

姑汾漫士王琢六首

呂中孚九首

王元節三首

李端甫一首

楊澤州庭秀二首

孫省元鎮一首

張著二首

景覃一首

段繼昌五首

岳行甫二首

迂齋先生周馳二首

劉太常鐸七首

李扶風節二首

劉勳一十三首

李澥四首

秦略一十三首

張琚二首

馬編修天來一首

張內翰本二十首

申編修萬全二首

崔遵三首

王主簿革一首

衛承慶一首

劉昂霄九首

田紫芝三首

王萬鍾三首

雷琯一十九首

王亳州賓三首

李夷三首

郭邦彥六首

史學八首

侯冊五首

王元粹三十三首

王鬱一十二首

蘭泉先生張建

建字吉甫。蒲城人。明昌初。舉才行。授絳州教官。召爲宮教。應奉翰林文字。以老乞身。道陵愛其淳素。不欲令去左右。眷眷久之。超同知華州防禦使事。仍賜詩。有從今畫錦蓮峯下。三樂休誇榮啓期之句。士林榮之。吉甫自號蘭泉老人。有集行於世。其論詩云。作詩不論長篇短韻。須要詞理具足。不欠不餘。如荷上洒水。散爲露珠。大者如豆。小者如粟。細者如塵。一一看之。無不圓成。始爲盡善。吉甫詩雖不能盡如所言。然亦未爲無所得也。

擬古十首

飛雲何冉冉。高與日月齊。中有兩仙人。盛服持玉圭。我欲從之游。天險不可躋。邈焉望不及。短日西山西。

客從岳頂來。貽我松粉黃。爲言服之久。身輕欲飛翔。我嘗淡無味。我嗅寂無香。還君三太息。世好方膏粱。

枯桑依頽垣。摧折生理微。剝我枝間葉。備君身上衣。葉盡誰復顧。棲鳥來亦稀。君看牡丹叢。日
日笙歌圍。

青青河濱柳。柯葉柔且妍。一從智巧萌。戕賊爲杯棬。器成豈不佳。天質失自然。爭如河堤上。濯濯披春煙。

石泉何清冷。中有九節蒲。蒲性本孤潔。不受滓穢汙。一移入城市。生意寄泥淤。翠葉日焦卷。不霜而自枯。寄言守靜者。勿涉奔競途。

庭前蘭蕙窠。三年種不成。門外旱蒺藜。一旦還自生。第恐傷我足。鋤去根與萌。如何一雨後。走蔓復縱橫。

有客曳長裾。袖刺謁高閭。低頭拜閽者。始得通姓名。主人果厚眷。開宴海陸并。顧必承彼顏。語必順彼情。不如茅簷下。飽我藜藿羹。

羣羣嶧山桐。一樹十二枝。枝分十二律。所指各不移。胡爲師襄子。獨謂東南奇。一律不可闕。一枝不可遺。誰能以此意。說似典樂夔。

美人何煢煢。顏若蒼之英。絕世而獨立。一顧傾人城。三星正當戶。俟我亦在庭。之子無良媒。不敢犯露行。

丘中有一士。顏貌清且癯。緼袍僅蔽體。蔬飯不滿盂。時出蓬蒿門。鼓腹歌黃虞。不知何所得。矯首望八區。

山中

林櫻墮紅珠。打着琴上絃。山人時一笑。愛此聲琅然。

韓信廟

一檄風馳萬壘降。當時意趣已難量。既能歸漢識真主。何必下齊求假王。將幄深嚴巖樹碧。門旌搖曳嶺雲黃。我詩賁備春秋法。勝把君侯美處揚。

送張子玉

渭水玻璃碧。秦山劍戟明。秋光如我瘦。行色與君清。蟬嘒西風柳。鴉翻落日城。歸舟幸無物。且莫苦貪程。

梨花

蠶樹枝高茁朶稠。嫩苞開破雪搓毬。碎粘粉紫鬚齊吐。潤卷丹黃葉半抽。月影曉窗留好夢。雨聲深院鎖清愁。瓊胞已實香猶在。散入長安賣酒樓。

長安酒家有梨花樓。

答華陰宋先覺

雲臺清集憶當年。詩筆逢君厭老拳。後會邈如千里遠。壯懷不似十年前。風帘搖曳橋南酒。煙樹溟濛渭北天。咫尺靈山飛不到。夢魂長遠玉峯蓮。

送賀彥淳還南鄒

玉峯明滅暮雲邊。默計歸程約半千。襁負尙憐靈照幼。家貧賴有孟光賢。臨歧淚眼三年別。夾路風槐六月天。佇立望君西去遠。夕陽村落起孤煙。

山村風雨圖

雨昏山店望未見。風緊傘簷張不開。莫訝披圖便成句。爲曾行到此中來。

吉甫又嘗有詩云。風卷旱塵攔馬過。雲移涼影趁人行。其寫目

前之景。甚與山村風雨詩相似。今附于此。

賦胡直之溪橋蓮塘二首

漁父詞體

溪橋脚下水平分。橋柱萍粘浪打痕。天向晚。日攙昏。兩簇青煙斷岸村。拂拂輕風漾翠瀾。粉煤新撲小荷盤。塘水漲。岸痕漫。草閣臨流五月寒。

雜詩二首

瓦餅擔山泉。石鼎煮巖菊。燎以松桂枝。清芬滿茅屋。踏雪尋梅花。雪梅同一色。不是暗香來。梅花尋不得。

俊師定庵

淳泓石上泉。照我良是我。輕風一蕩激。真態互掀簸。乃知永慧性。非戒定未可。道人此名庵。千

却付一坐。海月自澄明。天花任飛妥。吾生劇萍梗。萬里信漂墮。湛然摩尼珠。坐受昏塵裹。何時陪遠公。同社事香火。

送王主簿還鄉

笑君習氣只書生。薄有歸裝亦自清。瘦僕擔詩雙籠重。羸牛引輓一車輕。長亭已過那知遠。別酒猶多未忍傾。記取明年斷腸處。玉梨花底月三更。

張瓚

瓚字器之。河中人。才氣超邁。時輩少見其比。年未二十。以鄉試魁陝西河東。不幸早世。張吉甫弔之云。惜哉器之眞丈夫。少年讀徧天下書。一事不成死於途。苗而不秀有矣夫。秀而不實有矣夫。其爲名流所嗟惜如此。

游樓巖寺

林表招人白塔明。竹間蘭芷石泉清。惠崇水墨西軒景。煙帶平蕪水帶城。

毛宮教廳

廳字牧達。平陽人。大定十六年舉學行。特賜進士出身。授校書郎。入教宮掖。歷太常博士。終于同知沁州軍州事。有平水集行于世。

無題一首

小顰對起石州山。楊柳分青入髻鬟。乍識春風眼如鵲。爲誰無語獨凭欄。

游河西孫氏園

亭榭依山水亂鳴。已如罨畫障中行。照溪芳樹紅雲合。迎客幽禽翠羽輕。豪氣未饒金谷友。醉魂如到錦官城。猶慚歸騎忽忽去。不得持盃待月明。

魏城馬南瑞以異香見貽。且索詩。爲賦二首

梅心蘭甲類元同。氣壓荀家百和功。借潤更煩纖手玉。出雲初試博山銅。崇朝日下亭亭蓋。三月花間細細風。我有因緣在香火。鼻端消息爲君通。

二卉真香豈復加。便宜編譜入雄誇。留殘一點薔薇水。幻出諸天薝蔔花。佩帶正垂金鈿小。薰爐孤起翠雲斜。金籠甲帳豪華事。慚愧桑樞甕牖家。

新春雪與韓府推

春到千門氣自嘉。更教飛雪助年華。六街官柳枝枝絮。一夜江梅樹樹花。況是縱吟多伴侶。直須爛醉作生涯。掃庭迎客東風裏。幕府風流有故家。

和思達兄杏花

碎剪明霞役化工。曉園香散暖煙中。羞逢柳眼三眠白。分得桃腮一笑紅。上苑繁華迷故國。曲江顚顚老春風。欲傳此恨花無語。強對芳時作醉翁。

春賞

潤入梅天雨乍晴。喚回春意有新鶯。雲霞照眼青山近。羅綺吹香白晝明。翠勺銀罍沽酒市。暖風遲日賣花聲。人人共喜華胥世。何用遨頭羨錦城。

朱宮教瀾

瀾字巨觀。霖堂先生之子。學問該洽。能世其家。大定二十八年進士。時年已六十。意氣不少衰。歷諸王文學。應奉翰林文字。終於待制。党趙推挽之力爲多。以嘗入教宮掖。故集中多宮詞。

寒食不出

地偏無客過吾廬。寒食清明入燕居。驥子捧甌仍臘茗。孟光舉案只春蔬。蠅沾香篆渾傷字。蜂蹙瓶花半墮書。習氣未除還自笑。却將佳節付三餘。

黃筌雀蝶

飢雀喧爭蛺蝶孤。錦宮城闕見丘墟。老筌妙意誰知解。丹粉圖中有諫書。

宮詞

太一芙蓉上下天。秋波澹澹白生煙。採蓮宮女分花了。笑把蘭篙學刺船。

姑汾漫士王琢

琢字器之。平陽人。與毛牧達同時。相友善。天性孝友。爲鄉里所稱。酷嗜讀書。往往手自抄寫。家素貧乏。而能以剛介自持。未嘗有所丐貸。時命不偶。年四十五。以病卒。士論惜之。有姑汾漫士集行于世。所著中聖人賦。今世少有能到者。詩好押強韻。務以馳騁爲工。七月十五夜看月云。歷樹有驚鵲。悄鄰無吠厖。對雨云。春雨薄如夢。曉雲閑似愁。秋霖云。窗寒知氣重。人靜覺泥深。驟雨云。雹點撒冰彈。電光飛火繩。春陰云。庭澹梨花月。樓寒燕子風。久雨云。練挂遮簷直。麻懸到地齊。此類甚多。

元夜雪

寶燈樓閣澹連雲。轉眄俄驚糝玉塵。遊伎行歌俱失意。蔬畦麥壠自知春。良宵不肯平平過。造物應誇着着新。獨有中天端正月。一樽梅影屬閑人。

和張仲宗雪詩不用體物諸字

天人應卜歲。出此當佳占。舞巧穿幽隙。堆寒壓短簷。閉門誰擁篲。醉館自開簾。比興非無物。詩人正避嫌。

同漕使趙中憲對雪

投隙穿窗苦見侵。向無湘酎若爲禁。花多不入貧家眼。歲好方知造物心。躍馬共思追兔跡。抱戈誰與置羊斟。新詩與雪爭奇峭。擁褐空齋得細吟。

又一詩。南華夢好初飛蝶。聞苑春聞又落花。似勝前詩。恨終篇不能完好耳。

癸酉歲大熱

似動不動雲蒸空。欲雨未雨天無風。時時日脚蹴雲破。一射萬土紅爐中。纖絺挂體劇重鎧。大屋僅可爲樊籠。積冰爲丘坐自潰。輕簾況得微涼通。山林亦聞有暍死。城市偪側宜無容。吾生於熱亦屢度。此熱盡可并前鎔。雖然一氣播常令。頓作駭異疑非公。曾聞天南有祝融。出入毒霧騎雙龍。自從鼎去昧神怪。無乃煽處行心胸。手搖斗柄酌炎海。力逐燼怒乘離宮。喜爲鬱蒸怒爲火。流爍金石乾河洪。熾昌自欲弄朱夏。驕塞未肯官炎農。霞煙灼灼燥昏曉。鳥獸喘喘茫西東。此而不制滿三伏。遂恐百物隨枯蓬。太白之兵攢萬鋒。銀河之浪滔無窮。可洗虐焰夷姦凶。我欲呼慙煩神功。耽耽九虎天關重。

辛未九月二十一日雪

幾日西郊霧。連宵北牖風。菊花猶泛酒。雪片忽填空。草樹秋容失。河關曉氣濛。聽初疑落葉。仰不辨高鴻。爛熳三冬意。憑凌百圃功。披裘赴雞黍。掃徑惜籬叢。豈料玄英巧。來爭白帝雄。剪裁

渾草草。飛舞太忽忽。祇作干時令。非關兆歲豐。冬雷怪相似。春電冷應同。安得蛟龍蟄。何由翳
翳通。日華升赤壁。天色湛青銅。尚有登臨興。寧無賦詠工。煙霞狂醉嘯。一發醉顏紅。

雨夕感寓

漠漠初燈後。森森細點飄。繁聲入遙夜。冷簟悅秋宵。起欲吟相和。吁無客可招。何曾洗兵馬。但
覺漏薪蕘。雷電初無預。炎蒸遂不驕。瀉簷鏘未歇。欹枕兀無聊。澗已山輪潦。堤應水沒橋。長林
倦今夕。孤鳥撼驚條。似我纏憂戚。因貧墮寂寥。避人猶虺蜴。擇宿等鷓鴣。共世難曹禰。無才匹
管蕭。苦心還自笑。末俗本多譊。未老愁摧鬢。長飢帶臃腰。牀寒少陵被。飲陋子淵瓢。射策初游
漢。潛山敢傲堯。鹽車竟垂耳。風鶴忌干霄。一室元空掃。千鍾豈易要。芳蘭逼憔悴。尺鷃失逍遙。
字對諸生識。詩煩衆手瑀。搜求勞腎胃。夏擊謝咸韶。舊弄新絃掩。窮途拙目搖。爭爲壯夫篆。只
使古風澆。血指甘時巧。包羞愴道消。優游能卒歲。三四儘論朝。故幔幽霖透。長檠暗燼挑。不辭
牆出菌。儻見穀抽苗。壓飢貪夫腹。翻騰樂歲謠。晴樓交燕雀。涼樹沸蟬蜩。坐快虹蜺出。憂無萍
梗漂。浩歌彌激烈。興在海門潮。

呂中孚

中孚字信臣。冀州南宮人。孝友純至。迄今爲鄉人所稱。累舉不第。以詩文自娛。有清漳集行于

世。其賦紅葉云。張園多古木。蕭寺半斜陽。先君子甚愛之。

小景

青蕪平野四圍山。山郭依依紫翠間。村遠路長人去少。一竿斜日酒旗閑。

春月

柳塘漠漠暗啼鴉。一鏡晴飛玉有華。好是夜闌人不寐。半庭寒影在梨花。

水聲

長陂千頃碧淙淙。浪卷秋風過石缸。記得夜來愁聽處。一燈明滅照寒窗。

雪

隨風拂拂玉花飄。入夜寒窗更寂寥。爐火已殘燈未燼。一簾疎竹白蕭蕭。

送李嘉甫

信都令松甫之弟

溪水碧於草。溪邊送客行。寫詩傳別意。把酒聽歌聲。去路青天遠。歸心白羽輕。尊前折楊柳。一是離情。

寫懷

秦川西去遠。不意過漳川。歸夢三千里。羈愁二十年。謀生空白髮。行路若青天。餘事休相問。相

留只醉眠。

梨花

等待清明得得芳。圓枝晴雪煖生香。洗粧自有風流態。却笑紅深睡海棠。

集句

騷人吟罷起鄉愁。百感中來不自由。一種人間太平日。滿衣塵土避公侯。

柳

風外絲絲裊綠煙。輕花初破不成綿。却嫌官路逢寒食。惱亂離愁似去年。

王元節

元節字子元。弘州人。祖山甫。遼戶部侍郎。父詡。海陵朝左司員外郎。子元婿於南山翁。傳其賦學。第進士。雅尚氣節。不能從俗俯仰。故仕不達。既罷密州觀察判官。即閑居鄉里。以詩酒自娛。號遯齋老人。年五十餘卒。弟元德。亦第進士。有能名於時。終於南京路提刑使。

青塚

環珮魂歸青塚月。琵琶聲斷黑山秋。漢家多少征西將。泉下相逢也合羞。

與党世傑軍判丁亭會飲

望斷西州萬里家。又將新火試新茶。青油幕下成何事。兩見常山山杏花。

古鎮道中

秀拔諸峯鎮海墩。海天水氣兩昏昏。鷗飛翠竹白沙地。人宿黃魚紫蟹村。向背雲山行處路。淺深潮浦漲來痕。同游幸有能詩客。不倦躋攀到石門。

李端甫

端甫字濟夫。同州人。第進士。三王內恕及人勝仕爲平定州軍事判官。工于詩。有虎迹未乾溪水近。樵聲相

答嶺雲深之句。子實。字師白。死于壬辰之亂。

太白扇頭

巖冰澗雪謫仙才。碧海騎鯨望不回。今日霜紈見遺像。飄然疑自月中來。

楊澤州庭秀

庭秀字德懋。華州人。大定中進士。學詩於蘭泉張吉甫。有渴心曉夢江湖闊。醉眼春風草木低之句。泰和三年。刺澤州。致仕後。閑居鄉里。坐爲楊珪誣誤被法。士論冤惜之。

成皋道中

瘦馬成皋道阻長。嶢嶢冰雪老年光。九關欲上虎豹怒。三逕未歸松菊荒。崧少雲煙聊駐馬。漢唐

宮殿兩亡羊。鄭南嶺下梅花發。千里相思空斷腸。

李簡之蓮池集句

一月衰顏幾笑開。生前相遇且銜杯。蓮塘十里花如錦。有底忙時不肯來。

孫省元鎮

鎮字安常。絳州人。高才博學。嘗中省試魁。承安二年。五赴廷試賜第。以陝令致仕。年八十四卒。有注東坡樂府、歷代登科記行於世。弟寧州刺史錡。字安世。潘原令鉉。字安道。同榜擢第。鄉人榮之。號三桂孫氏。安常孫說思美。軍府參佐。安世孫處謙志全。安道孫蔚。今俱在。

許氏雙桂堂

許家二桂聯翩秀。孫氏三枝次第春。盛事若將相比並。輸君堂上拜雙親。

張著

著字仲揚。永安人。泰和五年。以詩名召見。應制稱旨。特恩授監御府書畫。

九日

雨沐天容霽欲流。好山誇翠出牆頭。黃花憔悴東籬晚。一段陶家冷淡秋。

雨後

西風無意嫋纖雲。掃盡千峯雨脚痕。一片秋光清似水。家家空翠滿柴門。

景覃

覃字伯仁。華陰人。年十八有賦聲。大定初。三赴簾試。後以病不就舉。博極羣書。有舉問者。立誦數百言不休。又從而講說之。爲人誠實樂易。不修威儀。隱居西陽里。以種樹爲業。落托嗜酒。醉則浩歌。日以爲常。作詩有功。樂府亦可傳。予同年進士王元禮。嘗從之學。說伯仁老不廢書。有勸以養目力者。曰。我輩非讀書則無所用心。要當死而後已耳。晚年於易有所得。年七十終于家。自號渭濱野叟。有集傳關中。

感事

蘭芳切禁當門種。李苦何傷並道生。自古英雄足猜忌。莫教身外有浮名。

段繼昌

繼昌字子新。白水人。自號適安居士。喜作詩。與華陰景伯仁相友善。家甚貧。而世間事皆不以挂口。有以錢遺之者。必盡送酒家。名酒曰黃嬌。蓋關中人謂兒女爲阿嬌。子新以酒比之。故云。一日天苦寒。人有遺之酒者。飲不盡而醉。夜半忽驚起。以衣衾覆酒缸。僵臥榻上。人爲言酒自不冰。先生將不爲寒所病乎。子新笑曰。人病尙可。酒病不可療也。其好飲如此。臨終辭鄉里。託以他

適。明日臥于党氏園亭大石上。視之已逝矣。伯仁弔之云。適安居士舊知聞。廓達靈根厭世紛。辭罷親朋便歸去。一籌今日又輸君。

梨花

一林輕素媚春光。透骨濃薰百和香。消得太眞吹玉笛。小庭人散月如霜。

一溪

一溪流水走青蛇。春在江邊漁父家。竹外寒梅看欲盡。清香移入小桃花。

春早二首

魚兒水泛鴨頭綠。野馬塵飛羊角風。西崦山家籬落背。杏梢初見一分紅。
斷冰銷盡荻芽尖。凍壠蘇來白薺添。幾片野雲飛不去。晚風吹作雨纖纖。

讀紀信傳

鹿走中原兩虎爭。滎陽圍解事堪驚。當時拔劍論功者。矢口何人說紀生。

岳行甫

行甫字仁老。鄜州洛川人。在關中最有詩名。泰和初。有以仁老時病詩達之道陵者。道陵大加賞異。授以官不就。士論高之。舊所傳沾泥柳絮燕銜去。鎖月梨花鴈喚開。本前人詩。又苦無佳致。

世俗識真者少。悞謂仁老所作。乃閩傳之。曾見仁老詩百餘篇。佳句甚多。續當就秦中好事家搜訪之。

謝人惠二小漆冠

規製新翻出杜郎。最宜閩子夜燒香。不爭寶髻峨宮樣。自與霓裳配道裝。細攏翠鬟雲易滿。淺銜牙櫛月難藏。水衡雙寄非無意。要買楊枝惱孟光。

立春日

銀線青絲翠椀堆。爭牛擊鼓欲驚雷。翻風鬪巧春頭勝。漉雪浮香臘尾盃。迎煖梢梢金着柳。逗寒葉葉粉飄梅。不成一事人空老。半百光陰又七迴。

迂齋先生周馳

馳字仲才。濟南人。經學出於醇德先生王廣道。賦學出於泰山李時亨。至於党趙。又其忘年友也。資性古雅。而以襟量見稱。大定中。住太學。屢以策論魁天下。私試亦頻中監元。家素饒財。鄉人強以子弟從之學。所得束脩。皆散諸生之貧者。貞祐之兵。濟南陷。不肯降。攜二孫赴井死。鄉人葬之宅後之壽樂堂。遼東人吳子英。嘗從仲才學。能記其所著亞父擲玉珥賦。及他文數篇。

箸詩

章廟御題。
限紅字韻。

矢束形何短。籌分色盡紅。駢頭斯効力。失偶竟何功。比數槃盂側。經營指掌中。蒸豚挑項鰓。湯餅拌油葱。正使遭讒口。何嘗廢直躬。上前如許借。猶足沃淵衷。

黻子

私盍反。支起也。

勿以微才棄。安危任不輕。誰憐一片小。能使四方平。几案由吾正。槃盂免爾傾。何當遇夷坦。沉默更何營。

此詩王仲澤所傳。或以爲仲澤作也。以其與周才仲詩意相近。姑附於此。以俟更攷。

劉太常鐸

鐸字文仲。冀州棗強人。承安五年進士。元光二年入爲太常博士。正大初改兵部員外郎。以武昌軍節度副使致仕。癸巳歲病歿于京師。自號柳溪先生。有集傳于家。武成王著作序。言文仲生未能言。已識百餘字。及授學。穎悟過人。爲人誠實。少許可。不徇流俗。不慕榮利。蓋實錄云。子敏中。字庭幹。亦學詩。今居洛中。

三陽述懷

蟻穴吾猶夢。蝸廬此僅容。一川青靄合。半嶺白雲封。地僻宜藏拙。閑官足養慵。只慚無補報。潦倒不歸農。

即事

亦在三陽時作。

地與中州迴。民餘上古淳。峽長深束渭。路險曲通秦。煙柳千家曉。風花百里春。一官如自擇。閑處着閑身。

澗池驛舍用苑極之郎中韻

慣從鞍馬作生涯。宿處依依認是家。爐火相看衣袖煖。盤飧未辦驛廚譌。淹留歲月頭如雪。汨沒風塵眼更花。永夜如何得消遣。新詩吟罷自煎茶。

春日

翠微深處幾人家。風颭輕煙雨壓沙。寒勒野桃開較晚。向陽才有兩三花。

所見

輪竿老子綠蓑衣。細雨斜風一釣磯。正是隣家社醕熟。柳條穿得錦鱗歸。

讀李訓鄴注傳二首

誰教閹宦作權臣。肅代優游到敬文。三子謀疎誰不道。泄機也合罪劉蕡。基賢入侍本防猜。偶失機權亦可哀。陳寶至今佳傳在。莫從成敗論人材。

李扶風節

節字正臣。涇州人。呂造榜進士。以詩名關中。資性滑稽。談笑有味。而臨事以幹局稱。歷威戎扶

風令。初名守節。哀宗即位。去守字。哀宗知其名。謂侍臣言。吾不欲人避上一字。李守節何故避之。良久曰。臣子敬君。避之亦可。正臣有詩云。梧頭打出和糴米。丁口簽來自願軍。讀之。則時政可見矣。

漁父

舉世從誰話獨醒。短蓑輕藉寄餘生。半篙春水世塵遠。一笛晚風山雨晴。稚乳滿船生事簡。魚蝦到市利源輕。旁人莫怪機心少。曾與滄洲白鳥盟。

有感

亂離何事最堪傷。孝子陵前段氏莊。鑄鐵作門貽鬼笑。堆金齊斗買天亡。春風草滿藏書壁。落日狐鳴打麥場。惆悵賢郎一丘土。過車腸痛獨難忘。

劉勳

勳字少宣。本出洛陽。元魏遷洛陽二十萬家實雲中。故其父祖而上爲雲中人。至少宣。客居濟南。樂其風土。遂占籍焉。少日。仕太學。與兄譙庭老。俱有聲場屋間。南渡後。專於詩學。往往爲人所傳。其先世本衣冠家。風流蘊藉。都無科舉氣。見于文字者亦然。嘗有詩云。萬里風沙憐病客。幾年刁斗厭寒更。人憐直道違時好。自喜閑身與世疎。擊筑漫流燕客淚。佩蘭誰識楚臣心。濟南云。午風襟

袖知秋早。甲夜闌干得月多。又云。船行着色屏風裏。人在回文錦字中。百和香薰風過處。萬盤珠落雨來時。此類甚多。少宣長於尺牘。落筆皆有可觀。其樂府如暮鴉庭院春陰淡之句。尤可喜也。

讀張仲揚詩因題其上

布衣一日見明君。俄有詩名四海聞。楓落吳江真好句。不須多示鄭參軍。

偶作

將軍馬躍五撾鼓。客子車行三唱雞。白髮書生無伎倆。滿窗紅日醉如泥。

杜善甫乞炭

筆口酸嘶解說窮。寒爐隨手變春紅。因君大笑涪翁拙。費盡奇香得馬通。

呈呂陳州唐卿

警盜何煩鼓夜撾。麗譙清晝卷高牙。春回和氣一千里。雪與豐年十萬家。逋賦稍寬新得帖。軍書不至早休衙。新年載酒須行樂。次第東風遶郡花。

秋涼

桃笙乘勢獻微涼。紈扇無功送暑光。老病不嫌風露冷。莫教添作鬢邊霜。

愛詩李道人崧陽歸隱圖

脫却儒冠已自閑。更令家事勿相關。百錢便掛青藜杖。不看先生紙上山。

元夜陰晦

逐逐雕鞍趁畫輪。年芳樂事一番新。芙蓉城煖東風夜。楊柳樓深笑語春。兩鬢愁添新白雪。十年夢到軟紅塵。空庭不見梅花月。寂寞春陰最惱人。

傷曹吉甫之死

官職雖低首不低。爭教有志竟空齋。向人指畫將何語。臥筆糊塗不解題。小女繞床猶戲劇。老兵伏地亦悲啼。春風繫馬庭前樹。只想東齋醉似泥。

同趙宜之賦梨花月

雪樹生香淡月邊。相媒相合鬪清妍。空庭冷落秋千影。虛度良宵亦可憐。

不寐

酪奴作祟攪秋眠。追咎前非四十年。一夜蟲聲相計會。併催白髮到愁邊。

戲鄭秀才

張老豆新頻見餉。鄭家米鑿不須賒。客來粥熟吾能辦。要與齊奴鬪咄嗟。

春日

粉蝶耽香夢正迷。黃蜂和蜜計何癡。小軒無事誰如我。臥看楊花點硯池。

答仲和

此身安處苦難尋。常羨歸鴉易滿林。望遠真成廣武嘆。得詩空作洛生吟。逢人放適村村酒。感物悲哀歲歲心。想得濟南花正好。抱城春水一篙深。

李澥

澥字公渡。相人。少從王內翰子端學詩。能行書。工畫山水。就所長論之。詩爲長。性寬緩。笑談有味。居京師十五年。日遊貴人之門。所至以上客延之。善處世。不爲人所忌疾。雅有前輩典刑。累舉不第。年六十餘。卒於通許陳留之間。

漫書

胸懷平日窗八達。伎倆只今龜六藏。唯有閑情如老菊。寒華自信晚能香。

二老雪行圖

雪明萬仞鄴西山。杖屨平生幾往還。滿眼京塵空對畫。何時真似兩翁閑。

秘書張監墨梅圖

張南人

眼中只有梅千樹。不挂世間蜂蝶花。十載江南春夢斷。至今清影在君家。

燈下梅影

丁年夜坐眼如魚。老矣而今不讀書。牆角短檠還有用。瓦餅相對一枝疎。

秦略

略字簡夫。陵川人。父事軻。有詩名。工作大字。簡夫少舉進士不中。即以詩爲業。詩尙雕刻。而不欲見斧鑿痕。故頗有自得之趣。悼亡一詩。高出時輩。殆荆公所謂看似尋常最奇崛。成如容易却艱難者耶。年六十七卒。臨終留詩云。軀殼羈棲宅。兒孫邂逅恩。雲山最佳處。隨意着詩魂。簡夫自號西溪老人。有集行于世。子彥容。爲黃冠師。今在平陽。

拳秀峯

平滑石之俗。其俗資磨礱。磊醜石之秀。其秀在醜中。正如古丈夫。貌寢氣質雄。又如聖人心。孔竅虛明通。大都一拳許。含蓄華與嵩。大巧本若拙。足見造化功。好處元更多。摹寫不易工。君其善調護。抵擊防兒童。

雪行

正馬東來冰雪天。蒼山手冷墮吟鞭。煙中髣髴聞雞犬。不覺人家到眼前。

鳥影過寒塘

着眼分明莫作疑。從來形影本同歸。不應水底青天上。更有飛禽仰面飛。

悼亡

自古生離足感傷。爭教死別便相忘。荒陂何處墳三尺。老眼他鄉淚數行。多事春風吹夢散。無情寒月照更長。還家恰是新寒節。忍見堂空紙挂牆。

元日

新曆從頭數。殘冬與我遠。不知垂老至。但覺拜人稀。汲水泥融井。看書煖入幃。淺情牆外柳。新綠已依依。

贈趙宜之

年時見君行路難。喜於長安新得官。日來見君鄰婦哭。驚似藍田尋得玉。愛官愛玉樂有涯。愛君之詩無盡期。古人骨冷不復作。主張騷雅非君誰。

白髮

臨水時自照。照我須與眉。須眉何所似。恰似純白絲。從茲一白後。寧有再黑時。譬如花落地。不復還故枝。殷勤語須眉。聽我自解詩。幼小癡讀書。既壯多憂思。自苦有冰蘖。自潤無膏脂。勞生到今日。汝白將何辭。

同希顏裕之賦樂真竹拂子

覓箇龜毛抵死難。直教擊碎釣魚竿。世人不用生分別。信手拈來總一般。

少室山卓劍峯

神威洗盡世間讎。電歇雷閑怒氣收。一柄太阿留少室。却擎空掌華山頭。

此身

此身日日一簞貧。貧裏留殘自在身。獨把筇枝行又立。東風花柳不嗔人。

穀靡靡。上黨公府作

穀靡靡。青割將來強半糲。急忙舂米送官倉。只恐秋風馬塵起。官倉遠在蕎麥山。南梯直上青雲間。梯危一上八九里。之字百折縈迴環。憑誰說向監倉使。斛面莫教高一指。請君沿路看擔夫。汗顆多於所擔米。

霽香

山麝逃風遠谷藏。一山行過四山香。臍堂自養千鈞弩。枉怨虞人鼻孔長。

趙洛道中

柔青初散壠頭桑。村落人家布穀忙。一段蕪菁渾着角。葉間猶有幾花黃。

張琚

琚字子玉。河中人。父鉉。字鼎臣。大定中。第進士。仕至同知定國節度使事。子玉刻意於詩。五言其所長也。如初至華下云。老雨梧桐夜。孤燈蟋蟀秋。客同州云。秋風留客館。夜雨借僧氈。詩人喜稱道之。至有張五字之目。集號韋齋。

移河中

耕戰連年廢。吾知有此行。條山猶在眼。渭水若爲情。飽肉豺狼喜。傾巢燕雀驚。西樓今夜月。愁絕是空城。

秋夜

人與年華老。愁兼節物雙。高風梧墮砌。久雨竹侵窗。客簟悲秋臥。僧鍾數夜撞。更堪衰鬢影。蕭颯照寒缸。

馬編修天來

天來字雲章。人止謂之元章。介休人。黃裳榜經義進士。博學多技能。畫入神品。百年以來無出其右者。屏山常言天下辯士有三。王仲澤、馬元章、純甫其一也。元章住太學十九年。貧苦之極。人所不能堪。然其談笑自若也。大安初。調潁州司候靈壁簿。召爲國史院編修官。正大九年病歿於

京師。年六十一。劉紹宣有贈詩云。波瀾口頰談玄駛。土木形骸與世違。疇昔麻鞋見天子。只今道服勝朝衣。蓋實錄也。元章多作詩。欲別出盧仝、馬異之外。又多用俳體作譏刺語。如云。木偶衣冠休嚇我。瓦伶口頰欲謾誰。嘴骨取肥屠肆狗。哺糟得醉酒家豬。如此之類。不得不謂之乏中和之氣。至其賦丹霞下寺竹云。人天解種不秋草。欲界獨爲無色花。雪云。夜來窗外潭疑月。今日牆頭不見山。末云。先生睡起騎驢看。太素一游非世間。龍門云。白含雲竇雪。青補石門天。則知詩者。亦當以功揜過耳。

山中

青林寂寂鳥關關。畫出風煙落照間。脫却草鞋臨水坐。野雲分我一邊閑。

張內翰本

本字敏之。觀津人。貞祐二年進士。工於大篆及八分。四十歲後學詩。詩殊有古意。正大九年。以翰林學士從曹王出質。客居燕京長春宮將十年。後游濟南。病卒。

得王子正書

晨鵲何處來。飛鳴向前除。故人在天涯。遺我尺素書。爲言長相思。夢寐同所居。所居亦廢他。上論揖讓初。覺來獨愴然。淡月留太虛。蹇子臨末路。世味皆泊如。一學未敢輟。尙念客氣鉏。切磋

與琢磨。政恐朋友疎。自從吾子東。門乏長者車。發揮天人奧。大辯孰起予。丹陽何高明。吾子昔所廬。南軒拂翠筠。北潭照紅葉。蝗害非不虐。子食豈無餘。溱江固自佳。何堪曳長裾。春風旦夕至。歸哉莫踟躕。

寄弟

離離丘壠田。鬱鬱霜露思。相隔二十年。旦暮一何悲。中途涉萬里。天幸復來歸。燕安此懷居。愧彼神與祇。叔兮孝且友。見義能不疑。上念先塋孤。亦閔乃兄癡。護喪營大葬。勤苦我所知。昨朝尺書來。殷勤咸及茲。燈下展轉讀。涕淚沾裳衣。父耐失臨穴。子焉庸我爲。我非羽毛寄。飽食冥然飛。田居有素懷。行當事奮苗。與子奉遺祀。沒身以爲期。

梁都運斗南新居落成

購材燕市中。作室何翹翹。老手爲拮据。百日不敢驕。室成僅容膝。勃谿益無聊。云胡寫予懷。惟是風雨宵。先生名大夫。黼衣華四朝。楓堂接桂室。燕處俱逍遙。新築誠瑣兮。貧飲稱一瓢。居之不自陋。無乃壯志消。孰知君子心。一念恆萬朝。滔滔寧我盈。凜凜不吾凋。處樂及處約。所以長翬。里社來落成。賤子亦見招。盤飧無兼味。至樂等聞韶。我獨何人斯。永惟德音昭。日居及月諸。維此心搖搖。

中秋雨夕呈君美

怪得秋雲不肯晴。天公爲惜此杯傾。無邊清景關人意。多事西風送雨聲。桂樹婆娑辜勝賞。桐枝點滴厭殘更。殷勤朝鏡休重攬。白髮星星又幾莖。

九日月中對菊同禧伯郎中賦

六首

花上清光花下陰。素娥惜此萬黃金。一杯寒露三更後。誰信幽人更苦心。

九日餘香伴月明。一觴亦足暢幽情。青樓夜半琵琶語。不說人間有此清。

子山牢落去江南。賦主悲哀尙一堪。只恐秋天閒亦苦。併催紅雨下霜巖。

庾信哀江南賦。唯以悲哀爲主。

病魂招得未渾全。暝倚秋屏豈是禪。一夢忽成霜蝶去。草深三逕若爲眠。

鬼化斯文念賈生。精神瑤琢坐寒更。一書草就渾衣臥。恨煞東方不肯明。

龍山戲馬賞秋光。多少新詩入錦囊。磨滅英雄豈勝數。千年依舊一花香。

申編修萬全

萬全字百勝。高平人。兄無夷。字百福。崇慶二年進士。百勝少有聲太學中。貞祐二年乙科。調福昌簿。不赴。隱居盧氏山中。以讀書爲業。作詩有靜功。然不多見也。正大中。召爲史館編修。從行省慶山南征。道中有詩云。回首秋風謝敝廬。崎嶇又復逐戎車。人生行止元無定。一葦江湖縱所如。

不數日溺水死。人以爲讖云。

病中遣懷

浪走天涯歲月侵。病中猶作越人吟。野麋本自便豐草。倦鳥寧當忘故林。畫像功名元有命。乞墀富貴果何心。幾時真脫塵囂累。巖穴尋居不厭深。

和陳舜俞詩

閭裏那容更刺頭。石田茅屋喚歸休。杜門便與詩書老。過隙從教歲月流。槩木見容良自媿。錯刀相贈若爲酬。酌君安得如川酒。醉眼虬蟬萬戶侯。

崔遵

遵字懷祖。北燕人。父建昌。字曼卿。大定二十五年進士。仕至同知武安軍節度使事。懷祖事繼母孝。與人交有終始。遲重少語。未嘗及人短長。少日在太學。有賦聲。南渡後。不就舉選。居崧山二十年。課僮僕治生。生理亦粗給。前輩如趙吏部子文。張左丞信甫。馮亳州叔獻。或懷祖丈人行。皆與之詩酒相往來。懷祖喜賓客。有蘊藉。從容文雅。使人久與之處而不厭也。嘗有宿少林詩云。青山已有十年舊。小雪又爲三日留。其他往往稱是。

送裕之官鄧下兼簡仲澤

青燈別酒夜沉沉。力負相思自不任。閑裏更誰留我醉。興來無復伴君吟。一枝仙桂知難擬。千頃黃陂未厭深。爲向荊州王粲道。安排佳境約相尋。

和裕之二首

行李西來便得君。相從回首七經春。君方備悉原思病。我亦私憐仲父貧。底事却成今日別。枯腸難着此愁新。鳶肩火色真將驗。馬虎何勞更問辛。

不幸還能作幸民。十年同醉潁川春。酒船載我雖堪老。仕路有時或爲貧。少室山人三日惡。夷門紙價一番新。益知哀樂終年事。未唱驪駒鼻已辛。

王主簿革

革字德新。一名著。臨漢人。以蔭補官。碌碌筦庫餘三十年。正大中。以六赴廷試。賜出身。調宜君簿。爲人有蘊藉。善談笑。密公與之唱酬。相得甚歡。初在太原作詩。有赤心遭白眼。笑面得噴拳之句。公甚愛之。有詩寄之云。柳塘雲觀千鍾酒。笑面噴拳五字詩。蓋志此也。及第後。呈同年云。孤身去國五千里。一第遲人四十年。大爲閑閑公所稱。德新交游滿天下。獨許欽叔與予爲莫逆云。年七十八。終於雲中。

寄答劉京叔

十年相望惜睽違。驚見蘭章墮客扉。鄭子已聞耕有谷。榮公誰念老無衣。水浮落日流無盡。山礙行雲斷不飛。千古神川亦吾土。幾時同采北山薇。

衛承慶

承慶字昌叔。襄城人。父文仲。承安中進士。以孝友淳直稱於鄉里。官至文登令。年七十餘卒。臨終沐浴易衣冠。與家人訣。怡然安坐。誦東坡赤壁樂府。又歌人間如夢以下二句。歌闕而逝。昌叔資冲澹。有父風。及識路宣叔王逸賓文伯起。故其詩似之。

感興

十日不出門。出門春已好。並山花更多。十里紅未了。朝看花尙妍。暮看花又老。薦紅墮危枝。餘香寄芳草。人生祇如此。百年疾過鳥。安得脫塵寰。遊戲萬物表。

劉昂霄

昂霄字景玄。別字季房。陵川人。父俞。字彬叔。明昌二年進士。仕爲承發司管勾。泰和中。予識景玄於太原。人有言是家讀廣記半月能背誦者。予未之許也。戲取市人日曆鱗雜米鹽者。令讀之。一過目無脫遺。大率景玄之學。無所不闕。六經百氏外。世譜官制。與兵家所以成敗者爲最詳。爲人細瘦。似不能勝衣。好橫策危坐。掉頭吟諷。幅巾奮袖。談辭如雲。四座聳聽。噤不得語。故評者

謂承平以來。王湯臣論人物。李之純玄談。號稱獨步。景玄則兼衆人之所獨。愈叩而愈無窮。不知去古談士爲遠近。餘子不論也。嘗用門資叙。調慶陽軍器庫使。不就。諸公方薦試宏辭。而景玄病不起矣。臨終。夢賦山泉云。帶雲縈遠澗。和月到疎林。又云。萬里馮唐老。中年賈傅歸。未幾下世。年三十七。

中秋日同辛敬之魏邦彥馬伯善麻信之元裕之燕集三鄉光武廟。諸君有詩。昂霄亦繼作積甲原頭漢闕宮。登臨還喜故人同。超超萬里乾坤眼。凜凜千年草木風。今古消沉詩句裏。河山浮動酒杯中。極知勝日須轟醉。更得銀盤上海東。

趙村晚望

放眼東原上。風煙接渺茫。林疎出村落。野迴散牛羊。天地浮元氣。山河半夕陽。登高一長嘯。未覺阮生狂。

送裕之往洛陽兼簡孫伯英

洛水崧山壽樂堂。每從熱惱得清涼。竹床石枕應無恙。尙可分風供十方。

題裕之家山圖

萬里神州劫火餘。九原夷甫有餘辜。作詩爲報元夫子。莫倚家山在畫圖。

同敬之裕之游水谷。分韻賦詩。得荷風送香氣五字。各賦一首

招提有勝踐。日暮一經過。何物媚游人。微風動池荷。

尋幽意自愜。況與佳人同。俗物不到眼。談笑來天風。

敲門看脩竹。重理舊年夢。上山復下山。清風管迎送。

寒泉漱雲根。湛然涵鏡光。雖知一滴味。中有曹溪香。

迂辛與臞元。得句猶有味。頽垣歛暝色。深竹貯秋氣。

腹色。敬之句。秋氣。裕之句也。

寄申伯勝三首

直氣南山相與高。爭教塵土浣青袍。征科頗似曾料理。差勝參軍作馬曹。

孰版那能拜下風。世間禮數困英雄。狂歌醉舞人誰識。憔悴通泉郭代公。

連昌能隔幾牛鳴。不見令人鄙客生。乘興時思一相訪。劇談豪飲見真情。

游五渡谷

南山如碧環。缺處蒼崖開。當年造物手。辦此何神哉。睥睨倚天壁。千古封莓苔。源源萬斛泉。飛出重山來。白龍三百丈。行處鳴春雷。巨石若棟宇。磊砢相推排。跳波與濺沫。餘怒猶喧豗。我來

值杪秋。萬壑風聲哀。黃花雜紅樹。錦繡紛巖隈。奇勝夙所貪。欲去仍裴回。題詩還自笑。媿我非仙材。

田紫芝

紫芝字德秀。滄州人。父齊。以蔭爲部掾。德秀少孤。養於外家定襄趙氏。故多居於忻。年十三。外祖廣寧治中命賦麗華引。語意驚絕。人謂李長吉復生。資性穎悟。一覽萬言。年二十。讀經傳子史幾徧。爲人疎俊。而以蘊藉見稱。與同郡王元卿齊名。貞祐初。避兵臺山。倉卒爲游騎所馳。遇害。時年二十三。士論惜之。

夜雨寄元敏之昆弟

時年十六。

醉夢蕭森蝶翅輕。一燈無語夢邊明。虛簷急雨三江浪。老木高風萬馬兵。枕簟先秋失殘暑。湖山微曉看新晴。對床曾有詩來否。爲問韋家好弟兄。

亂後登凌雲臺

愁思紛紛不易裁。凌雲臺上獨裴回。亂鴉背着斜陽去。寒雁帶將秋色來。破屋無煙空碎瓦。新墳經雨已蒼苔。天翻地覆親曾見。信得昆明有劫灰。

冥鴻亭下第後作

眼底功名一物無。飛揚跋扈竟何如。青雲歧路多辛苦。賴得皇家結網疎。

王萬鍾

萬鍾字元卿。秀容人。父甫。字用之。通經史。淳質有儒行。亦以知醫見稱。兄萬石。字器玉。住太學。有賦聲。用之妻死不更娶。二子俱無家室。井臼之事。率親爲之。貧居陋巷中。破屋蕭然。不蔽風雨。而絃誦之聲不絕也。元卿少有逸才。讀書有後先。不欲速成。詩文閑適。似其爲人。客至。清談終日。人不敢以俗事浼之。與同郡田德秀齊名。號王田。評者謂規製宏博。王不及田。而瀟灑無塵土氣。田亦非王比也。元卿嘗有詩寄予關中云。千里呂安思叔夜。二年社燕伴秋鴻。賦梅花云。漢宮月下三千額。好在春風一抹痕。哭吾兄敏之云。蘭逕水流三月暮。桂林風落一枝春。古詩尤蕭散。有自得之趣。兵火中皆亡失之矣。初。用之聞北兵入塞。即以吾州爲不可守。去之太原。五年不敢歸。貞祐二年州破。死者十餘萬人。而用之亦以是日病歿於太原。較其時皆三月三日巳時也。人謂用之先見固可釋。然生死定數。亦自不能免云。元卿父歿之後。與其兄居于平晉之金城里。明年。兵復至。兄被害。元卿欲收葬之。時游騎充斥。親舊勸勿往。元卿持不可。曰。兄死不收。留此身欲何用耶。流涕而去。尋亦被禍。時人甚哀惜之。元卿長子一月。死時年二十七矣。

春宵

風尖月細春猶淺。酒冷燈昏夜向深。人在西軒愁不寐。十年間事總經心。

元氏桂軒爲敏之賦

簾捲堂前桂子涼。一軒燈火夜初長。月中春好元無價。天上風來別有香。棠棣一家同映秀。詞林百世繼餘芳。閑花野草空無數。掩盡人間獨擅場。

江村風雨圖

秋風撼撼澹林暉。煙靄昏昏失翠微。一段蓴鱸江上興。蓬窗岑寂夢魂飛。

雷琯

琯字伯威。坊州人。以薦書從事史館。調八作司使。博學能文。時輩少有及者。并州人李汾。與伯威同在史館。以高蹇得罪。伯威作詩送之。頗譏翰林諸人。不能少忍。至與一書生相角逐。使之狼狽而去。有郎君未足留商隱。官長從教罵廣文之句。又云。明日春風一杯酒。與君同醉信陵墳。人甚稱之。

信陵館酒間二首

閑過信陵飲。有懷信陵君。君去日已遠。誰憐抱關人。徑攜一壺酒。往酌公子墳。墳科久已平。墓木幾爲薪。泉扉鎖長夜。千載不復晨。昔與賢俊游。今爲狐兔隣。豪貴竟安在。念之心紛紛。有生

會歸盡。但恐後無聞。此意不可必。且醉梁園春。

維昔有迂叟。樹桐彼高岡。殷勤爲封植。遂欲棲鳳凰。桐生日已長。鳳未殊未央。維鳳覽德輝。非時詎來翔。枝幹枯以死。志願終莫償。憶在西周初。飛下岐之陽。裴回不能去。和鳴聲鏘鏘。文王旣已沒。千載徽音亡。咄爾叟何爲。而欲發其光。空令枯株上。日晏啼鶯鶯。

客有自關輔來。言秦民之東徙者。餘數十萬口。攜持負戴。絡繹山谷間。晝食無糗糒。夕休無室廬。飢羸暴露。濱死無幾。間有爲秦聲寫去國之情者。其始則歷歷而宛轉。若有所訴焉。少則幽抑而悽厲。若訴而怒焉。及其放也。嗚嗚焉。悵悵焉。極其情之所之。又若弗能任焉者。噫。秦予父母國也。而客言如是。聞之悲不可禁。乃爲作商歌十章。倚其聲以紓予懷。且俾後之歌者。知秦風之所自焉。

扶桑西距若華東。盡在天王職貢中。一自秦原有烽火。年年選將戍河潼。春明門前灞水濱。年年此地送行頻。今年送客不復返。卷土東來避戰塵。盡室東行且未歸。臨行重自鎖門扉。爲語畫梁雙燕子。春來秋去傍誰飛。灞水河邊楊柳春。柔條折盡爲行人。只愁落日悲笳裏。吹斷東風不到秦。桑桑老稚自相攜。側耳西風聽馬嘶。百死纔能到關下。仰看猶似上天梯。

上得關來似得生。關頭行客唱歌行。虛巖遠壑互相應。轉見離鄉去國情。
前歌未停後迭呼。歌詞激烈聲鳴。天下可能無健者。不挽天河洗八區。
折來灞水橋邊柳。盡向商於道上栽。明年三月花如雪。會有好風吹汝迴。
行人十步九盤桓。巖壑縈迴行路難。忽到商顏最高處。一時揮淚望長安。
西來遷客莫回首。一望令人一斷魂。正使長安近於日。煙塵滿目北風昏。

陽夏懷古

短衣匹馬西北來。十年去國隨風埃。解鞍呼酒歌一曲。玉鞭倒捉敲金壘。
君不見項王臺。昔時崔嵬今已頽。秋風蕭瑟吹草萊。又不見漢王城。昔時嵒嵒今已平。
寒煙寂寞啼颺猩。牧童擡頭學楚聲。野老扶犁城上耕。耕勢不斷楚聲哀。行人欲去還徘徊。
劉項英雄安在哉。人間俯仰易陳迹。聞身健在須銜杯。

龍德宮

紫簫吹斷彩雲歸。十二樓空盡玉梯。綵仗竟無金母降。仙裾猶憶化人攜。
千年洛苑銅駝怨。萬里坤維杜宇啼。莫倚危欄供極目。斜陽更在露盤西。

南國

南國春生江水肥。烏檣風扇錦帆歸。吳兒日暮棹歌發。驚起鴛鴦相背飛。

古意四首

美人傷獨宿。窈窕春閨深。素手卷翠被。當窗調玉琴。危絃奏苦調。清歌抗哀音。絃絕歌復咽。起作薄命吟。妾如朱槿花。含英愁晏陰。郎如青銅鏡。照面不照心。不怨不照心。但惜飛光沉。且留連理枕。莫捲合歡衾。儻君回餘輝。歡盟尙可尋。

對酒不能飲。拊劍自度曲。一唱行路難。歌與淚相續。朝爲楊朱泣。暮作阮籍哭。古道盡荆棘。新蹊苦薺蕞。曲行違吾心。直行傷我足。曲直無適從。昂頭羨鴻鵠。

綿綿菟絲草。濯濯檉樹枝。結根偶相值。引蔓纏綿之。春風一披拂。柯葉含榮滋。弱質附美蔭。百齡誓不違。清商忽用事。霜飈颯已淒。豈意百尺條。同此寸草萎。委蔓失所託。憔悴徒傷悲。知君無歲寒。何用相因依。

賢王悲墜屢。賢婦念遺簪。重在不忘故。微物何所欽。嗟我昔游友。雲路揚徽音。詎念宿昔好。棄擲各飛沉。昔如膠投漆。今如辰與參。桃李雖成蹊。諒無松柏心。

王亳州賓

賓字德卿。亳社人。貞祐二年進士。由虹縣令入爲尙書省令史。壬辰。京城受圍。亳州爲單父軍楊

春所據。春以事出。德卿與故譙縣尉王進反正。朝廷授進集慶軍節度使。德卿同知使事。明年夏六月。車駕幸蔡。道出于亳。德卿逆謁。上與語。慰勞者久之。詔行六部尙書事。仍賜世爵。後數日。部曲崔七輩。以軍食不給送款。執德卿與副使呂鈞往市中。鈞且行且拜。泣涕不休。德卿毅然無所屈。大呼曰。但殺但殺。不能從汝也。是日遇害。德卿學詩甚力。故所得亦多。如風生傳令箭。星落受降城。煙外暮鐘催倦馬。林間殘照聚歸鴉。倉小軍爭米。村荒虎食牛。又贈剛上人云。楞嚴讀罷爐煙冷。澹坐山堂閱世人。言懷云。功名不到書生手。坐撫吳鈞惜壯圖。題馬丘寺壁云。落葉擁窗僧入靜。孤燈穿屋客吟秋。人甚稱之。

衛真道中

毳袍落托又西征。陌上東風小雪晴。草色換回原燎黑。冰漸消入水痕清。年華荏苒心情減。邊事倉皇夢寐驚。早晚渦南傳吉語。一犁煙雨趁春耕。

舟中

河伯夸秋漲。舟人健晚涼。櫓聲搖落月。山氣鬱蒼蒼。

除夜

落托功名挽不前。圍爐兀坐夜蕭然。臘殘畫角東風裏。春到梅花小雪邊。守得歲來慵攬鏡。送將

窮去自裝船。平明點檢人間事。只有詩魔似去年。

李夷

夷字子遷。後改名賦。宛丘人。苦於作詩。賦古鏡云。盤盤古皇州。夢斷繁華歇。一鞭春事忙。耕出壠頭月。土蝕背花昏。蹄涔駭龍躡。須髯怒欲張。縮手不敢捫。又云。壽光閨人多。曾有此客否。欽叔諸人甚愛之。

贈國醫張子和

禁籞喧喧以字行。粗工往往笑狂生。天將借手開金匱。雲本無心到玉京。歌嘯動成千日醉。留連翻厭五侯鯖。祝君莫觸曹瞞怒。世上青黏要指名。

古劍

古柵崖摧老雨天。忽驚神物茁蒲然。蛇吞元氣蟄千載。龍逐奔霆脫九泉。逆首未歸豪賊裏。缺歌聊發慨彈邊。物猶屢出爲時用。撫匣潛然惜壯年。

書淵明傳後

南渡龍孫角禿顛。不甘橫斃寄奴弦。一襟義氣麾周粟。滿簡清風削宋年。雪徑低迴松落落。霜籬健羨菊鮮鮮。時屯謚輩輕頽節。顏厚吾家草木賢。

郭邦彥

邦彥字平叔。本鄆縣人。僑寓陽翟。遂占籍焉。興定五年進士。調永城簿。以退讓見稱。生世不幸。處于頑聒傲三者之間。鬱鬱不自聊。年未四十而死。寄庵先生愛其詩。甚嗟惜之。

秋夜聞彈琵琶

露重花香飄不遠。風微梧葉落無聲。倡樓何處教新曲。夜靜月高弦索鳴。

村行三首

棗花初落路塵香。燕掠麻池乍頽頽。一片雲陰遮十頃。賣瓜棚下午風涼。
芹葉蘆花岸兩邊。釣溪石畔落孤鳶。小畦引入平流水。麻桿森森已拍肩。
豆葉芄芃麻葉光。植禾得雨又催黃。田家樂事誰真得。牧子行歌醉叟狂。

酒醒

少年驕氣總消磨。萬事紛紜夢裏過。三載自持葷食戒。一心還被性宗魔。凌煙閣上榮名好。聚窟洲邊樂事多。今日酒醒都忘却。亂吟俳語作狂歌。

讀毛詩

含氣有喜怒。觸物無不鳴。天機泄鳥迹。文字從此生。誰言土葦器。聲合天地清。樸壤犧氏瑟。巧

露蝸皇笙。末流不可障。聲律隨合并。徧讀蕭氏選。不見真性情。怨刺難譏罵。名曰離騷經。頌美獻諂諛。是謂之采銘。詩道初不然。自是時代更。秦火燒不死。此物如有靈。至今三百篇。殷殷金石聲。漢儒各名家。辯口劇分爭。康成獨麾戈。諸儒約連衡。祭酒最後出。千古老成精。我欲讀爾雅。不辨螯蟹名。尚憐沈謝輩。滿篋月露形。孔徒凡幾人。入室無長卿。三子論性命。舉世爲譏評。白首草太玄。才得覆醬罍。不如匡鼎說。愈笑人愈聽。

史學

學字學優。延安人。兄才。字才長。住太學有聲。學優正大中。省試第一人。釋褐舞陽簿。辟盧氏令。卒官。妻李氏。國初河南尹成之孫女。小詩殊有思致。學優嘗客京師。有所眷。久而不歸。李作詩寄之云。百年風樹底。誰淚到君前。學優得詩。即日命駕。

陪陳彥丈謁筠泉鑾上人

才長

強隨禪客到西禪。竹柏圍青蔭石泉。一首小詩吟不就。閑情元在落花邊。

宮詞

學優

寶帶香襟水府仙。黃旂綵扇九龍船。薰風十里瑤華島。一派歌聲唱採蓮。

默翁溪山橫幅

默翁。龍都運才卿自說。

五雲雛鳳下遼天。來作金鸞翰墨仙。詩酒債殘鶯館債。簡書薰破鹿門禪。自憐歲月塵中老。盡攬溪山筆底傳。短草疎林秋一幅。典刑人物記當年。

李道人崧陽歸隱圖

石壁城頭夜斬關。軟紅塵底曉催班。道人一笑那知許。門外清溪屋上山。

晚梅

孤根春半恰春回。剛逐夭桃豔杏開。蝶子蜂兒應有語。東風元不爲渠來。

七夕

箱牛迥馭錦機閑。天上悲歡亦夢間。月夜並肩人不見。蕭蕭風葉滿驪山。

醉後

觀魚暫覺心差樂。化蝶元來夢亦忙。得似醉中都放下。春風自與百花香。

過太室

三輔祥開表聖期。三呼天壽與天齊。殿棲碧瓦仍唐制。洞鎖蒼苔失漢題。柱玉已聞安廟祐。劍鋒

重爲剪撐黎。升中剩有辭臣賦。滿望鸞旂鳳蓋西。

玉柱卓劍。二峯名。

侯冊

冊字君澤。以門資仕。與杜仲梁、張仲經、劉京叔游。用是得名。嘗作樂府云。玉堦春草傷心碧。錦瑟華年過眼空。又云。千金買斷青樓月。爛醉桃花扇影風。人多愛之。壬辰歲。病京師園中。作詞云。迴首鳳凰城下路。人不見。月茫茫。明日君澤死。其後京城亦丘墟矣。

寒食

交游零落葉辭柯。歲月崢嶸馬注坡。燕子不來寒食過。滿城風雨落紅多。

醉中

爛醉歸來驢失脚。破靴指天冠倒卓。起來白眼望青天。狂氣崢嶸無處着。陶潛止酒意有在。餽糟醲良未害。君看謝奕對桓溫。得失老兵何足怪。螟蛉蜾蠃待二豪。飲中寧有山家濤。平明徑訪陳驚坐。相對春風把蟹螯。

學古體

桐風吹月烏啼井。蟾波濕露沉雲影。素絲牽玉轉泉華。美人睡覺燕支冷。銀鈎掛簾北窗曉。翠鬢臨鏡雙鸞小。黃衫少年望不來。寂寂庭堦滿春草。

昨朝

昨朝已作春歸辭。今日還成送客詩。客子春光俱不見。落花寂寂閉門時。

楚宮

離宮樓閣與天通。暮雨朝雲入夢中。回首舊時歌舞地。女蘿山鬼泣秋風。

王元粹

元粹字子正。初名元亮。後止名粹。平州人。系出遼世衣冠家。年十八九。作詩便有高趣。性習專固。世事不以累其業。故時輩無能當之者。正大末。用門資叙。爲南陽酒官。遭亂。流寓襄陽。襄陽破。隻身北歸。寄食燕中。遂爲黃冠師。有十月風霜侵病骨。數家針線補殘衣之句。親舊有憐其孤苦。欲爲之更娶者。子正業已高舉。主太極道院。竟不能自返。年四十餘。癸卯九月病卒。詩人淄川楊叔能挽之云。匹婦主中饋。雖貧生理存。五言造平淡。隻影臥黃昏。謾下陳蕃榻。虛沾文舉尊。北平家世絕。銜恨入荒原。從弟鬱。亦攻詩。方之其兄。蓋商周矣。

春日

時年十八

春日何慘慘。春雲何陰陰。桃李都未花。況乃餘寒侵。久在城市居。而無人見尋。讀易了一編。靜見天地心。貧士寡徒侶。古來非獨今。

臨高

客子臨高秋思生。碧山無際暮雲橫。但看八月草木落。未見中原塵盞清。流景暗徂人易老。故園

何在夢頻驚。樽中有物同誰盡。正要相看醉膽傾。

葉縣贈李長源

相見各異縣。歲暮風霜清。三日同眠食。深見故人情。借問何所歷。大梁與秦京。悠悠川途永。冉冉歲月傾。子當東北馳。予亦西南征。人事相羈束。何時當合并。聊斟昆陽酒。爲澆胸次平。出處固難必。勉哉崇令名。

送李文起令鄆城

好去鄆城宰。當途有薦章。長才試縣邑。嘉政寄循良。遠路連秋草。征衫帶夕陽。濟時公等在。吾欲泛滄浪。

九日

憑高一望客心傷。風景蕭條是楚鄉。飛雁欲歸何處去。幽花還似昔年芳。詩因感物聊成詠。酒爲隨人強舉觴。十載蹉跎身事晚。每逢佳節轉淒涼。

壽李長源

匹馬短衣看此行。看君誰信是書生。聽詩未覺秦川遠。倚劍常懷晉水清。一飯見哀韓信恥。千金爲壽魯連輕。壯年休洒新亭淚。且爲江山灌巨觥。

旅次

旅次渾無定。生涯亦漫勞。病求方士藥。寒憶故人袍。避俗惟黃卷。忘憂但濁醪。柴門多落葉。昨夜朔風高。

西山避亂三首

蒼山多回互。四望令人迷。過午日已煖。殘雪融爲泥。路滑不可進。弱葛愁攀躋。老幼委溝壑。不如犬與雞。嗷嗷同行子。手中各有攜。汲澗爲飲食。架木爲巖栖。夜半三四驚。翁媪禁兒啼。念我長病母。亂離隔東西。

野宿不得曉。飛霜沾敝袍。空山凝寒色。天邊星月高。憶昨離鄂城。數家同遁逃。穿林恐相失。前後聞呼號。避亂但欲遠。焉知登頓勞。俯臨萬仞壑。性命輕鴻毛。

青青道邊麥。知是誰家田。山田固已薄。榛石復相連。旁有破茅屋。日入不見煙。借問舊居者。聞亂已西遷。平生苦淪薄。對此增慨然。甲兵暗宇宙。誰能安一廛。愁憂無從訴。仰面視蒼天。伐木南澗底。雙鹿過我前。

還鄂城舊居

四月六日作

南風兵塵遠。病客返舊居。入門顧西壁。書籍亦無餘。數口共嗷嗷。日事將何如。屋破未暇葺。草

滿須當鋤。昔去季冬末。今來孟夏初。深媿資用絕。時時煩里閭。

經廢宅

誰家住宅北山隈。亂後遠人尚未回。惆悵門前是官道。臨風一樹杏花開。

登鄂城寺樓

亂後行藏豈自由。此身雖在病兼憂。一杯徒積黃泉恨。四壁難爲白日謀。數極乾坤見中否。跡隨溝壑恐長休。可憐海內干戈滿。獨對江山倚寺樓。

八月二十三日夜走西山

婦病不能進。兒啼不肯行。蒼茫荒野外。北風鼓鞞聲。老幼夜中逃。失路入榛荆。月出天欲曙。山頭烽火明。鄧卒一戰潰。敵勢遂縱橫。昨朝使帖下。主將亦還營。嗷嗷二十載。何時見昇平。我生值世亂。世亂難爲生。

哭李長源

十月西來始哭君。山中何處有孤墳。以才見殺人皆惜。忤物能全我未聞。李白歌詩堪應詔。陳琳書檄偶從軍。窮途無地酬知己。會待昇平緝舊文。

襄陽七絕句

江雨初晴江漲發。涼風吹水波浪開。日暮津頭聞打鼓。越商巴賈卸船來。
街頭魚米近頗貴。縮項長腰最可珍。江東蓴鱸亦何好。能令張翰稱達人。
正值喪亂棄中原。南來亦復著南冠。吾家舊井峴山畔。野老謾作北人看。
襄陽城府自古雄。千甍萬瓦當晴空。短衣少年何處客。相邀一醉楚樓中。
城東大堤堤上頭。何處女郎同出遊。紫蓋留連不歸去。唱歌日暮傍汀洲。
江上小兒誇善沒。一日入水知幾回。汝曹未有機心在。緣底鷗鳥不飛來。
歎息耆舊不復見。欲問土風誰爲陳。羊公遺碑武侯廟。江邊酒家說向人。

武侯廟

武侯祠廟南山曲。苔滿荒碑不堪讀。客子登臨又一時。秋色蒼蒼入喬木。
天下不可無奇材。千年精爽安在哉。孤吟裴回不忍去。寒日欲下悲風來。

萬里

萬里江山動楚吟。異鄉風物長年心。孤身轉覺乾坤窄。往事空驚歲月深。
木落高城初過雁。霜飛幽館夜聞砧。蹉跎未就東遊計。醉後悲歌淚滿襟。

醉後

雲自無依鶴自孤。此生誰信有窮途。干戈二十年來客。留得殘骸傍酒壚。

丹陽東樓

仙人樓居避蒸濕。東樓縹緲羣仙集。風吹高柏影在衣。忽驚滿坐蛟龍入。日晚留連共一觴。歸來如夢海生桑。片雲送雨山頭黑。傍水低飛燕子忙。

東樓雨中七首

水邊人去燕爭泥。風動綠荷香滿溪。高樹遶樓遮望眼。獨看山色過牆西。
倚樓人看水東流。橋上行人却望樓。零落故宮無覓處。蕭蕭禾黍滿城秋。
多年蒼柏拂簷枝。燕子飛來語向誰。枕簟不防留客住。滿樓風雨下簾時。
雨入溪樓不見山。雨晴依舊數峯閑。韋郎詩句王維畫。好在幽人指顧間。
庭中野蔓走青蛇。窗外萱萼亂彩霞。雲漏斜陽雷漸遠。東邊飛雨到瓊華。
好風吹袖覺涼生。雨後東溪水面平。無數荷蓮看正好。却嫌波底亂蛙鳴。
溝水清冷樹蔭圓。下樓閑步上樓眠。夜來夢裏驚風雨。元是松聲到枕邊。

王鬱

鬱字飛伯。少日作樂府。擬古別離。有黃鶴樓高雲不飛。鸚鵡洲寒星已曙之句。人多傳之。其後入

京師。大爲李欽叔所稱。與之詩云。詩句媲國風。下者猶楚辭。贈詩者甚多。有云。憶昔穎亭見飛伯。恍若夢中逢李白。又云。紫脛仙人今淵雲。騎風御氣七尺身。又云。良金元有價。白璧況無瑕。又云。王郎少年詩境新。氣象慘澹含古春。筆頭仙語復鬼語。只有溫李無他人。飛伯用是頗自貴重云。

春日行

春日飛。春野寂。紅朋碧友元胎濕。東風着意寒食時。遊絲粘人困無力。小鈴犢車譙堤沙。鳳簫驚落瓊英花。荒墳頽頽啼夕鴉。草荒月黑鬼思家。

寄遠吟

一封征人書。秋帆瀟湘岸。當君高樓醉。憶妾空閨嘆。

陽關曲

城東車馬已促裝。城西江水青茫茫。綠楊陌上一盃酒。離愁慘淡春無光。秦樓花映晴煙直。誰家少婦當門立。金鞭入手紫燕嘶。回首飛雲曉山碧。

傷別曲

蘭皋飛暗塵。征車紆去轍。長安難咫尺。回首繁華歇。故人亭下酒。蛾眉眼中血。平生慷慨腸。忽

作柔條結。傳聞紫塞旁。秋烽下危堞。班超未投筆。來瑱空嚼鐵。誰能金閨中。坐眷娟娟月。

長安少年行

新月平康金步蓮。青雲咸陽玉連錢。誰家年少秋風裏。梁甫吟成抱劍眠。

楚妃怨

涼風遶樹秋。長河絡天碧。深宮悄無人。月暗莎雞泣。

古別離

山腰露蕙含天淚。江林楓葉秋容醉。夫君八月雁門行。碎霜冷印白龍轡。憶君挑妾初鳴琴。琴中已有白頭吟。朝朝暮暮當時事。言之祇足傷人心。君不見湘妃二女哭舜時。煙筠青玉紅珠滋。蒼梧人去百想絕。忍交今日生離別。生離別。情偏重。不及雙飛南浦雲。落紅寂寂春闌夢。

秋夜長

秋風嫋嫋吹庭樹。傷心一葉隨風去。葉隨風去何所之。似我年年困羈旅。神螺紆屈泥中蟠。青雲未到誰汝憐。愁來不寐起視夜。斗柄斜指西南天。

折楊柳

長安二月多綠楊。遠信未到龍庭旁。佳人中夜抱影坐。風窗泠泠愁思長。青天無雲一鏡潔。萬戶

千門音響絕。何人橫笛在高樓。玉龍叫徹春江月。

遊子吟

短日空裴回。流雲自來去。茫茫曉野客衣單。白露無聲落秋樹。

陽翟贈李司戶國瑞

洛陽賞盡牡丹春。寂寞釣臺對夕曛。手折幽蘭贈行子。多情惟有李參軍。

飲密國公諸子家

宣平坊裏榆林巷。便是臨淄公子家。寂寞畫堂豪貴少。時容詞客醉琵琶。

中州辛集第八

邢內翰具瞻一首

杜佺一首

三興居士二首

賈泳一首

王雄州仲通一首

晁洗馬會一首

李特進獻可二首

王大尹脩一首

高轉運德裔一首

趙轉運慤三首

趙太常之傑三首

趙漕副文昌一首

王太常繪一首

邊轉運元勳二首

楊興宗一首

元日能一首

韓內翰汝嘉一首

王內翰遵古二首

雷溪先生魏道明二首

高工部有鄰一首

路冀州仲顯一首

郭秘監長倩一首

趙轉運鼎一首

路轉運忱一首

王禮部競一首

李寧州之翰四首

趙亮功一首

范攄一首

王吏部啓一首

王汾州璿二首

學易先生雷思一首

宋孟州楫二首

張代州大節一首

郭錄事用中一首

田轉運特秀一首

高密州公振一首

張轉運穀一首

李好復二首

趙鹽部文昌一首

趙吏部伯成三首

太常卿石抹世勳一首

李坊州芳一首

盧宜陽洵一首

毛提舉端卿一首

馮辰一首

田錫二首

宋景蕭二首

劉神童微一首

胡汲一首

邢內翰具瞻

宗御史端修一首

楊秘監邦基一首

韓內翰玉二首

梁錄事仲新一首

苑滑州中一首

劉鄂縣昂三首

刁涇州白三首

康司農錫一首

王世昌二首

張介一首

李警院天翼三首

郭宣道一首

王修齡一首

張戶部翰五首

呂陳州子羽四首

王都運擴一首

盧待制元一首

趙禮部思文六首

錦峯王仲元三首

劉戶部光謙一首

張戶部德直一首

李宜陽過庭一首

龐漢一首

張參議澄四首

張仲宜二首

具瞻字崑夫。遼西人。天會二年進士。與吳蔡爲文章友。仕至翰林待制。

出塞

樓外青山半夕陽。寒鴉翻墨點林霜。平沙細草三千里。一笛西風人斷腸。

王太常繪

繪字質夫。濟南人。天會二年進士。武陟道中詩云。梧葉重勝迎日露。薔秧薄要護霜雲。人頗稱之。仕至太常卿。有注太白詩行於世。

江天秋晚圖

萬頃波間踏浪兒。瀟湘秋晚趁歸時。四山紅葉風聲健。散入儂家欸乃詞。

王禮部競

競字無競。安陽人。宋末登科。仕國朝至禮部尙書。兼翰林學士承旨。年六十四。大定四年卒。無競善作大字。字或廣長丈餘。而結密如小楷。京都宮殿題榜。皆其筆。趙禮部以爲古今第一手。唯党篆差可配耳。一孫名道通。字彥深。今爲黃冠師。

奉使江左。讀同官蕭顯之西湖行記。因題其後

雲煙濃淡費臨摹。行記看來即畫圖。雲夢不妨吞八九。筆頭滴水了西湖。

杜佺

佺字真卿。武功人。宋末有詩名於關中。兒時嘗作藥名詩。有杜仲吾家好弟兄。自然同姓又同名之句。及以五言百韻上乾州通判馬涓。涓大加賞異。阜昌中登科。蒞官亦有聲。馬嵬太真墓。過客多題。其詩甚多。道陵詔錄其詩。得五百餘首。付詞臣第之。真卿詩在高等。舊有錦溪集。亂後不復見矣。子師楊。亦能詩。尤工書翰。奉天楊煥然云然。

馬嵬道中

垂柳陰陰水拍堤。春晴茅屋燕爭泥。海棠正好東風惡。狼藉殘紅送馬蹄。

邊轉運元勳

元勳字輔臣。豐州人。後遷雲中。祖貫道。遼日狀元。輔臣天會十年進士。終於河間路轉運使。與弟元鼎元恕。

望瀛臺春望

晴雲如困柳如癡。丹杏開殘碧草齊。一派望瀛臺下水。暖風遲日浴鳬鷺。

七夕

高樓人散酒罇空。漫擬新文送五窮。獨倚南窗夜岑寂。一鉤涼月下疎桐。

李寧州之翰

字周卿。濟南人。宣和末擢第。人有勸參重賁。可以徑至館職者。周卿謝絕之。國兵破洛州。縛見元帥。誘之使降。語及君臣之際。辭情慷慨。自分一死。帥憐之。遂被錄用。後守寧州。陷。田侍郎珪黨籍。除名。徙上京。遇赦復官。終於東平倅。有漆園集行于世。子靈石尉謙。孫德元。今在鄉里。

書呈仲孚

造物固難量。誰能計寒餓。失馬乃爲福。夢牛翻作禍。長溪霜練靜。脩嶺蒼龍臥。魂夢吾已安。不勞歌楚些。

題密雲州學壁

崎嶇到此興何堪。況復風謠意未諳。旅舍蕭條空自遣。胸懷磊落向誰談。留連暮雨侵疎牖。宛轉飛雲掃翠嵐。因憶林泉歸去好。一燈幽夢遶春潭。

中京遇因長老

天涯流落偶生還。古剎相逢語夜闌。歎我歸途千里遠。喜君禪榻一身安。松聲不斷風吟細。月影無邊露氣寒。分手山堂更寥索。冷雲衰草伴征鞍。

歲暮

休怪年來白髮新。天涯三載困埃塵。偶離沙磧窮陰地。收得桑榆老病身。對雪莫吟秦嶺句。撥醅且醉漢江春。此生自斷無餘事。何必區區問大鈞。

三興居士

三興居士。阜昌中人。

題平陰僧寺

三吳家近水晶宮。行坐紅香綠影中。今日異鄉僧寺裏。一盆荷葉戰西風。

楊興宗

興宗高陵人。宋旣渡江。故興宗有龍南集。予同舍郎關中楊君美嘗見之。

出劍門

嘔啞鳴櫓下長川。萬疊青峯只眼前。山鷓啄殘紅杏粉。杜鵑啼破綠楊煙。夢迴蜀棧雲千片。醉枕巴江月一船。物色誰分杜陵老。風騷牢落劍南天。

趙亮功

亮功華州人。嘗監富平酒。

甘露寺

鄭南峯下寺。泉石間疎簾。飛雨度山閣。閑雲生野塘。簷前松子落。廚際柏煙香。別後聞鍾磬。山陰空夕陽。

賈泳

泳字漢甫。洛陽人。

題安生僧寺

天會己酉。予嘗與王化原、李端中同過是寺。屬兵厄甫罹。堂宇頽弊。繪素剝落。秋草野蔓。羅生階上。盤桓終日間。閱其無聞。時風塵未靜。竊謂此地當日就丘墟。及今與端中復來。則寺有僧簡師矣。向之所見。頽者已完葺。剝者復嚴潔。鍾閣巍焉。石塔歸焉。庭樹鬱焉。皆向之所未有者也。因一讀舊題。已經五稔。自念五年之間。所向顛倒。十步九蹶。卒陷機穽。豈非禍患之來。有積漸歟。抑得失行止。非人所能爲歟。嗚呼。事去如夢。人生如寄。窮達相推。雖賢智有不能免焉者。顧余何足道哉。所不知者。他日過此。寺之興廢。余之得喪悲歡。又何如也。續題一詩。貽失路者共爲一嘆云。癸丑七月八日題。

重來已是五年游。憂患相仍欲白頭。翻羨亭亭兩奇樹。不知風雨過春秋。

元日能

日能不知何許人。與劉崑老同時。

紅梅

天上瓊兒白玉肌。吳粧略約更相宜。認桃辨杏由君眼。自有溪風山月知。

崑老同賦云：一點清香透雲雪，是中那得杏花天。評者謂二詩

同意，而日能爲工。

范墀

墀字元涉。系出潁川。有詩話行于世。

和高子初梅

春風也自惜流光。只放寒梅一樹芳。玉粉更粧前夜雪。口脂猶注昔年香。江湖昨夢誰同記。詩酒風流豈易忘。東閣何郎未全老。花枝休笑鬢絲長。

王雄州仲通

仲通字達夫。長慶人。天會六年進士。皇統中陷田穀黨籍。編配五國。會赦還。世宗即位。復官。終于永定軍節度使。

送客

措足疑無地。捫心幸有天。故人成解后。殘喘見哀憐。落日驚魂外。孤雲淚眼邊。西歸萬里夢。今

夕到君船。

韓內翰汝嘉

汝嘉字公度。宛平人。父防。遼末狀元。仕國朝至宰相。嘗作武元聖德神功碑。爲作者所稱。公度皇統二年進士。累遷真定路轉運使。坐公事。遷清州防禦使。召爲翰林侍讀學士卒。

寄元眞同年

十年塵土鬢毛斑。杖屨還來踏故山。葉寄殘紅春尙在。雲酣濕翠雨仍慳。不堪倚樹追前事。更恐臨溪見病顏。一日暫來千日去。何時倦鳥得真還。

王吏部啓

啓字希畢。大興人。正隆二年進士。累遷戶部員外郎。通州刺史。用宰相萬公薦。權右司郎中。章宗即位。不一歲。遷工部侍郎。即以河南北路提刑使拜吏部尙書使宋。使還。出爲絳陽軍節度使。致仕還鄉里。與左丞董公。參政馬公。宣徽盧公。尙書郭公爲九老會。年七十九卒。子師揚。字仲雄。南渡後。隱居松山。時年已六十餘。經傳子史皆手自抄之。如健舉子結夏課然。希顏說仲雄在太學。同舍號爲閉戶王先生。其謹厚蓋家法云。孫造。字成叔。今居東平。

王右轄許送名酒。久而不到。以詩戲之。

燕酒名高四海傳。兵廚許送已經年。青看竹葉應猶淺。紅比榴花恐更鮮。枕上未消司馬渴。車前空墮汝陽涎。不如便約開東閣。一看長鯨吸百川。

晁洗馬會

會字公錫。高平人。道院文元公之後。宣和末。中武舉。仕爲太子洗馬。天眷二年經義進士。爲人美風儀。器量宏博。澤人。經靖康之亂。生徒解散。公錫稍誘進之。貧不能就舉者。必厚爲津遣。在官下則分俸以給之。至于李承旨致美。昆仲。亦出其門。士論歸焉。歷虞鄉猗氏臨晉三縣令。以興平軍節度副使致仕。年七十八。終於家。詩號泫水集。虞鄉縣齋云。官況薄於重搾酒。瓜期近似欲殘碁。王官谷云。煙藏芳樹遠。雲補斷山齊。鄉人至今傳之。孫國章。字公憲。李承旨外孫。教授鄉里。樂於提誨。諸生經指授者。肅然如在官府。進退拱揖。皆有可觀。蓋其家法云。

杜鵑

杜宇啼聲枕上來。一聲哀似一聲哀。千哀萬怨無今古。喚得行人若箇迴。

王內翰遵古

遵古字元仲。父政。金吾衛上將軍。三子遵仁遵義。元仲其季也。元仲四子。庭玉字子溫。內鄉令。終於同知遼州軍州事。庭堅字子貞。有時名。庭筠字子端。庭揆字子文。

過太原贈高天益

天益能作大字

遼海渺千里。風塵今二毛。心雖如筆正。官不稱才高。筦庫非君事。山林必我曹。相期老鄉國。拂石弄雲璈。

野菊

子貞

關雞臺下秋風裏。白白黃黃無數花。日暮城南城北道。半隨榛棘上樵車。

王汾州璫

璫字君玉。太原人。天眷二年進士。弟珙器玉。珙汝玉。皇統九年同榜。家世業醫。有陰德。聞里中嘗有金蠶金馬之瑞。君玉仕至汾陽軍節度使。鄉人榮之。號三桂王氏。行尚書省左右司郎中。仲澤其從孫也。金馬在部掾清卿房。迄今寶之。

游太寧寺

西山踏破萬層青。與客攜壺上太寧。泉石有情容避俗。軒裳無術可逃形。雲縈屋角僧禪靜。露下松梢鶴夢醒。明日却尋塵境去。曉猿啼月若爲聽。

王元仲海岳樓同諸公賦

汝玉

十二朱欄倚半空。元龍高臥定誰雄。簷楹翠濕蓬山雨。枕簟涼生弱水風。物色橫陳詩卷裏。雲濤

飛動酒杯中。謫仙曾有騎鯨便。八極神游路可通。

李特進獻可

獻可字仲和。遼東人。太師金源郡王石之子。太師遼末狀元。仲和世宗元妃之弟。大定十年。史紹魚榜進士。歷州縣入翰苑。累遷戶部員外郎。以事貶清水令。召爲大興少尹。遷戶部侍郎。終於山東東西路提刑使。衛紹王即位。以仲和元舅。贈特進道國公。子道安。特旨符寶郎。

清水寒食感懷

桃花零亂柳成陰。人到春深思更深。芳草成樓天不盡。異鄉寒食故鄉心。

召還過故關山

過關天日正晴明。誰道山神不世情。遠客得歸心緒別。隴瀧閑作斷腸聲。

雷溪先生魏道明

道明字元道。易縣人。父遼天慶中登科。仕國朝爲兵部郎中。子上達、元真、元化、元道、俱第進士。又皆有詩學。元道最知名。仕至安國軍節度使。暮年居雷溪。自號雷溪子。有鼎新詩話行於世。元道春興云。燕來燕去烏衣巷。花落花開穀雨天。高麗館偏涼亭云。涼或作梁碧海半彎蝸角國。春風十里鴨頭波。中秋云。丹桂知經幾寒暑。冰壺別是一山川。其所得者也。

佛崑寺

虎谷西垠北口南。橫橋過盡見松庵。舊遊新夢猶能記。般若真如得徧參。霜圃擷蔬充早供。石泉煮茗薦餘甘。殘年便擬依僧住。過眼空花久已諳。

退食

竿頭犢鼻清貧在。夢裏槐安舊習空。退食歸來澹無事。水邊長嘯看晴虹。

學易先生雷思

思字西仲。渾源人。天德三年進士。大定中。任大理司直。持法寬平。至今稱之。仕至同知北京轉運使事。有易解行於世。弟志字尙仲。亦第進士。仕至永定軍節度使。西仲季子淵。最知名。

食松子

千崑玉立盡長松。半夜珠璣落雪風。休道東游無所得。歲寒梁棟滿胸中。

王大尹脩

脩字脩然。范陽人。皇統二年進士。資稟鯁峭。甫入仕。即以材幹稱。大定中。皇子曹王尹大興。脩然爲少尹。王移鎮北門。復以同尹從之。前後多所規益。朝廷稱焉。遷咸平轉運使。改知瀋州。坐爲怨家所誣。奪官。宰相有爲辨理者。得鄭州防禦使。章宗即位。召拜禮部尙書。以選爲大興尹。

兩月政成。發姦擊強。剖繁理劇。百年以來。無有出其右者。尋爲護前者所排。繫獄累月。天子知其非罪。出之。翛然幅巾歸范陽。明年。起爲定國軍節度使。致仕卒。遺命無請諡。無立碑。然至今言名臣者。必及焉。

烏子秀自左司員外郎左遷上京幕官

楚山白玉點蠅頭。正坐胸中有九流。同部吏郎皆五馬。不知山鬼解揶揄。

高工部有鄰

有鄰字德卿。遂城人。數歲入小學。州將爲子娶婦。驂御盈路。同舍兒競觀之。德卿讀書自若也。大定三年第進士。歷州縣爲尙書省令史。時相議絀詞賦。專明經。德卿以賦有譎諫之義。反復詰難。竟得不罷。爾後擢第者。廷試時務策。亦自德卿發之。明昌初。累遷安國軍節度使。父飛狐令某。嘗尉南和。以公事活千餘人。德卿實生是邑。父老有身及當時事者。扶杖迎勞。歡呼馬前。德卿亦爲立碑尉廳。不踰月。子嵩。猶子鑄。同榜登科。時人榮之。泰和中。使宋還。拜工部尙書。致仕卒。德卿孝友廉介。長於吏事。所至興學校。敦風化。以儒雅自緣飾。耆舊至今稱之。字嵩。字士瞻。第進士。季子嶠。字士美。正大初監察御史。最知名。

馬崑

事去君王不奈何。荒墳三尺馬嵬坡。歸來枉爲香囊泣。不道生靈淚更多。

宋孟州楫

楫字濟川。長子人。年十九。天德三年擢第。除著作郎。母老丐歸養。許之。泰和三年。以省掾從吏部尚書梁肅使宋。副趙王府長史直臣獵淮上。射一虎。斃之。濟川有詩記其事。語意俊拔。泗州守刻石於鎮淮堂。濟川官至孟州防禦使。子元吉。字祐之。明昌二年進士。元圭字達之。泰和三年進士。皆有名於時。曾孫弘道。今在武陟。

還紫雲寺素願且題詩其上

吳綾便面小團團。失手拈來亦厚顏。障盡驛塵三十里。却還明月紫雲間。

庭槐

庭槐先人手所植。再世清陰方滿臺。慚媿兒孫種桃李。花枝準擬當年開。

高轉運德裔

德裔字曼卿。鶴野人。高才博學。弱冠擢第。累遷登聞檢院同知。太府少監。平陽少尹。開州刺史。豐王傅。卒於西京路轉運使。工於爲文。字畫尤有法。所題卷軸。今猶有存者。嘗以樗軒所書比之。氣韻形似。無毫髮少異。樗軒自望者甚高。何至學曼卿。乃暗之合。真異事也。子元道。殿中侍御

史。

坐忘女

女環州張氏。年十三。異夢之後。坐忘已四年矣。贈詩者甚多。

結習銷來性自圓。去留元不問人天。消搖自是忘形蝶。枯寂寧同委脫蟬。無礙真空常蕩蕩。若存餘息尙綿綿。立亡坐脫皆遊戲。定力何嘗有變遷。

路冀州仲顯

仲顯字伯達。冀州人。家世寒微。其母有賢行。教伯達讀書。國初賦學家有類書名節事者。新出價數十金。大家兒有得之者。輒私藏之。母爲伯達買此書。擇衣節食。累年而後致。戒伯達言。此書當置學舍中。必使同業者皆得觀。少有靳固。吾即焚之矣。伯達正隆五年進士。明昌初。授武安軍節度使。鄉人榮之。雲朔用兵。伯達奉使江左還。獻賜幣以佐軍。未報而伯達死。章廟詔以所獻還其家。夫人傅氏曰。此非吾夫意。復上之。有司不聽。夫人付之州學。買上田二千畝有奇。以贍生徒。故相馬琪德玉。時判州事。聞于朝。賜號成德夫人。伯達二子。鐸字宣叔。鈞字和叔。俱有名于時。宣叔爲諫官。諫章廟元妃李氏出細微。不應上僭。有累聖德。又其兄弟特寵納賂。將有楊國忠之禍。坐謫誅除名。宣叔布衣還鄉里。傅夫人臨終敕宣叔曰。汝以憂國愛君。故極言直諫。天子明聖。特置有所蔽。計他日必復起汝。前事須再言。勿有所顧藉也。墓碑不之載。故表出之。

楊祕監釋伽出山像

自從此老出山隅。惱亂蒼生底事無。他日若逢楊處士。只教畫箇涅槃圖。

張代州大節

大節字信之。五臺人。天眷中進士。與興陵有藩邸之舊。愛其真淳。甚倚重之。歷橫海軍節度使。咸平大興尹。吏部尙書。河東北路兵馬都總管。明昌初請老。特授雁門節鉞。除其子崑叟忻州刺史。以榮其歸。信之好獎進士類。滄州徐健。太原王澤。大興呂造。經其指授。卒成大名。士論以風監歸之。崑叟字夢弼。亦第進士。歷嵐潞懷三州節度。終於集慶軍。屏山謂吏事不及乃父。而以長厚見稱。子待。舉臺掾。選授奉御。正大末。從車駕東狩。不知所終。孫紹祖。在東平。

同新進士呂子成輩宴集狀元樓

鸚鵡新班宴杏園。不妨老鶴也乘軒。龍津橋上黃金榜。三見門生是狀元。

趙轉運慤

慤字叔通。黃山先生淵之父也。宋末。汪彥章任鄆州教官。叔通爲學正。嘗預酬唱。故其詩文皆有源委。國初登科。仕至同知南京路轉運使事。

擬古

春風動地來。依依燒痕青。王孫行不歸。離恨何時平。翩翩誰家兒。曉獵開紅旌。彫弓插白羽。怒馬懸朱纓。圍合意氣雄。廝養厭庖烹。人生一春草。時至何足榮。君看五陵樹。日暮悲風生。

蜀山曉發

曉發蜀山道。山深人自迷。殘星數微小。斜月一梳低。隔舍綠車響。遙林杜宇啼。區區事行役。何日得安棲。

寒齋雪中書呈許守

剪水作花開。紛紛天上來。聲清偏傍竹。艷冷欲欺梅。積潤滋牟麥。餘膏丐草萊。窮閭休嘆息。數日是春回。

郭祕監長倩

長倩字曼卿。文登人。皇統丙寅。經義乙科。仕至秘書少監兼禮部郎中。修起居注。與施朋望、王無競、劉崑老、劉無黨相友善。所撰石決明傳。爲時人所稱。有崑崙集傳于世。子天驥。

義師院叢竹

南軒移植自西壇。瘦玉亭亭十數竿。得法未應輸老柏。植根兼得近幽蘭。雖無穠艷包春色。自許貞心老歲寒。百草千花盡零落。請君來向此中看。

郭錄事用中

用中字仲正。平陽人。大定七年進士。歷浮山簿。陝州錄事。卒年三十一。有寂照居士集。郝子玉、毛牧達、鄭仲康爲之引。其賦醋魚云。身臥不知雲子白。氣酣聊作木奴酸。按博物志。西羌仲秋日。取鯉子不去鱗。破腹。以赤秫米飯鹽醋合糝之。逾月則熟。謂之秋鮓。故仲正云然。又賦雪云。灞橋柳絮人千里。楚澤蘆花水半扉。殊有詩人思致。恨不假之以年耳。

偶得

參徧叢林懶出游。指端孤月照高秋。大千界裏閑窺掌。不二門中暗點頭。掃地燒香聊自遣。栽花種竹儘風流。莊豪抵死談齊物。無物齊時也合休。

趙太常之傑

之傑字伯英。大定人。本名宗傑。避諱改。大定十六年進士。歷西京提刑副使。棣州防禦使。終于太常卿。使宋還。言事云。宋人文敝之極。且脆弱不足爲慮。邊部爲可慮也。其前識如此。子繪。名進士。早卒。孫季卿。在燕中。

許道寧羣峰暮雪

道士平生林野人。醉中拈出雪峯真。爲君療却煙霞癖。比似青囊藥更神。

題濟源龍潭寺

樹園脩竹竹圍庵。庵下泓然碧一潭。極目荷花半秋色。小橫圖上看江南。

除夜

日月不肯留。歲曆倏云畢。僧坊見節物。新正在明日。夜半拊枕嘆。半百又加七。形骸念念改。臂力能不失。經言男數八。此去才有一。健者未可期。況乃常衰疾。物情忌盈滿。君子慎名實。行矣安退閑。吾其保終吉。

趙轉運鼎

鼎字德新。欒城人。大定十六年進士。喜作詩。頗知道學。屏山所許如此。仕至西京路轉運使。元日詩云。拜嗟筋力隨年改。飲覺屠蘇到手遲。惜不多見也。子中立。字正卿第進士。文譽甚著。

宿來同堡

渭北洮南過却春。窮邊冰雪更愁人。來同驛裏題詩處。破屋青燈一病身。

田轉運特秀

特秀字彥實。易縣人。大定十九年進士。仕至太原轉運使。喜作詩。爲周德卿、李之純所賞。感興云。散木不材寧適用。虛舟無意任乘流。百年身世槐安國。千古人情義頡侯。賦古塔云。締構百年

人換世。消沉千古鳥盤空。他類此。彥實所居里名半十。行第五。以五月五日生。小字五兒。二十五歲鄉府省御四試俱中第五。年五十五。八月十五日卒。造物之戲人如此。

五月五日生者見其賦集序。胡國瑞云。

宿萬安寺

長途鞍馬倦黃塵。喜見空崑萬疊雲。漫漫野煙迷去鳥。蕭蕭林葉帶殘曛。苔封老檜龍鱗起。石礙流泉燕尾分。夜敞松窗耿無寐。一庭蘿影月紛紛。

趙漕副文昌

文昌字當時。陵川人。仕至京兆轉運副使。嘗有詩云。蟲聲連壞壁。樹色入秋窗。草香花落處。山黑雨來時。頗爲黃華所稱。

歌扇

媚娘巧作貫珠喉。畫扇團團半掩羞。唱到春山小顰處。一輪明月爲花愁。

路轉運忱

忱字子誠。平郭人。大定二十二年進士。累遷監察御史。終於河東北路轉運副使。

秋懷

落日留虛壁。秋風急戍樓。高歌鬼神夜。揮涕虎狼秋。豪貴少青眼。文章多白頭。何時挂長劍。天

地一扁舟。

高密州公振

公振字特夫。正隆初進士。歷南京留幕。終於密州刺史。詩有家學。賦南園江鄉。有翠蓋紅粧無俗韻。綠陰青子更多情之句。惜不多見也。

裴氏西園

簾傾沉迷倦不禁。偶從名勝此幽尋。竹陰疎處見潭影。人語定時聞鳥音。陳跡謾留千古恨。歡遊聊慰十年心。多情一片梁園月。送我垂鞭出上林。

張轉運轂

轂字伯英。臨潁人。大定二十八年進士。仕至河東南路轉運使。家多法書名畫。古物秘玩。周秦以來鏡至百餘枚。他物稱是。天性孝友。與人交。極誠款。古所謂博雅君子者。伯英可以當之。弟穀。字伯玉。美風儀。善談論。氣質豪爽。在之純。希顏伯仲間。舉進士。有聲場屋。及再上不中。即拂衣去。嘗自言丈夫子娶非尙主。官不徒步至宰相。不屑可也。宰相李公仲修適之。皆與之遊。從不敢以布衣諸生處之。家既貴顯。厚於奉養。擊鮮爲具。賓客日滿門。窮晝竟夜。卒以樂死。嘗賦雪云。樵皮雙鳧懶。漁蓑一蠅拳。醉後云。日日飲燕市。人人識張翥。西山晚來好。飲酒不下驢。賦

畫石云。腹非經笥。口不肉食。胸中止有磊磊落落百千萬之怪石。興來茹噎快一吐。將軍便欲關弓射。氣母忽破碎。物怪紛狼藉。有時醉狂頭插筆。寫盡人間雪色壁。其顛放如此。

石淙

天后離宮。在崧山曲河。即東坡爲韓子華賦詩處也。

潁水洗餘高士耳。是非猶恐污人牛。區區武媚何爲者。水上磨崖紀宴游。

宗御史端脩

端脩字平叔。一字伯正。汝州人。大定二十二年進士。衛紹王避世宗諱。改宗爲嬪。而天下止以宗平叔目之。好學喜名節。操履端勁。慕司馬溫公之爲人。自爲諸生時。見者必悚然敬之。明昌中。自省掾拜監察御史。車駕東狩。是歲大寒。人有凍死者。平叔諫止之。元妃兄弟李喜兒輩。干預朝政。平叔上書以遠小人爲言。道陵知其爲喜兒發。詔喜兒就問。卿欲朕遠小人。小人爲誰。其以姓名對。平叔奏小人止李喜兒兄弟耳。喜兒以聞。李氏兄弟皆被切責。竟以訐直貶官。平叔自守愈篤。是是非非。議論一出于正大。爲朝廷所知。降詔褒諭。以全州節度副使卒官。平叔妻死不更娶。絮居二十年。士論高之。永寧游彥哲。調汝州司候。將之官。問爲政。平叔言爲政不難。治心養氣而已。彥哲不領。明日復來云。夏初入官。且臨先生鄉郡。請問從政。而先生乃以治心養氣爲言。思之不能得。願終教之。平叔曰。子寧不知此耶。治心則心正。心正則不私。養氣則氣平。氣平則

不暴。不私不暴。爲政之術。盡於此矣。平叔墓碑及傳。閑閑公爲作。稱其剛稜疾惡。有鐵面陳了翁之風。人不以過云。姪孫汝作。正大末。保山棚有功。入守汝州。力盡。城復陷。兵人欲降之。不屈而死。

漫書

冷面宜教冷眼看。只慙索米向長安。陰崖何限枯松樹。望見屏幃盡牡丹。

張戶部翰

翰字林卿。秀容人。大定二十八年進士。爲人有蘊藉。如素宦然。累遷監察御史。翰林直學士。貞祐初。戶部侍郎。車駕南渡。出爲河平軍節度使。召拜戶部尙書。草創之際。經費空竭。雖米鹽細物。皆倚之而辦。予嘗見於戶曹。邠州一書生言時事。相與詰難。凡數十條。率不思而對。雖反復計度者。亦自不能到。信通濟之良材也。宣宗旦暮相之。會卒。年五十五。弟脩。字飛卿。承安五年進士。同知河東北路兵馬都總管事。猶子天驛。字仲常。黃裳榜登科。子天任。字西美。近侍局副使。死於宋州之變。

贈石德固

西湖之月清無塵。橘中之樂猶避秦。向來所見止此耳。渠亦豈是真知津。如君眼孔乃許大。萬事

付之塵甑墮。兒能詩書又肯播。着脚世間看踏破。青巾玉帶桃李花。日斜空望紫雲車。布衣誰識隱君子。一馬濱然何處家。

再過回公寺

山州風土極邊頭。二十年中復此游。青鬢已隨人事改。碧溪猶繞寺門流。輕寒剪剪侵駝褐。小雪霏霏入蜃樓。爲問勞生幾時了。不誠長抱異鄉愁。

萬寧宮朝回

宿雨初收變曉涼。宮槐恰得幾花黃。鵲傳喜語留韜尾。泉打空山輟鞠場。已覺雲林非俗境。更從衣袖得天香。太平朝野歡娛在。不到蓮塘有底忙。

奉使高麗過平州館

昨日龍泉已自奇。一峯寒翠壓簷低。兼井未似平州館。屋上層巒屋下溪。

金郊驛

山館儵然爾許清。二更枕簟覺秋生。西窗大好吟詩處。聽了松聲又雨聲。

李好復

好復字仲通。安喜人。明昌二年進士。榆次令。有能聲。入爲警巡使。嘗以事縛一護衛。道陵有投

鼠之喻。出爲歷城令。終于滑州刺史。

邵智夫同游南城

園林晴晝蔚如煙。林外支流盡水田。落日趁墟人已散。鷺鷥飛上渡頭船。

雨中與客飲

門外平橋一水分。數聲漁唱隔溪聞。暖風落絮飄香雪。小雨沾花濕夢雲。釀具未甘名長物。詩壇聊欲張吾軍。相逢莫惜通宵飲。明日閑身不屬君。

楊祕監邦基

邦基字德茂。大定中進士。仕至祕書監。禮部尙書。文筆字畫。有前輩風調。世獨以其畫比李伯時云。

墨梅

粉蝶如知合斷魂。啼粧先自怨黃昏。花光筆底春風老。寂寞嶺南煙雨痕。

呂陳州子羽

子羽字唐卿。大興人。大定末進士。仕至陳州防禦使。元光末。爲酷吏所誣。以乏軍興繫獄。比赦至。唐卿自縊死。朝臣有辨其冤者。詔復官。希顏爲制辭云。毀譽之來。在仁賢而不免。是非之論。

至久遠而乃公。人謂唐卿於此語爲無媿。屏山故人外傳。呂氏自國朝以來。父子昆弟凡中第者六人。以六桂名其堂。貞幹字周卿。尤自刻苦。酷嗜文書。著碣石志數十萬言。皆近代以來事迹。幽隱譌怪。談諧嘲弄。無所不有。在史館論正統。獨異衆人。謂國家止當承遠。大忤章廟旨。謫西京運幕。量移北京。致仕。自號虎谷道人。晚年感末疾。又號呂跛子。自作傳以見志。關閑公亦以爲篤志君子也。弟士安。字晉卿。卿雲。字祥卿。子鑑。字德昭。皆名士。唐卿其從子云。

廣平道中

風色着鰲面。霜華侵老須。昏埃埋故驛。積雪縞脩途。凍岫新詩句。寒林古畫圖。夜寒孤月上。天地一冰壺。

宿章義廣勝寺

小邑本無事。我來勞簡書。路長頻問馬。人靜厭烹魚。鍾冷僧參外。燈殘客夢餘。此心誰領會。松月夜窗虛。

至日

歲晏多風雪。官閑深屋廬。小詩窮則變。美酒數斯疎。未草歸田賦。空翻引睡書。窗明添眼力。已覺日光舒。

李白辭歸圖

春風醉袖玉山頽。落魄長安酒肆迴。忙煞中官尋不得。沉香亭北牡丹開。

趙鹽部文昌

文昌字公權。平陽人。明昌二年進士。仕至遼東路鹽使。博學好持論。周常山甚愛之。子觀。字維道。從事史院。資謹厚。不忤于物。閑閑許其字畫進進不已。可到古人云。

軍中寄親舊

軍中從事髮絲垂。把釣江湖與願違。紅葉關河爲客久。黃花時節寄書歸。霜天不盡孤雲遠。秋意無聊一雁飛。鄉社故人應念我。豈知南望更依依。

韓內翰玉

玉字溫甫。其先相人。五世祖繼寧。仕石晉爲行軍司馬。從出帝北遷。居析津。曾孫知白。仕遼爲中書令。孚爲中書門下平章事。賜田盤山。遂爲漁陽人。曾祖錫。字難老。仕國朝以濟南尹致仕。溫甫明昌五年經義詞賦兩科進士。入翰林爲應奉。應制一日百篇。文不加點。又作元勳傳稱旨。道陵嘆曰。勳臣何幸得此家作傳耶。泰和中。建言開通州潞水漕渠。船運至都。陞兩階。授同知陝西東路轉運使事。大安三年。都城受圍。夏人連陷邠涇。陝西安撫司檄溫甫以鳳翔總管判官。爲都統

府募軍。旬月得萬人。藉秦州場買馬官香。及鳳翔買馬七百。寶雞埋沒官鐵。他州郡弓弩數千以給軍。出屯華亭。與夏人戰。敗之。獲牛馬千餘。時夏兵五萬方圍平涼。又戰于北原。夏人疑大軍至。是夜解去。當路者忌其功。驛奏溫甫與夏寇有謀。朝廷疑之。使使者授溫甫河平軍節度副使。且覘其軍。先是華州李公直以都城隔絕。謀舉兵入援。而溫甫恃其軍爲可用。亦欲爲勤王之舉。乃傳檄州郡云。事推其本。禍有所基。始自賊臣貪容姦路。繼緣二帥貪錮威權。既止夏臺之師。旋致會河之敗。又云。齊魏以高壘爲能堅。蒲絳以穿空爲得計。裹糧坐費。盡膏血於生民。棄甲復來。竭資儲于國計。要權力而望形勢。連歲月而守妻孥。又云。命令不至。京師奈何。眇眇四集之師。懸懸半歲之上。人誰無死。有臣子之當然。事至于今。忍君親之弗顧。勿謂百年身後。虛名一聽史臣。只如今日目前。何顏以居人世。公直一軍。行有日矣。將佐違約。國朝人有不從者。輒以軍法從事。京兆統軍便謂公直據華州反。遣都統楊珪襲取之。皆置極刑。公直曾爲書約溫甫。溫甫不預知。其書乃爲安撫所得。公直書三。一與京兆宣撫。一與溫甫。一與楊珪。故京兆軍得因書襲華州。及使者覘溫甫軍。且疑預公直之謀。即實其罪。溫甫赴官。道出華州。被囚。死於郡學。臨終書二詩壁間。士論冤之。溫甫先賦怪松云。昂藏殊未展。偃偃旋自縮。惜爾雲外姿。耐此胯下辱。又云。木高衆必摧。地厚敢不謁。河中皆泛泛。澗底自鬱鬱。未幾被禍。人以爲讖云。子不疑。字居之。小字錦郎。以父死非罪。誓不祿仕。丙申

之夏。過予冠氏。出其父臨命時手書云。此去冥路。吾心皎然。剛直之氣。必不下沉。兒可無慮。世亂時艱。努力自護。幽明雖異。寧不見爾。予爲之惻然。

臨終二詩

客自朝那戍。東過古鄭原。衰年會凶運。奇禍發流言。白骨將爲土。青蠅且在樊。仰呼天外恨。沉思地中冤。母喪半途鬼。兒孤千里魂。此心終不滅。有路訴天閭。

天下無雙士。軍中有一韓。才名兩相累。世道一何艱。旅次窮冬暮。囚孤永夜寒。身亡家亦破。巢覆卵寧完。矍鑠鞍仍在。驚呼鋏屢彈。丈夫忠義耳。無惜感歌還。

王都運擴

擴字充之。永平人。明昌五年進士。累遷同知德州防禦使事。山東飢。詔馳驛赴官。且以振貸事付之。時棣州飢尤甚。而不在發粟之數。充之擅開倉救之。朝廷不之罪也。泰和七年夏旱。充之以監察御史受詔審冤。因爲同列言。往時審冤。一切以未減爲事。至殺人者之罪。亦貰出之。地下之冤。當誰理之乎。使還言。擬設三司不便。大略言三司之設。特以剋剝爲事。大定間。一曹望之爲戶部。天下倉廩府庫皆實。百姓無愁怨之聲。存乎其人。不在改官稱也。今三司官皆戶部舊員。掾屬亦戶曹舊吏。豈有愚於戶部。而智於三司者。乞復戶部之舊。無駭民聽可也。崇慶初。遷河東北路

按察簽事。上書言時病四。一將不知兵。二兵不可用。三事不素定。四用人違其長。貞祐二年。太原受兵。充之之功爲多。最後權陝西西路轉運使。行六部尙書。前政太原喬世權子實。燕人趙伯成子文。號爲稱職。充之表表自見。雖處細務亦有法。掾屬奔走從事。無敢後者。評者爲子實寬緩。欲爲不忍欺。子文愼密。欲爲不能欺。皆未必能然。獨王公之不敢欺爲有徵云。年六十三。致仕卒。子元慶。字善甫。歸德行六部郎中。次子元亨。

題神霄宮清心軒

紛紛百慮自心生。方寸清來百慮平。未了此心私自笑。更憂時世欲澄清。

趙吏部伯成

伯成字子文。宛平人。明昌五年經義詞賦兩科進士。博通書傳。有貞積之力。性沉厚。言必中理。從在太學日。人以趙骨鯁目之。累遷侍御史。拜中丞。陝西西路轉運使。靜難軍節度使。哀宗即位。召爲吏部尙書。坐爲飛語所中。罷官。卒于崧山中。潞人宋文之說其臨終甚明了也。

蠟梅二首

凍蕾含香蠟點勻。古來幽谷有佳人。詩家只怨和羹晚。不道紅梅別是春。
冷艷疎香寂寞濱。欲持何物向時人。東風自是清狂手。辦作竹籬茅舍春。

元弟以所業見投賦詩爲贈

着舊隔存攷。爲君重嘆嗟。人門得嵇紹。文賦見張華。夙有凌雲筆。方乘犯斗槎。忘年即吾友。未可論通家。

梁錄事仲新

仲新字良輔。朝城人。明昌五年進士。初試仙掌承露詩。主司以爲擅場。用是知名。卒于許州錄事。

江天暮雪圖

南雪不到地。霏霏滿竹樓。沙河燈市裏。春在木綿裘。

盧待制元

元字子達。玉田人。父啓臣。字雲叔。第進士。仕宦亦達。自號涇水先生。和趙元發、劉師魯、葛藤韻云。乳兔生長角。麀湯結厚冰。木終成假佛。髮不礙眞僧。莫認指爲月。須明火是燈。拈花微笑處。只記老胡曾。子達幼而敏惠。年未二十。試於長安。爲策論魁。擢第後。又中策魁。明昌初。章廟設宏詞科。命公卿舉所知。子達與郭黻、周詢、張復亨就試。凡七日。並中選。遂入翰苑。累遷至待制。二兄長庸。弟曾。名進士。又俱擢高第。時人以燕山竇氏比之。屏山故人外傳云爾。子安。字希

謝。翔字仲升。仲升正大末登科。

閑詠

天近蒼龍闕。居連白馬堂。松聲得隣舍。山色出宮牆。巷陌輪蹄少。庭閑日月長。九衢紅霧裏。亦有白雲鄉。

太常卿石抹世勣

世勣字晉卿。承安中進士。終于禮部尙書。子嵩。字企隆。應奉翰林文字。父子皆死蔡州之難。

紙薦

鴟鵂鵂誰雌雄。假手成形本自同。果物戲人人戲物。爲風乘我我乘風。扶搖謾擬層霄上。高下都歸半紙中。兒輩啾啾方矚目。豈知天外有冥鴻。

苑滑州中

中字極之。大興人。承安中進士。累官京西路司農少卿。滑州刺史。好賢樂善。有前輩風流。貞祐中。高琪當國。專以威刑肅物。士大夫被捃摭者。笞辱與徒隸等。醫家以酒下地龍散。投以蠟丸。則受杖者失痛覺。此方大行於時。極之有戲云。嚼蠟誰知味最長。一杯卯酒地龍香。年來紙價長安貴。不重新詩重藥方。時人傳以爲笑。極之嗜讀書。一以資于詩。詩亦往往可傳。壬辰卒于京。

師。年五十七。

贈韶山退堂聰和尚

郎當舞袖少年場。線索機關似郭郎。今日棚前閑袖手。却從鼓笛看人忙。

趙禮部思文

思文字庭玉。永平人。明昌五年進士。貞祐中。陷沒都城。間關南渡。遂爲朝廷所知。歷虢州刺史。汝州防禦使。金安集慶兩軍節度使。召拜禮部尚書。壬辰卒官。爲人誠實樂易。自少日有君子長者之目。南狩以後。趙吏部子文。楊禮部之美。趙禮部周臣。陳司諫正叔。與庭玉皆完人。終始無玷缺者也。弟庭珪。同榜登科。三子。敬叔。介叔。方叔。今居鄉里。

試院中呈同官崔伯善李順之

睡起松陰鳥雀譁。忽驚霜葉墮簾牙。簡書迫切全疎酒。眼力眈昏只費茶。不學道人飡柏葉。却隨舉子踏槐花。提衡文字非吾事。崔李風流有故家。

僕相浪溪歲寒堂

靜中臺榭隔紅塵。水色山光日日新。不用沿溪種松竹。主人元是歲寒人。

捕蝗感草蟲有作二首

雖是形模不苦爭。汝能傷稼我能鳴。誰知竟有長平禍。玉石填來共一坑。

草蟲悲咽不能言。亂逐螟蝗瘞古原。水底癡龍正貪睡。甕中蝸虎更銜冤。二詩疑園城中作。觀者可以意推之。

嵩山承天谷又云逍遙谷

煙霞直上逍遙谷。路轉山腰咫尺迷。已覺洞天分聖境。更疑石磴是仙梯。霜添紅葉黃花好。天與

金壺玉柱齊。兩峯名。醉倚西風正南望。暮雲煙草一時低。

弔同年楊禮部之美

海內文章選。人中道德師。爭教衰病足。不到鳳凰池。

李坊州芳

芳字執剛。大興人。承安二年進士。歷乾坊兩州刺史。同知都轉運使事。爲人敬賢下士。款曲周至。聞人一善。極口稱道。士論以此歸之。又精于吏事。累以廉能進秩。正大末致仕。歿於洛陽之難。

留別

祿食愧踰量。智因念歸愚。符竹恆爲累。幸及引年初。驅馬國西門。初服返田廬。金閨富才彥。絕足馭高衢。眷我謝朝蹟。冠蓋寵歸途。歸途豈不榮。顧瞻亦踟躕。煌煌丹山鳳。覽德萃清都。行人得棲止。老鶴青天孤。石樓俯清伊。旁有野人居。儻逢經過便。山水足相娛。

劉鄂縣昂

昂字次霄。濟南人。承安五年進士。調鄂縣令。劉光甫曾爲同官。稱次霄高材博學。詩時有佳句云。

零口早行

馬上兀殘夢。沉沉天向晨。行雲如妬月。古道不逢人。野曠耕聲遠。山高露氣新。哦詩無好語。聊爾一吟呻。

讀三國志二首

虎視鯨吞卒未休。一時人物盡風流。婦翁正得黃承彥。兒子當如孫仲謀。乳臭蒙孫真寄坐。齒寒鄰國莫分憂。阿瞞狐媚無多罪。誰作桓文得到頭。

泣漢遺黎血未乾。繁昌新築受終壇。天球寶鼎私臧獲。坎井坳堂局鳳鸞。地易主賓窮赤壁。勢成螳雀事烏丸。陳言袞袞令人厭。枉就輸基覆舊槃。

錦峯王仲元

仲元字清卿。平陰人。承安中進士。以能書名天下。歷京兆轉運司幕官。子公茂。今在雲中。

雲中同周臣內翰賦

天上瑞花散不收。溫溫叶氣浹皇州。橫溪月澹梅宜臘。平野風閑麥有秋。清輿雅高東武會。孤吟誰似霸陵游。西山玉立三千丈。好句都輸趙倚樓。

雪

初稀時拂拂。稍密自紛紛。老樹曉迷月。瘦峯寒怙雲。色從空際得。聲向靜中聞。客枕清無夢。哦詩徹夜分。

贈青柯平隱者

太華神明觀。青柯小有天。大哉霄壤內。無此弟昆賢。齊物三千行。棲雲二百年。初平初起後。又得兩臞仙。

盧宜陽洵

洵字仁甫。高平人。李承旨致美見所作上梁文。勉使就舉。六十一歲。呂造榜登科。歷河南府教授。河陽丞。宜陽令。致仕後居伊陽。年八十三卒。仁甫有詩學。以鞏原及赤壁圖詩著名。招飲云。南園仙杏猩紅破。北渚官醪玉汗醇。已約尊前成二老。全勝月下作三人。

白溝

白沙清淺不容舟。遼宋封疆限此溝。到了山河無定主。碧波依舊只東流。

刁涇州白

白字晉卿。信都人。呂造勝乙科。歷涇州幕官。入補省掾卒。作詩極致力。樂府尤有風調。今散失不復見矣。

渭水

渭水秋天白。驪山晚照紅。行人迷古道。老馬識新豐。霜雪滿歸鬢。乾坤猶轉蓬。愁來成獨酌。醉袖障西風。

物質

物質方圓定。營營止自疲。鶴鳬傷斷續。鵬鷃失高卑。巧宦多成拙。徐行未必遲。可憐箠上雁。來往聽人移。

送花

縱橫詩酒少年曾。老矣追懽謝不能。種出好花無用處。東鄰乞與坐禪僧。

劉戶部光謙

光謙字達卿。潘州人。父澤。字潤之。爲部掾。斷獄有陰德。劉之昂與之酬唱。其詩有云。侯門舊說炎如火。陋巷今猶冷似冰。半夜杯槃長袖舞。白頭書冊短檠燈。用是不敢以府史待之。達卿泰

和三年進士。資幹局。處事詳雅。爲朝廷所知。累官司農少卿。病瘡許州。宣宗敕國醫診視之。卒年五十六。好問爲舉子時。識於登封。相得甚歡。尊酒間談笑有味。使人不能忘也。

寄陳正叔雷希顏

東南形勝古徐州。人物休評第幾流。落落陳雷天下士。故應連榻臥黃樓。

毛提舉端卿

端卿字飛卿。彭城人。父矩。桓州軍事判官。歿王事。飛卿二十歲始知讀書。游學齊魯間。備極艱苦。飢凍疾病。不以廢業。凡十年。以經義魁東平。泰和三年擢第。累遷提舉摧貨司。戶部員外郎。性剛明。疾惡過甚。坐與監察御史相可否。爲所中傷。降鄭州司候。改孟津丞。將復用矣。會卒。子思遙。今居東平。

題崞縣郝子玉此君軒

桂林名姓一枝新。萬竹青青德有鄰。渭上風煙分別派。山陽詩酒屬閑人。心期已到冰霜窟。眼界不知花柳塵。萱背從今看煇映。嫩香新粉四時春。

康司農錫

錫字伯祿。寧晉人。其祖嘗與兄弟分財。他田宅無所問。止取南中生口十餘人。縱爲民而已。以故

家獨貧。父奔。爲里胥。性純篤。縣令者倚之以納賄。及令爲御史所劾。奔自念言直。則令被罪。終世不齒。渠官長而我以事證之。何以立於世。乃自縊而死。令竟以無迹可尋。獲免。伯祿旣養於外祖田氏。田氏見伯祿骨骼異他兒。謂當有望。使之應童子舉。飲食臥起。躬自調護。備極勞苦。得解赴都。一日日暮。行莢葦中。懼爲同行所遺。至背負伯祿而行。及長。師栢鄉王翰周輔。束脩不能備。周輔與諸公共贖給之。黃裳榜擢第。歷樞陽簿。警巡判官。辟彭原令。補省掾。考滿。遷開封府判官。拜監察御史。言宰相侯摯師安石非相材。提點近侍局。宗室安之。聲勢焰焰。請託公行。不可使久在禁近。朝議偉之。選授右司都事。京南路司農丞。破上蔡諸縣羣不逞把持之黨。以河中治中。充行六部郎中從軍。城陷。投水死。伯祿孝于母。友於其弟。有恩義於朋友。從政則死心以奉公爲民。古所謂公家之利。知無不爲者。唯伯祿爲然。同年生如雷希顏、冀京父、宋飛卿之等名士數十人。世以比唐日龍虎榜。至論氣質。尙以伯祿爲稱首云。

按部南陽有贈

魯山佳政霑隣邑。白水歡謠見路人。縣務清談君自了。農郊夙駕我何勤。星河直上冰輪轉。桃李前頭玉樹春。海寓疲民望他日。草堂那得遽移文。

張戶部德直

德直字伯直。平陽人。叔祖邦彥。字彥才。張楫榜登科。以當川令致仕。有松堂集行于世。嘗有詩云。青山澹澹水溶溶。盡出蒼祇點化工。無限燒痕渾綠染。可憐喬木待春風。父迪祿。字仲英。明昌初進士。歷岐山上黨二縣令。卒於省掾。伯直貞祐三年進士。釋褐新平簿。辟藍田令。秩滿。父老詣行臺留再任。去之日。爲立生祠。移沔池通許。召補省掾。選授右警巡使。終於同知武勝軍節度使事。子城。今居永寧。

叔能見過

度嶺千峯闊。沿溪一徑微。山寒花發晚。村迥客來稀。強飲酬佳節。悲歌送夕暉。平生愛歡聚。衰病與心違。

馮辰

辰字駕之。臨潼人。貞祐三年進士。辟涇陽令。九歲知作詩。

雨後

時年十三

東風花外錦鳩啼。喚起西山雨一犁。綠滿蔬畦人不到。桔槔閑立夕陽低。

王世昌

世昌字慶長。寧州人。貞祐三年同進士出身。以信都丞致仕。

過華州

拔地三峯冷翠微。落崑飛瀑噴珠璣。吟鞭落托騎驢過。戰刃韜藏牧馬歸。十丈玉蓮秋不謝。半楞掌月晝還飛。地靈人傑無遺逸。未分蟠螭老布衣。

方城東寺海棠

苦荬如針草有芒。桃花輕薄絮顛狂。少陵例有詩沾丐。只枉無言到海棠。

李宜陽過庭

過庭字庭訓。武亭人。貞祐二年進士。歷宜陽永寧滎陽三縣令。所去見思。入爲右曹掾。斷獄寬平。當妖賊李亨首坐。所註誤數百人。皆從輕法。正大中。擢右三部司正。終於昌武軍節度副使。少日從太原王正之學。故詩文皆有可觀。人初與交者。多不能合。久之知其爲淳質長厚人也。壬寅四月暴卒於東平。子蓴。字華甫。

讀公孫弘傳

古來好客數平津。我道眞龍未必眞。一箇仲舒容不得。不知開閣爲何人。

田錫

錫字永錫。宛平人。興定五年進士。調新蔡主簿。閑居南陽驥立山下。資豪爽。自少日有聲場屋。

間。作詩甚多。弔蘇墳一篇。有英靈還却眉山秀。依舊東風草木天之句。世閔傳之。

牧牛圖

干戈擾擾徧中州。挽粟車行似水流。何日承平如畫裏。短簫長笛一川秋。

故縣別業

九折驅車夢易驚。一塵老計喜初成。園蔬不借將軍地。宅券何勞宰相名。山入平簷供遠翠。水環釣石得深清。漫郎聲叟琦玕子。誰悟他生與此生。

張介

介字介夫。彭城人。正大元年經義第一人。歷鞏穀熟二縣令。幼有賦聲。爲人有蘊藉。嘗贈詩人楊叔能末章云。我貧自救如沃焦。君來過我亦何聊。爲君欲寫貧士嘆。才思殊減荒村謠。楊初以荒村謠得名。故云。

讀天寶遺事

不但昨非今亦非。上皇騎馬淚沾衣。曲江死後無忠諫。却憶詞人秋雁飛。

龐漢

漢字茂弘。平晉人。正大末年進士。沉毅有志節。待次內鄉北山。兵亂遇害。

終南谿

冷雲低壓萬長楊。十頃秋陰鎖北堂。門外兵塵漲秦楚。水邊煙景似湖湘。荷翻山雨僧窗晚。竹泛溪風客枕涼。早晚初平遂真隱。遶陂閑牧石頭羊。

宋景蕭

景蕭字望之。濟川族孫。正大六年進士。辟令秦安。未赴。遭亂。望之於劉景玄爲外兄。故其詩頗獲沾丐。嘗有荒山銷盡古今魂之句。詩家稱焉。

河陰望河朔感寓一首

南來邊報日駸駸。思禹亭高淚滿襟。野燒爲誰留白草。荒城空自隔疎林。雁聲不斷天連水。山色無情古又今。離合興亡只如此。往年爭識少陵心。

春雪用上官明之韻

噍噍春蟲鬧撲窗。地爐茶鼎蚓聲長。詩中有味清於酒。只欠冰梢數點香。

李警院天翼

天翼字輔之。固安人。貞祐二年進士。歷滎陽長社開封三縣令。所在有治聲。遷右警巡使。汴梁既下。僑寓聊城。落薄失次。無以爲資。辟濟南漕司從事。方鑿圓枘。了不與世合。衆口媒孽。竟罹非

命。輔之材具甚美。且有志於學。與人交。款曲周密。久而愈厚。死之日。天下識與不識。皆爲流涕。予謂天道悠遠。良不可知。而天理之在人心者。亦自不泯也。

還家三首

幽花雜草滿城頭。華屋唯殘土一丘。鄉社舊人何處在。語音強半是陳州。
牡丹樹下影堂前。幾醉春風穀雨天。二十六年渾一夢。堂空樹老我華顛。
殊音異服不相親。獨倚荒城淚滿巾。祇有青山淡相對。似憐我是此鄉人。

張參議澄

澄字之純。別字仲經。本出遼東烏惹族。國初遷之隆安。祖黃縣府君。移官洛水。因家焉。之純早孤。能自樹立。避地洛西。率資無旬日計。而泰然以閉戶讀書爲業。嘗從辛敬之、趙宜之講學。故詩文皆有律度。兵後居東平。詩名藉甚。如云。齊客計窮思蹈海。杞人癡絕謾憂天。壞壁粘蝸艱國步。荒池漂蟻失軍容。此類甚多。

積雨

積雨生頑痺。新晴意自怡。幽花依小徑。野蔓媚疎籬。髮少從梳懶。年衰與杖宜。腐儒慚用拙。糲食復何辭。

和林秋日感懷寄張丈御史二首

塞草枯黃秋未殘。北風裘褐日生寒。田園政憶遂初賦。冰雪莫吟行路難。囊穎露錐徒自苦。蒯緱有劍祇空彈。南窗明煖無塵到。慚愧高人老鶻冠。

別家六見月牙新。萬里風霜老病身。塊坐蘊廬心悄悄。遠懷茅屋夢頻頻。瓜田無取終成謗。市虎相傳久是真。鄉國歸程應歲暮。火爐煨栗話情親。

韞馬圖

飛輶乘城力亦優。不應伏櫪便垂頭。而今世上無良樂。兀兀黃塵輶得休。

劉神童微

微字伯祥。益都人。七歲能文。道陵召入宮。賦鳳凰來儀二首。稱旨。賜經童出身。係籍太學。後登貞祐二年第。

春柳應制得城字

翠細圓勻綠線輕。着行排立弄新晴。更看三月春風裏。散作飛花滿鳳城。

郭宣道

宣道字德明。邢州人。系出衣冠家。人物楚楚。而有老成之風。貞祐中客南陽。名士定興張履坦

之罷鄆州觀察。閒居此縣之石橋。見德明愛之。招致門下。飲食教督。委曲周備。遂有聲場屋間。正大末。沒兵中。

送同舍張耀卿補掾中臺

摩雲頭角看昂藏。意外升沉豈易量。取士皆知有科舉。進身初不在文章。關心雁塔功名晚。試手烏臺歲月忙。此去一官先有路。獨憐燈火夜窗涼。

張仲宣

仲宣字利夫。相州人。舉進士有聲。子柔。字子友。今在林慮。

下第

主司頭腦舊冬烘。更着書郎骨相窮。曉賦得官何足道。直須遮馬困吳融。

戲題石鹿峰猴畫卷

橫塑將軍馬足塵。判花學士筆頭春。功名果屬丹青手。造物如何戲得人。

胡汲

汲字直卿。衛州人。少有賦聲。與新鄭傅伯祥、呂鵬舉相友善。貌寢陋。而滑稽無窮。時命不偶。竟窮悴而死。

無題

休笑參軍靴不韞。休嗟門客食無魚。燕鴻來去端誰使。鵬鷃消搖本自如。潦倒淵明三徑菊。荒唐惠子五車書。古人淡裏求真味。身外紛華不羨渠。

王脩齡

脩齡字紹先。同州人。詩有得意好花開早落。喚愁芳草燒還生之句。閑閑愛而戲之。目爲癡仙人。

黃葉行送祖唐臣歸柘縣

送君黃葉山。黃葉紛不掃。上有蕭蕭之風樹。下有漫漫之衰草。山中黃葉行復青。髀肉一消人自老。酒盡意不盡。執手臨古道。古道連延走錦襄。錦襄日暮浮雲翔。一燈孤館相思處。寒雁一聲秋夜長。

中州壬集第九

白先生賁一首

浚水王先生世賞四首

步元舉一首

宗道一首

王敏夫二首

郝先生天挺一首

徐好問一首

曹用之二首

張溫一首

杜丞相充一首

張左相汝霖一首

張平章萬公一首

王內翰樞一首

南湖靖先生天民一首

馮文叔一首

鮮于溥三首

王利賓一首

孫邦傑一首

呂大鵬一首

趙達夫二首

馬舜卿一首

虞令公仲文一首

劉右相長言一首

董右丞師中一首

睡軒先生趙晦一首

東臯桑先生之維一首

張庭玉一首

史士舉二首

孫益一首

張璫一首

高永一首

邢安國二首

劉曹王豫七首

張丞相孝純一首

右相文獻公耶律履一首

孫太師鐸一首

梁參政瑤一首

賈左丞益謙一首

丞相壽國高公汝勵一首

胥莘公鼎一首

張左丞行中一首

楊戶部慥二首

鄭內翰子聘一首

孟內翰宗獻六首

趙內翰據一首

趙文學承元一首

張太保行簡三首

張內翰檄四首

閻治中長言八首

李治中著一首

擬初先生王中立六首

王先生予可七首

照了居士王彥三首

無事道人董文甫八首

薛繼先四首

白先生賁

賁汴人。自號決壽老。自上世以來。至其孫淵。俱以經學顯。

客有求觀予孝經傳者感而賦詩

古人文瑩理。後人但工文。文工理愈暗。紙扎何紛紛。君看六藝學。天葩吐奇芬。詩書分體製。禮樂造乾坤。千歧更萬轍。要以一理存。如何臻至理。當從踐履論。跋涉經險阻。鑽研閱寒溫。孝弟作選鋒。道德嚴中軍。仰觀及俯察。萬象入見聞。不勞施斧鑿。筆下生煙雲。高以君唐虞。下以覺斯民。君如不我鄙。時來對爐熏。

王內翰樞

樞字子慎。良鄉人。遼日登科。仕國朝。直史館。

三河道中

十載歸來對故山。山光依舊白雲閑。不須更讀元通偈。始信人間是夢間。

睡軒先生趙晦

晦字光道。管城人。宋末代州法曹。秀容主簿。汴京破後不復仕。自號睡軒居士。子洵子都。大定二十年進士。真定路總管判官。孫綱。三赴廷試。以蔭補官。終于永壽令。曾孫居禮之讓。今在燕中。

暮春

壓枝梅子半青黃。葉底殘紅雨褪香。翠鈿舞風榆落莢。綠鍼浮水稻抽秧。酒濃猶覺春醒困。睡美方便午夢長。苦被啼鶯訴花老。揮毫聊作送春忙。

浚水王先生世賞

世賞字彥功。汴人。與尹無忌、王逸賓、趙文孺相周旋。明昌中。保舉才能德行。賜出身。釋褐鞏州教授。終于鹿邑簿。有浚水老人集傳于出。

立春後十日登樓

今日登樓眼。風煙倍覺新。溪梅初破萼。屋雪半融銀。鴈外天逾碧。鷗邊水自春。兒曹應見笑。吟望獨傷神。

春雲

只謂春天暖。寧知雪霰飛。龍蛇且深蟄。花柳不勝威。糝糝凌風細。紛紛帶雨稀。誰當問穹昊。生殺果何機。

探梅

候得南枝破玉腮。心顏今日爲君開。細看苔逕無行跡。先賞應輸我獨來。

稱善齋

宦途馳逐只堪羞。何意須封萬戶侯。平日少游真可念。絕勝辛苦駐壺頭。

南湖靖先生天民

天民字達卿。淦陽人。其父國初官原武。因而家焉。少日嘗兩魁鄉試。自望者不碌碌。所與交。如龐才卿、楊茂才、劉之昂、王逸賓。皆一時名士。晚年買田南湖。葺亭園。植竹樹。以詩酒爲事。自號南湖老人。年七十九卒。子文煒德昭。從孫頤子昂。

西子放瓢圖

髻鬟蕭颯苧羅秋。千古香溪水自流。吳越兵爭竟何得。風流輸與五湖舟。

東臯桑先生之維

之維字之才。恩州人。蔡丞相伯堅之子婿也。以樂府著稱。有東臯集傳于世。

白髮

白髮近年見。十中三兩莖。半因愁價出。多爲病添成。梳裏有時落。鑷餘還又生。老知無可避。何處是功名。

步元舉

元舉。關中人。

下第過榆次

棲遲零落未歸人。已坐無成更坐貧。意氣散論題柱客。晨昏多負倚門親。囊空漸覺錢餘賁。衣敝翻饒虱滿身。遙望秦關獨惆悵。一天風雨落花春。

馮文叔

文叔。遼東人。

客舍

禿襟紬褐破書囊。十五年來客異鄉。生事窮中搖虎尾。窮途天上轉羊腸。三朝不遇馮唐老。半夜悲歌甯戚狂。獨倚牛車望遼海。西風塵土鬢蒼蒼。

張庭玉

庭玉字子榮。易縣人。能日賦百篇。有集行于世。

即事

烏鳶繞樹山梨熟。胡蝶穿花木槿開。赤脚城中借書去。蒼頭原上負薪來。

宗道

道字雲叟。山陰人。以足疾不仕。有詩云。家藏千卷富。身得一生閑。茅屋經年補。柴門盡日關。其自處可見。

寶崑僧舍

寂寂鍾魚柏滿軒。午風輕颺煮茶煙。西堂竟日無人到。只許山人借榻眠。

鮮于溥

溥字彥仁。宋文臣子駿之後。高祖淳。淳之子孝標。標之子壽吉。壽吉之子坦。皆擢進士第。而仕亦達。彥仁坦之子。以門資仕。終于樸陽令。濟源盤谷。天壤佳處。坦父子居其間。飲酒賦詩。翛然

塵垢之外。至今人以高士目之。弟彥魯。子忠厚。今居鄉里。

魯村道中

小橋沙路已堪圖。更着衰翁跨蹇驢。暮靄似催寒日短。秋容仍帶遠林疎。鵬盤平野黃榆落。兔走橫岡白草枯。漸喜閑身遠朝市。一年強半在村墟。

春日做舊詩體

牟老逢春莫等閑。逢春能得幾回看。插花儘要花枝滿。把酒休辭酒盞乾。好向酒邊留舞袖。不妨花外駐吟鞍。聞身健在須行樂。燕語鶯啼春又殘。

早發

燈前夢斷家千里。馬上詩成月一痕。晨粥未烹官路遠。隔林煙火是漁村。

史士舉

士舉字仲升。榮澤人。漢功臣弘肇之後。高祖所賜鐵券故在。其大父官濟源。樂其山水。因家焉。父神山令。石琚榜進士。仲升以蔭補官。歷銅鞮三川兩縣令。初任京兆錄事。以歲旱擅開倉賑貧。身往太一湫禱雨。尋獲嘉澍。用是得名。爲人雅重。知義理。褒衣緩帶。消搖山水間。宛然一老書生也。貞祐之亂。避于太行。保聚失守。老幼皆出降。仲升義不受辱。投絕澗而死。年七十九。

孫庭玉。字德秀。今居山陽。

超化

石根寒溜迸珠璣。尋丈驚看雪浪飛。我是玉川煙水客。暫來盤礴亦忘歸。

晉祠

小橋流水竹蕭森。竹裏人家一徑深。只欠東風小籬落。梅華疎淡月籠陰。

王敏夫

敏夫五臺人。作詩工於賦物。甚爲趙宜之所稱。雁門前輩中有許蛻子遷。以武皇廟詩著名。又酒渴後四句云。眼底恨無雲夢澤。胸中疑有沃焦山。南窗花影三竿日。指點銀瓶照病顏。有集傳河東。往往稱此。倪民望字具瞻。屏山所謂倪侯頭如筆。其鋒不可當者。有種松詩云。種松莫種柳。種柳莫種松。堅脆非所計。雅俗寧與同。可是種松無隙地。却教憔悴柳陰中。張韶九成。寄朔州苟輔臣云。陳雷膠漆輕餘子。楚漢風雲屬少年。李忠直卿賦雪云。不將柳絮春風比。好作梨花月夜看。至于蘇吉莘老。李鵬翼冲霄與具瞻之子仲儀。詩文多可傳。喪亂之後。惜不能記憶之矣。

同東巖元先生論詩

林逋仙去幾年來。驚見梅花第二篇。千歲冰霜松骨瘦。九秋風露鶴聲圓。騰輝定出連城上。得趣

知從太古前。邂逅茅齋話終夕。只疑人世改桑田。

李氏友雲樓

霧幕煙迷十二欄。壺觴招我一躋攀。黃簾卷起湘川竹。分得西州數點山。

王利賓

利賓字茂實。襄城人。朴直純素。作詩有古意。似其爲人。然亦未嘗以示人也。家與衛昌叔隣居。而不相往來。計平生所交。唯不肖而已。予一日過襄城。知茂實病。就臥內候之。乃見壁間所黏五言古詩十數首。竄改重疊。往往可傳。然後知茂實所以交予者。特以詩故耳。渠既不言。予亦無從知之。惜登時不謄寫。今忘之矣。

題扇頭

輕紗畫竹雀。柄短不盈握。暑氣正憑陵。清風一何邈。

孫益

益字德裕。秀容人。嘗從先大夫學詩。

送張安中還雲中

名保極。雲朔名士。

相送還相送。臨分手重分。驕驄欣得路。鴻雁惜離羣。木落黃華露。城低紫塞雲。中秋月正好。千

里謾思君。

郝先生天挺

天挺字晉卿。陵川人。家世儒素。伯父子颺有詩名。號東軒老人。先生少日有賦聲。早衰多疾。厭於名場。遂不復就舉。貞祐之兵。避于河南。往來淇衛間。爲人有崖岸。耿耿自信。寧落薄而死。終不一傍富兒之門。年五十七。卒於舞陽。臨終浩歌自得。不以死生爲意。其平生自處。爲可見矣。好問十四五。先人令陵川時。從先生學舉業。先生教之曰。今人賦學。以速售爲功。六經百氏。分磔綴緝。外或篇題句讀之不知。幸而得之。不免爲庸人。況一敗塗地者乎。又曰。讀書不爲藝文。選官不爲利養。唯通人能之。又曰。今世仕宦。多用貪墨敗官。皆苦于飢凍。不能自堅者耳。男子生世。不耐飢寒。則雖小事不能成。子試以吾言求之。先生工于詩。時命好問屬和。或言令之子欲就科舉。詩非所急。將無徒費口力耶。先生曰。君自不知所以。教之作詩。正欲渠不爲舉子耳。子思溫。字和之。孫經。字伯常。今居順天。

送門生赴省闈

青出於藍青愈青。小年場屋便馳聲。未饒徐淑早求舉。却笑陸機遲得名。嗟我再衰空眊矂。喜君初筮已崢嶸。此行占取鰲頭穩。平地煙霄屬後生。

孫邦傑

邦傑字伯英。雄州容城人。曾祖堅。國初有功。官至隴州刺史。伯英少日。住太學。有時名。所與游皆名士。興定初。知世將亂。棄家爲黃冠師。

燒笋

煨苗舊聞山谷語。勸耕還憶大蘇詩。傳將火候無多訣。留得天眞又一奇。未放錦棚開束縛。已看玉版證茶毗。白麻初拜驚燒尾。見此應慚富貴癡。

張璪

璪字君玉。大名朝城人。嗜作詩。年已老。而刻苦殊未減。爲人謹愿有禮。見稱諸公間。卒年六十八。字鏞鎮。今居鄉里。

送侯道士

十年走南北。黃塵汙人衣。翩翩夜啼鳥。一枝無可依。問君何所如。鳬鳥東南飛。恨我不得往。失脚穿與機。從君知不能。一笑人間非。何水無蒲魚。何山無蕨薇。終當拂衣去。往叩雲山扉。

徐好問

好問字裕之。永寧人。

龍門

疏鑿而來道路通。行人萬古翠微中。南山山寺題詩滿。一字何曾到禹功。

呂大鵬

大鵬字鵬舉。密縣人。自言宋名相申公之裔。宣宗頻歲南伐。鵬舉作詩欲以撼主兵者云。纔掖無由挂鐵衣。劍花生澀馬空肥。燈前草就平南策。一夜江神泣涕歸。其以氣岸自許。皆此類也。

夏日北渡後作

旋移石枕拂藤床。細灑槐陰趁晚涼。大地嗷嗷困爐鼎。老天不肯下殘陽。

高永

永字信卿。出于盤陽大族。父元。字善長。教信卿作舉子。讀書略通。即棄之去。爲人不顧細謹。有幽并豪俠之風。賓客入門。則盡家所有者爲具。不爲明日計。人以此愛之。貞祐初。避兵太原。與李長源居于廣平寺。有盜穴牆而入。長源性恒怯。聞騷罕聲。噤不敢語。盜盡挈信卿所有而去。長源徐曰。綠林之子至矣。於是信卿生理大狼狽。南渡。居嵩州。出入屏山之門。其學遂進。初名夔。字舜卿。又名揆。屏山改焉。眞定王之奇士衡。攻雜學。屏山目爲怪魁。王從之內翰。爲賦善哭詩。奉聖馬餌升公敢爲大言。著書十萬言。號北新子。大略以談兵爲主。且曰。古人兵法非不盡。但未有

北新子五十里火雨耳。信卿皆與之游。故其詩豪宕謫怪。不爲法度所窘。有冰柱雪車風調。觀咀龍篇及大雨後見寄。可槩見矣。正大壬辰。病沒於京師。年四十六。

跋賈天升所藏段志寧山水

蒼壁雲氣湧。長松風雨寒。湍流壁山出。玉虹飲溪灣。胸中無雲夢。筆底無江山。想見破墨初。布袖蛟龍蟠。壯觀駭魂魄。萬象本自閑。寒齋靜相對。遠意空追攀。

曹用之

用之歸德人。幼有賦聲。屢中甲乙。詩亦有功。嘗戲作鬼仙語云。瀏瀏竹間雨。熒熒牕下燈。相逢不相顧。含淚過巴陵。詩有本事。中山楊正卿能道所以然。真人作鬼語也。

憶舊

花鳥巡簷喚曉晴。喚來和氣滿春城。春風二十年前客。養酒青梅也後生。

趙達夫

達夫太原人。性嗜讀書。而不事科舉。南渡後。居緱氏山中。安貧守分。故終世窮悴。壬辰之兵。遇害。

紅梅

西湖句好已成塵。蠟點都能幾許春。乞與瓊兒薄梳洗。才情留待月中人。

柳

楊柳攙春不耐秋。十分憔悴儘風流。水邊沙際風煙冷。收拾殘陽合暮愁。

邢安國

安國字仲祥。沁州武鄉人。少日有賦聲。四十歲後。即不應科舉。以詩酒自娛。避亂客泌陽十餘年。後北歸。備極艱苦。其見於詩者如此。往時李長源傳仲祥柳花一詩。渠甚愛之。今以丹崖集校之。與傳者不同。當是長源曾與商略之耶。

楊花

細點輕圓轉復飄。隋家堤岸霸陵橋。非綿非絮寒無用。如雪如霜暖不消。狂惹客衣知有恨。巧尋禪榻故相撩。陂塘回首浮萍滿。依舊春風擺翠條。

過唐州西李口

白沙翠竹溪上村。漁家賣魚喚行人。西風吹皺一溪水。水光日影金鱗鱗。

張溫

溫字元佐。上黨人。祖仲容。字才翁。宋末登科。仕至屯田員外郎。以好士名天下。致仕後。有詩云。病身衰退謝明朝。北洞閑眠晝寂寥。十畝晚禾煙冉冉。一林脩竹雨瀟瀟。黑花遮眼秋不落。白雪

撲頭春未消。世事悠悠吾老矣。一壺濁酒且逍遙。至今爲鄉里所傳。元佐泰和六年。李演勝乙科登第。詩樂府俱有名于時。

感懷一首

彌月不出門。出門沙漲東風昏。老樹擺撼轟雷奔。鬼物叫嘯山前村。僑居客子驚神魂。歸來邊屋尋蘭蓀。蘭蓀落索靈苗髡。主人醉倒老瓦盆。衣袖半帶淋漓痕。芸芸蕭艾同歸根。天生天殺何怨恩。糟床與翁共清渾。絕勝被髮叫帝閭。

馬舜卿

舜卿名肩龍。以字行。宛平人。先世遼大族。有知興中府者。故又號興中馬氏。祖大中。國初登科。節度全錦兩州。父成誼。字宜之。張楫勝登科。京兆路統軍司判官。舜卿在太學。有賦聲。宣宗初。人有告宗室從坦殺人。從坦字履道。一時賢將帥處猜嫌之地。人以爲必死。而不敢言其冤。舜卿以太學生上書。大略謂從坦有將帥材。方今人物。無有出其右者。臣一介書生。無用於世。願代從坦死。留爲天子將兵。書奏。詔問汝與從坦交分厚耶。舜卿對。臣知有從坦。而從坦未嘗識臣。從坦冤。人不敢言。臣以死保之。宣宗感悟。赦從坦。授舜卿東平錄事。委行臺試驗。宰相侯莘公與之語。不契。留數月罷歸。將渡河。與排岸官紛競。筐中搜得軍馬糧料名數。及利害事目。疑其姦人之債。

伺者。繫歸德獄根勘。適從坦至。立命出之。正大四年冬。薄游鳳翔。德順州將愛申。以書招舜卿。舜卿欲往。鳳翔總管以敵兵勢甚張。吾城可恃。德順不可守。勸勿往。舜卿曰。愛申平生未嘗識我。一見爲知己。我知德順不可守。我往必死。然以知己故。不得不死也。乃舉行囊付族父明之爲死別。冒險而去。旣至。不數日受圍。城中義兵七八千而已。州將假舜卿鳳翔總管判官。守禦一以委之。凡受攻百日。食盡乃陷。軍中募生致之。不知所終。時年五十三。詔贈某官。配食褒忠廟。舜卿年少時過襄垣。題詩酒家壁。辭氣縱橫。時輩少有及者。如云。玉鞭再過長安道。人面依前似花好。殷勤勸我梨花春。要看尊前玉山倒。他語類此。

會州道中

山腰薄雪眩朝暉。未放陽和入燒痕。一片長安世情月。梨花院落幾黃昏。

諸相

劉曹王豫

豫字彥由。阜城人。仕宋。知濟南府事。汴京下。立張邦昌爲大楚皇帝。宋滅楚。更立彥由。國號齊。建元阜昌。八年廢爲蜀王。遷黃龍府。改封曹。有集十卷行于世。二子麟猷。孫通。海陵朝參知政事。四世孫瑛。今在太原。

雜詩六首

竹塢人家瀕小溪。數枝紅杏出疏籬。門前山色帶煙重。幽鳥一聲春日遲。
風荷柄柄弄清香。輕薄沙禽落又翔。紅日轉西漁艇散。一川山影暮天涼。
古渡停驂日向沉。淒涼歸思梗清吟。碧山幾點塞天闊。紅葉一林秋意深。
倚崑蕭寺據危崖。丈室軒窗面水開。雪霽暮寒山月上。數竿脩竹一枝梅。
晝色晴明着色圖。山光凝翠接平湖。煙嵐自古人難畫。遠即深深近却無。
寒林煙重暝棲鴉。遠寺疎鐘送落霞。無限嶺雲遮不斷。數聲和月到山家。

客館

雪消北嶺安排暖。寒入東風阻節春。絕塞亂山圍古驛。他時說着也愁人。

杜丞相充

充字公美。相州人。仕未知滄州。歸國拜尙書右丞相。領中山行臺。以壽終。

塵

汨汨勞生爲爾忙。只除不到白雲鄉。步回洛浦生羅襪。歌斷秦樓款杏梁。閑撲衣襟迷遠望。靜穿窗隙鎖斜陽。帝城別有風流在。輦路春風十里香。

虞令公仲文

仲文字質夫。世南之裔。武州寧遠人。仕爲遼相。歸朝授樞密使。平章政事。封秦國公。四歲作詩。賦煎餅有魚目蟬聲之句。人以神童目之。

雪花四歲作

瓊英與玉藥。片片落前池。問着花來處。東君也不知。

張丞相孝純

孝純字永錫。滕陽人。宣和末知太原。國兵圍。守踰年。人相食幾盡。乃下。朝廷憐其忠。換相職後。以相齊致仕。汴京建行臺。起爲左丞相。踰年得請歸鄉里。二兄尙安健。鄉人爲作三老圖。薨諡安簡。子公藥。字元石。昌武軍節度副使致仕。孫觀。字彥國。世爲文章家。曾孫厚之。字茂弘。承安二年進士。

中運使寄酒。清明日到。以詩謝之

芳樽到日恰清明。似與嘉辰默計程。擬助林園延勝賞。肯容桃李落繁英。老來官爵渾無味。閑裏杯盤却有情。見說使車臨岱麓。儻能相過共飛觥。

張左相汝霖

汝霖字仲澤。遼陽人。家世貴顯。父浩。字浩然。以門資仕。揚歷中外。遂升端揆。進拜太師。封南陽郡王。五子。仲澤平章政事。莘國公。汝爲字仲宣。河北東路轉運使。汝翼仕不達。皆進士也。汝方字仲賢。自號丹華老人。汝猷字仲謀。俱至宣徽使。父子兄弟。各有詩傳于世。王子端內翰。太師之外孫。其淵源有自云。

春溪

黯黯春愁底處消。小桃無語半含嬌。東風不管前溪水。暖綠溶溶拍畫橋。

劉右相長言

長言字宣叔。東平人。宋相莘老之孫。而學易先生斯立之猶子也。父蹟。年三十五。終於儀真令。工詩能文。有南榮集傳東州。今獨予家有之。宣叔正隆宰相。詩文能世其家。今不復見矣。

通叔以詩送古鏡爲長言生日之壽。次韻謝之

綵衣祿隱非臞仙。猶有向來文字緣。都城一別兩歲晚。寄聲勞苦常相先。人間始生俗禮重。而我永感方頽然。遠憑詩句致奇物。欲挽暮景迴虞淵。規摹九寸函大方。古製不作菱花妍。開奩拂拭愧陋質。但喜虹氣浮晴天。夫君久要心不遷。期與鐵杖論清堅。保身賴此孤月圓。明年上印歸行由。

右相文獻公耶律履

履字履道。東丹王之七世孫。學通易太玄。至於陰陽歷數。無不精究。嘗以鄉賦一試有司。以露索爲恥。遂不就舉。蔭補國史掾。興陵朝。累遷薊州刺史。入翰林爲修撰。歷直學士待制。禮部尙書。特賜孟宗獻榜進士第。俄預淄王定冊功。拜參知政事。明昌元年進右丞。薨年六十一。興陵嘗問宋名臣孰爲優。履道以蘇端明軾對。上曰。吾聞軾與王詵交甚款。至作歌曲。戲及姬侍。非禮之甚。尙何足道耶。履道進曰。小說傳聞。未必可信。就使有之。戲笑之間。亦何得深責。世徒知軾之詩文人不可及。臣觀其論天下事。實經濟之良才。求之古人。陸贄而下。未見其比。陛下無信小說傳聞。而忽賢臣之言。明日。錄軾奏議上之。詔國子監刊行。自號忘言居士。有集傳于世。三子。辨才武廟署令。善才工部尙書。楚才中書令。四孫。鈞、鉉、鏞、鑄。

史院從事日感懷

不學知章乞鑑湖。不隨老阮醉黃壚。試從麟閣諸賢問。肯屑蘭臺小史無。一戰得侯輸妄尉。長身奉粟媿侏儒。禁城鍾定燈花落。坐拊塵編惜壯圖。

張平章萬公

萬公字良輔。東阿人。正隆二年進士。仕長山令。有惠政。人爲立祠。入爲右司員外郎。太師淄王

愛之。許以宰相器。明昌初。累遷御史中丞。以言事件旨。除彰國軍節度使。召爲大興尹。拜參知政事。以母老乞歸養。出判東平河中濟南。丁內艱。起復。擢平章政事。封壽國公。爲相。知大體。有教旆耆艾之目。旣致政。而眷顧未衰。復起判濟南。安撫山東。便宜行事。未幾得請。薨於家。諡文貞。繪像衍慶宮。配享章宗廟廷。

戊戌二月中旬登稷山清樹

間因推案朝還暮。危坐不知春淺深。今日簷間看風色。一株紅杏暗驚心。

董右丞師中

師中字紹祖。邯鄲人。後徙洛州。皇統九年進士。承安中。入政府。直道自立。而以通材濟之。泰和初。元妃李氏方寵幸。兄喜兒爲宣徽使。有楊國忠之權。一日。德州教授田庭方上書言事云。大臣持祿。近臣怙寵。此言路之所以塞也。道陵顧謂紹祖言。大臣持祿。當謂公等。近臣怙寵者爲誰。時喜兒侍立殿上。紹祖倒笏指之曰。莫非謂李喜兒之屬否。上領之。紹祖嘗言。作宰相不難。但一心正。兩眼明足矣。少日。以談諧得名。及在相位。亦未嘗廢談笑。然不害其爲國朝名相也。俄致政。賜第京師。後三年薨。有燕賜邊部詩傳於世。紹祖師王內翰彥潛。而與之同榜登科。彥潛沒後。待其子恩禮殷重。不減骨肉。論者謂孫鐸振之事其兄明之。張穀伯英愛其弟伯玉。舉世無與爲比。

至於紹祖之待其師之子。則古所未有也。有漳川集傳于家。

自臨洮還

臨洮仍是漢家城。漢家城在臨洮。漢人所稱。

積石相望十驛程。西略河源東並海。此身何地不經行。紹祖之孫濟剛記此詩末句。又

作塵埃風雨嘆勞生。

孫太師鐸

鐸字振之。恩州人。大定十三年進士。明昌中。擢戶部尚書。時已有相望。及考滿。以戶曹繁重。且未有可代者。特旨進一官再任。而同列二人。俱以入相矣。振之賀席中。戲舉青州老柏院布衣張在詩云。南隣北里牡丹開。公子王孫去不回。惟有庭前老柏樹。春風來似不曾來。爲御史所劾。降授同知河南府事。有以詩送之者云。想到洛陽春正好。南隣北里牡丹開。聞者皆大笑。振之後入政府。遷尚書右丞。薨。贈太子太師。作詩甚多。其賦玉簪。有披拂秋風如有待。裴回涼月更多情之句。甚爲詩家所稱。

癸亥清明日

翛然一室暗塵凝。兀兀端如打坐僧。習氣未除私自笑。短檠還對讀書燈。

梁參政瑄

瑋字國寶。別字瑩中。范陽人。大定十六年進士。歷州縣。稍遷警巡使。治尙嚴肅。權貴歛迹。朝廷知其才。累試繁劇。由中都路轉運使拜戶部尙書。俄參知政事。資方正。敢言大事。北兵動。立和議。人有笑其懦者。卒如其言。未幾。薨于位。虎賊咤曰。梁瑋在。族矣。其爲人可知。

留題長平驛

秦趙均爲失霸圖。起何殘忍括何愚。殺降未見無禍者。累將其能有種乎。日暮悲風噎丹水。夜深寒月照頭顱。山名也。快心千載杜郵劍。人所誅耶鬼所誅。

賈左丞益謙

益謙字亨甫。本名守謙。避哀宗諱改焉。宣宗朝。參知政事。出知濟南。移鎮河中。南渡後。召拜左丞。尋致仕。居鄭州。哀宗即位。史官乞因宣廟實錄。遂及衛紹王。初。虎賊旣弑逆。乃立宣宗。宣宗之人。至謂衛王失道。天命絕之。虎實無罪。且於主上有推戴之功。獨張信甫上章言虎賊大逆不道。當用宋文帝誅傅亮徐羨之故事。章奏不報。爾後舉朝以大安崇慶之事爲諱。及是。謂亨甫大安中嘗拜御史中丞。宜知衛王事。乃差編修官一人就訪之。亨甫知其旨。謂來者言。知衛王莫如我。然我聞海陵被弑。而世宗皇帝立。大定三十年。禁近能暴海陵塾惡者得美仕。史官修實錄。誣其淫毒狼鷺。遺臭無窮。自今觀之。百可一信耶。衛王勤儉。慎惜名器。較其行事。中材不能及者多。

矣。吾知此而已。設欲飾吾言以實其罪。吾亦何惜餘年。朝議偉之。正大三年。年八十薨。子賢卿、頤卿、翔卿。皆以門資仕。今一孫仲明。在東平。

贈答史院從事

見說才名自妙年。多慚政府舊妨賢。物華天寶無今古。鳳閣鸞臺孰後先。鄭圃道尊何敢望。濟南書在子當傳。莫言老眼昏花滿。及見風鵬上九天。

丞相壽國高公汝礪

汝礪字崑甫。應州金城人。大定中進士。揚歷中外。居戶曹三司爲最久。相宣宗十年。小心畏慎。夙夜匪懈。篤于古人造膝詭辭之義。謀謨周密。人莫得而聞。元光末。宣宗上仙。公亦薨于位。君臣之契。義均同體者。於斯見之。平生嗜讀書。南渡之後。機務倥偬。未嘗一日廢書不觀。臨終留詩。有寄謝東門千樹柳。安排青眼送行人之句。時年七十一。諡□。配享宣宗廟庭。至今士論。謂公才量渾厚。足爲守成之良相。恨所遭不時耳。

雨後

時雨雨三日。田家家萬金。有年天子慶。憂國老臣心。

胥莘公鼎

鼎字和之。代州繁峙人。父持國。大定中爲太子司藏。有功母后家。章宗即位。擢拜尙書右丞。和之大定二十八年進士。至寧初。都城受兵。由戶部尙書參知政事。宣宗即位。除泰定軍節度使。不赴。改判大興。貞祐二年。拜尙書右丞。車駕南渡。出爲汾陽軍節度使。移知平陽。權河東南路宣撫使。四年。授樞密副使。權右丞。兼職如故。五年正月。朝京師。進平章政事。封莘國公。行臺關中。未幾。兼左副元帥。明年。以溫國公致政。進封英。行臺衛州。以病薨於位。雷希顏爲作神道碑云。黃霸爲良吏稱首。及爲丞相。與張敞論列。功名大減。王允當漢祀之衰。計誅董卓。近古社稷臣。然不赦涼州人。旋致催汜之禍。蕭俛之清介。崔植之論議。皆足爲唐名臣。而俛議銷兵。植餓朱克融輩。不畀一官。遂再亂河朔。彼或量不足。或才略有所窮。權不足以濟事。智不足以知時故也。以姚崇之賢。惟其不知道。未免爲掾時之相。其他可知也。國家有通明相曰英國胥公。尙兼數公之長。予謂希顏此論。似涉過差。至于爲國朝名相。以度量雄天下。則在公爲無媿矣。在長安日。乞致仕表云。興造功業。方聖主有爲之時。表裏山河。豈愚臣養病之地。送弟有之云。世事正須高着眼。宦途休厭少低頭。他文類此。弟恆常之。子嗣祖。今在燕中。

送弟恆作州

男子四方志。人生五馬榮。君恩何以報。民政不宜輕。御物當存恕。存心要盡誠。勿矜新號令。姑

守舊章程。歛暴單貧困。囚淹狡僞萌。慈柔難禁暴。苛急必傷生。東郡吾將老。西陲敵未平。一生能幾別。四事果難并。方此對床樂。愴然分袂驚。荒詩何足記。聊寫弟兄情。

張左丞行中

行中字信甫。莒州日照人。祖辛。鎮西軍節度副使。父暉。御史大夫。以武安軍節度致仕。兄行簡。易無體勝第一人。信甫大定二十八年進士。衛紹王朝。虎賊已除名爲民。賂遺權貴得復用。信甫言其必反。及弑逆。自爲太師尙書令澤王。信甫時爲禮部尙書。人謂必爲所殺。甚危之。一日。虎下禮部鑄監國寶。信甫持不可。虎雖怒。然亦竟不能殺也。宣宗即位。授參知政事。丞相高琪專權用事。聲勢焰焰。人莫敢仰視。議論之際。唯信甫與之抗。朝廷稱焉。所居拙軒。有爲作銘者。其引云。發凶豎未形之謀。則先識者以爲明。犯強臣不測之威。則疾惡者以爲剛。蓋實錄云。元光末。出爲靜難軍節度使。哀宗即位。首命召之。遷尙書左丞。後二年致政。卒於崧山之崇福宮。信甫家世儒素。雖位宰相而奉養如寒士。日書經史五百字爲課。寒暑不廢者四五十年。故於書無所不讀。詩殊有古意也。

右丞文獻公所畫張果像

古來人物畫爲難。驚見仙公樹石間。莫把丹青名右相。太平勳業在人寰。

楊戶部慥

慥字叔玉。代州五臺人。承安五年進士。歷州縣。入爲尙書省令史。拜監察御史。侍御史。京西大農司丞。京南司農卿。戶部侍郎。權尙書。自入戶曹。即有相望。資雅重。事無巨細。處之皆有法。至於知朝廷大體。則又非他人所能及也。京城受兵。權參知政事。明年。卒於河平。叔玉文工於詩。而人不以能文稱。特未見其文耳。

過司竹監有懷王監正之

不見崧丘跨鶴仙。才名留得萬人傳。春郊漬酒傷今日。夜雨論文記昔年。宰樹謾懸公子劍。高山已絕伯牙絃。故居脩竹青青在。寂寞終南落照邊。

乾陵

牝雞一啄血波流。天下何緣不姓周。今日阿婆心力盡。乾陵禿似老僧頭。

狀元

鄭內翰子聃

子聃字景純。大定人。少日有賦聲。時輩莫與爲敵。天德三年。弟三人登科。士論仍以爲屈。而海陵不之許也。正隆二年。詔景純再試。擇能賦者八人。先以題付之。以困景純。且將視其中與否罪。

賞之。

御題天賜勇智正萬邦。海陵謂侍臣。漢高祖諱不避之可乎。乃改作萬國。

及開卷。景純果第一人。楊伯仁、張汝霖中選。劉幾綦戩、李

師顏輩皆被黜。海陵終不以景純爲工。與被黜者兩罷之。趙獻之賀啓云。丹桂一枝。不失舊物。青錢萬選。無媿古人。其爲名流所稱道如此。累官吏部侍郎。改侍講學士卒。其賦醢醢。有玉斧無人解修月。珠裙有意欲留仙之句。甚爲詩家所稱。

即事

一錢不直程衡尉。五斗解醒劉伯倫。讀罷離騷解衣臥。門前花柳自爭春。

孟內翰宗獻

宗獻字友之。開封人。大定三年。鄉府省御四試皆第一。供奉翰林。曹王府文學。兼記室參軍。以疾尋醫。久之。授同知單州軍州事。丁母憂。哀毀致卒。劉無黨題其詩卷後云。簪紱忘情累。山林閱歲陰。選官堂印手。說法老婆心。友之深於內典。世路嗟前却。人生變古今。公乎真不死。名姓斗之南。相

人孔嗣訓挽云。二十年間事。才名一夢新。衰羸驚喪母。哀毀竟亡身。魂返愁楓夜。情留淚草春。

黃公酒壚在。此去只悲辛。汴人高公振特夫云。見說平生夢。前途盡目前。友之未第時。夢中預見前途所至。于今皆驗。乘

除雖有數。凶禍竟何緣。禮樂三千字。才名二十年。仁人遠如許。無路問蒼天。又云。誰謂詩成識。

清冰果自焚。

友之雪燭詩。固知規火終無盡。誰謂清冰也自焚。未幾下世。

人嗟埋玉樹。天爲落文星。

友之隣舍李生言。六月中。連二明星隕于友之所居虛靜軒前。數詩雖

不盡工。姑并記之。有以見先生於出處之際。死生之變。造物者皆使之前知。其以天下重名界之者。爲不偶然云。

龔平甫森玉軒

古人借宅亦種竹。大是饕奇心未足。高齋閒有萬琅玕。坐對懷山飲秋綠。官閑勝日無一事。尊酒不空仍有肉。他時剝啄叩君門。高枕矮床容我宿。

舊蓄一琴。棄置者久之。李君仲通爲張絃料理。仍鼓數曲。以詩贈之

我家箏奴憂樂同。塵埃滿面鬢髮蓬。徽絃不具挂牆壁。似慚無以娛衰翁。夫君一見爲披拂。坐使寒谷回春融。中含太古意味足。雜以新態來無窮。繁聲流水不可喻。直與造化相冥通。形神久已坐灰槁。一旦挾剔驅盲聾。寂然反聽杳難詰。但覺萬竅俱玲瓏。千金不得和扁力。誰謂起廢自枯桐。曲終玄旨竟誰會。非絃非指仍非空。拂衣欲往君且止。爲我乘興彈悲風。

張仲山枝巢

達人孤高與世疏。百年直寄猶須臾。歸來掩關聊自如。人之不足等有餘。樂哉下視濠梁魚。逍遙自契莊蒙書。異時馭氣游太虛。我知枝巢亦蘧廬。

柳塘

搖搖風影漾寒塘。靜裏亭臺日月長。不似隋家堤岸上。亂鴉殘照管興亡。

蘇門花塢

繞合雲山慰眼新。看花差後洛陽塵。從君小築繁香塢。不負長腰玉粒春。

閏月九日

南崖烘暖貯秋光。勝處相沿釀一觴。俚諺難逢兩寒食。閏餘今值小重陽。頭風比似常年愈。菊面渾如去歲黃。老矣歡遊定能幾。佳時此樂最難忘。

趙內翰攄

攄字子充。宛平人。自號醉全老人。

早赴北宮

蒼龍雙闕鬱層雲。湖水鱗鱗柳色新。絕似江行看清曉。不知身是趁朝人。

趙文學承元

承元字善長。先世汴人。兵火間寓旅河間。遂占籍焉。大定十三年詞賦第一人。除應奉翰林文字。兼曹王府文學。以疏俊少檢。得罪王府。貶廢久之。遇赦量叙。卒於臨洮。

探春

冰底流泉匹練飛。麴塵着柳不禁吹。杖藜恰到春生處。已有人家插酒旗。

張太保行簡

行簡字敬甫。大定十九年詞賦第一人。家世儒臣。備於禮文之學。典貢舉三十年。門生徧天下。南渡後。遷禮部尙書。太子太保。翰林學士承旨。薨諡文正。楊內翰之美銘其墓。稱敬甫天性孝友。太夫人疾。不解衣者數月。居喪哀毀過禮。事其父御史大夫。自幼至終。未嘗少違顏色。與諸弟居三十餘年。家門肅睦。人無間言。率勵子弟。不知爲驕侈。雖處富貴。與素士無異。平生無泛交。無私謁。慎勤周密。動循禮法。居無怠容。口無佞言。身無徑行。雖古君子無以加。故天下言家法者。唯張氏爲第一。言禮學言文章言德行之純備者。亦唯張氏之歸。有集三十卷傳於家。敬甫賦燕云。王氏局衣巷。盧家白玉堂。寒食云。餽粥雞黍留故事。風花鶯柳鬧春城。中秋云。露凝潮氣露瑤席。雲近清光護桂宮。此類甚多也。

六月二十九日北宮朝回

疏柳衰荷又一時。清波飛葉夢靈芝。年年踏盡溪邊路。不覺吳霜點鬢絲。

酬郭光秀才

疇昔君來事已睽。豈知今我又羈栖。波臣儻不辭升斗。鵲卵終當遇魯雞。

題子端雪溪小隱圖

出處皆天豈自由。仙標終合冠鰲頭。不妨貌取黃華景。時向鈴齋作臥游。

張內翰檄

檄字巨濟。先世泰州長春人。有官於山陰者。遂占籍焉。曾祖頤宗。銀青榮祿大夫。祖惠。懷遠大將軍。父天白。號縣簿。巨濟明昌五年詞賦第一人。仕至鎮戎州刺史。爲人有蘊藉。善談論。文賦詩筆。截然有律度。時人甚愛重之。陝州詩云。駭浪奔生馬。荒山臥病駝。永寧劉氏園亭云。菊老芙蓉衰。梨柿葉爭絳。叩門人不應。一犬吠深巷。此類甚多。

秋興

飄零千里道。牢落半生愁。殘月如新月。今秋似去秋。露濃花氣重。風細竹聲幽。何日清溪上。煙蕪一釣舟。

客中

絳脣花不語。青眼柳初眠。塵去尋芳馬。香來載酒船。歸期仍雁後。野興已鷗邊。惆悵無家客。春風又一年。

蓮實

水妃擎出紺珠囊。玉笋彫槃喜乍嘗。膚白已撓新藕嫩。心青猶帶小荷香。鬬餘翠鳥零珍羽。飛盡

黃蜂露蜜房。口腹累人良可笑。此身便欲老江鄉。

初夏

小園綠筍間朱櫻。點綴年華似有情。露浥葛巾晨氣潤。風隨竹簟晚涼生。閑窺黠鼠潛身處。靜厭飛蚊遶鬢聲。安得冷泉幽石畔。解衣盤礴樹陰清。

閻治中長言

長言字子秀。濟南長清人。客居兗州之磁陽。祖俊。行臺南勝。父時昇。任忠傑勝。曾高以來。登科者六世矣。子秀少日。慕張忠定之爲人。故名詠。避衛紹王諱改焉。幼孤。養於從祖。能自振厲。好學工詞賦。間有前人句法。性本豪俊。使酒任氣。及游京師。乃更折節。遂以謹厚見稱。酒酣耳熱。故態稍出。嘗以第一流自負。屏山獨深知之。不以爲過也。平生多奇夢。果魁天下。士論厭服。在翰苑十年。出爲河南府治中。被召。以道梗不得前。卒於亳州。子魯瞻、魯安。今一孫在洛州。

北齊行

天保大人襲世貴。未待齊成已無魏。讖裏方傳近水羊。夢中先兆攻城蜺。六君三世都能幾。二十八年翻手裏。細思孝靜靈運詩。天道好還非妄矣。

應制中秋

璧月當秋夜未闌。漢宮高會浹宸歡。塊蘇塵世三千界。珠翠瑤光十二欄。桂實飄香浮壽巽。露華零潤溢仙槃。都人側聽雲韶奏。共指天家是廣寒。

婆速道中書事

此地先經戰。人生苦未聊。泉源疏地脈。田壠上山腰。敗石平危徑。枯柴補短橋。曉煙明遠爨。暮雪暗歸樵。履滑心頻悸。梯危骨欲銷。解鞍空倒臥。無夢訖通宵。

送麗酒麗橙與秀實御史

曉馬朝回畫閣深。遙知春意領梅心。麗橙嬌軟麗尊小。聊助風流對淺斟。

閤立本職貢圖

謬謬昌周此一書。形容獎貢寫成圖。寧知右相無深意。莫指丹青便厚誣。

盤山招隱圖

畫出中盤望隱歸。鳴珂朝馬尙遲遲。賦詩未敢輕相誚。却恐吾山也勒移。

三門集津圖

津門未爲天下險。勿作駭相觀茲圖。偃月堂中李林甫。有人能寫此心無。

丁氏思祖亭

鶴野三千里。龜函五百年。人間仍舊德。龜筮得新阡。族屬東州望。衣冠鼻祖傳。異時離式墓。應識子孫賢。

李治中著

著字彥明。真定人。高才博學。詩文得前人體。工於字畫。頗尙玄言。承安二年經義第一人。在林七年。出副定州。召爲戶部員外郎。坐大中黨事。謫臨洮府判官。量移西京路按察司判官。遷彰德府治中。城再陷。避于塔上。兵人招降。大罵不從。掘塔倒而死。

觀音院書閣

門巷蓬蒿一尺深。小軒岑寂似山林。鳥聲落枕有高下。山色闕人無古今。客裏三年侵老境。床頭一易浣塵襟。晚涼癡坐忘言裏。滿地西風白玉簪。

異人

擬柳先生王中立

中立字湯臣。岢嵐人。博學強記。問無不知。少日治易。有聲場屋間。家豪於財。賓客日滿門。所以待之者。備極豐腴。其自奉則日食淡湯餅一杯而已。年四十喪妻。遂不更娶。亦不就舉選。齋居一室。枯淡如衲僧。如是三四年乃出。時人覺其談吐高闊。詩筆字畫皆超絕。若有物附之者。問之不

言也。閑閑趙公知平定。先生往謁之。與之詩云。寄語閑閑傲浪仙。枉將詩酒污天全。黃塵遮斷來時路。不到蓬山五百年。因言唐世士大夫五百人。皆仙人謫降。中有爲世味所著。迷而不反者。如公與我皆是也。一日。來都下。館於閑閑公家。中秋夜飲酒賦詩。且就公索墨水一罈。公如言與之。明旦。不告而去。壁間留龜鶴二字。廣長一丈。而墨水具在。不知以何物書之也。朝士來觀者。車馬填咽。都下競傳王先生仙去矣。久之。先生從外至。問二字以何物書之。不答。題詩其旁云。天地之間一古儒。醒來不記醉中書。旁人錯比神仙字。只恐神仙字不如。先生平生詩甚多。有醉袖舞嫌天地窄。詩情狂壓海山平之句。他亦稱此。人有問世外事者。亦一二言之。好作擘窠大字。往往瞑目爲之。筆意縱放。勢若飛動。閑閑公甚愛之。屏山嘗見先生商略前代人物。引先儒論議數十條在目前。如人人自相詰難。然後以己意斷之。以爲辨博中第一流人也。臨終。預剋死期。如言而逝。州將石倫。葬之忻州。時年五十六。予嘗從先生學。問作詩究竟當如何。先生舉秦少游春雨詩云。有情芍藥含春淚。無力薔薇臥晚枝。此詩非不工。若以退之芭蕉葉大梔子肥之句校之。則春雨爲婦人語矣。破却工夫。何至學婦人。先生晚年易名雲鶴。自號擬桐云。

中秋

素丸東溟來。飛上玻璃盆。聊揮五輪手。撥去萬里陰。印透山河影。照開天地心。人世有昏曉。我

未嘗古今。

屏山所傳作素執青溪來聊舒五輪指

雜詩四首

華山宮殿白雲封。不見當年打睡翁。貪看終南山色好。不知紅日下前峯。
獨跨蒼虬下太清。春風萬里月華明。因君感激爲君說。鑿破天機我也驚。
雲葉粼粼皺碧空。笙簫遞響入天風。忽驚風浪耳邊急。不覺形神來世中。
此生休更問浮名。名利區區不暫停。我有一丸天上藥。用時還解濟蒼生。

題裕之樂府後

常恨小山無後身。元郎樂府更清新。紅裙婢子那能曉。送與凌煙閣上人。

王先生予可

予可字南雲。吉州人。父本軍校。南雲亦嘗隸籍。年三十許。大病後忽發狂。久之能把筆作詩文。及說世外恍惚事。南渡後。居上蔡。遂平。鄆城之間。在鄆城爲最久。遇文士則稱大成將軍。於佛前則諦摩龍什。於道則騁天玄俊。於貴游則威錦堂主人。爲人軀幹雄偉。貌亦奇古。戴青葛巾。項後垂雙帶。狀若牛耳。一金鑲環在頂額之間。兩頰以青涅之。指爲翠靨。衣長不能掩脛。故時人有啗脛王之目。落魄嗜酒。每入城市。人爭以酒食遺之。夜宿土室中。夏月或尸穢在旁。蛆蟲狼藉。

不卹也。人與之紙。落紙數百言。或詩或文。散漫碎雜。無句讀。無首尾。多六經中語。及韻學家古文奇字。字畫峭勁。遇宋諱亦時避之。人或問以故事。其應如響。諸所引書。皆世所未見。談說之際。稍若有條貫。則又以誕幻語亂之。麻知幾、張伯玉與之游最狎。說其所詩。以百分爲率。可曉者才二三耳。題崧山石淙云。石裂雲華漬月秋。蓋石淙之石。皆狀若湖玉。其高有五六十尺者。石之文。如蟲蝕木。如太古篆籀。奇峭秀潤。一一在潭水中。親到其處。知詩爲工也。蔡州北懸壺觀仙榆云。壺樹苔波月漬皴。醉後云。一壺天地醒眠小。宮體云。萬疊雲山飛小雁。射虎首句云。風色偃貂裘。即開筆自戲云。此虎來矣。樂府云。唾尖絨舌淡紅甜。又自戲云。欲下犁舌獄耶。和太自宮詞云。金盆水不暖。翠雀啄晴苔。又云。鳳蹴瑤華散。龍銜桂子香。西瓜云。一片冷截潭底月。六彎斜卷隴頭雲。烹茶云。簾捲綠陰花外月。玉山冰雪醉扶翁。凌霄花云。啼鳥倒銜金羽舞。驚蛇斜傍玉簾飛。威錦堂樂府云。鳳環捧席帶香屏。鯨杯倚伎和雲捲。屏疑作憑此類尙多。人亦多贈南雲詩者。李子遷云。石鼎夜聯詩筆健。布囊春醉酒錢麇。真南雲傳神詩也。壬辰兵亂。爲順天軍將領所得。知其名。竊議欲挈之北歸。館於州之瑞雲觀。南雲明日見將領。自言云。我不能住君家瑞雲觀也。不數日病卒。後復有見之淮上者。

宮詞

水曲朱門漪漾漫。一簾花雨月波寒。金閨背襯鴛鴦冷。春困秋千立畫干。

南園湖石

翠雀銜雲墮翠蕪。砥峯倒影臥平湖。飛花不到穿簾月。高倚晴天一劍孤。

馴鶴圖

張伯玉家畫。宮人徐行。以手整級。一鶴後隨。謂之馴鶴圖。伯玉請賦詩。欽叔常苦其作詩多不用韻。限以敘來苦三字。

寢處粧鉛未捲釵。孤雲花帶月邊來。六宮簾幕金鸞冷。露溼晨煙啄翠苔。

雜詩二首

白露沙灘浸綠湄。小舟艤岸尙依稀。山回屏曲江連樹。春鎖人家深處歸。

暗悲秋色素團圓。一雨飄零颺霽寒。天淨長空煙歛處。彩虹金挂樹頭山。

宮體二首

紅葉鋪霜撼御階。繡蓮塵蹴襯羅鞋。袖沾鶯翅調黃語。墮却銜翹入鬢釵。

驕馬金籠藉草歸。翠鸞屏曲染紅霏。凭欄山色春風裏。喚得鶯兒燕子飛。

照了居士王彥

彥字子文。洛州人。承安中進士。資剛決不可犯。爲尙書省掾。知管差除。與郎官相可否。即棄官去。往來登封盧氏山中。改名知非。字無咎。自號照了居士。居山中二十年。布衣蔬食。井臼自親。時

人哀苦之。而知非處之自若也。少日爲文。工於四六。詩亦有功。

和二宋落花韻四首云。曾見嬌窺宋玉牀。忽驚遺夢到延涼。聚塵非分侵淒玉。流水

無情碎送香。錦囊漫散終隔面。綵灰雖吐若爲腸。蒼苔碧草無窮恨。木石癡兒亦自傷。可人未厭出鄉鄰。回首空殘翠幕涼。好事只傳懷夢草。殊鄉誰致返魂香。塵凝燕子慵開眼。煙暗馬嵬空斷腸。穠李絳桃俱異物。爲歌難露寫餘傷。綠影浮空只自傷。賞心死者未能忘。瓊枝不解留春色。銀燭空曾照夜粧。肺腹已傳蜂蜜盡。肌膚仍與燕泥香。情知青帝回車日。合有祥風老退房。韶華終竟合彫傷。獻笑榮懷忍遺忘。露壓不禁昏淚臉。風披無奈醉愁粧。芳菲頓減林園趣。狼藉空餘陌路香。却憶班姬浪辛苦。一生都得幾事房。

既學佛。作決定歌。禪家以爲證道。新豐之後。無有及者。初出京有詩云。親疎俱穩人倫了。婚嫁齊成俗意周。一筆盡鉤塵債斷。都無虧欠大家休。休休休。愛著何時是徹頭。風息浪平人已渡。笑攜明月下孤舟。崧山中云。撒手寧論萬丈崖。脚跟未肯點塵埃。東君也自魔君數。故着青紅眼底來。來何遲。去何早。二五不多十不少。一聲柄木徧虛空。誰識堂堂眞照了。又贈安居士國寶云。不招措大噴。不喚王子文。不惹禪和笑。不名王照了。他人怕人嫌。照了要人嫌。人人有面樹有皮。努力方便勤粧嚴。粧嚴也由賢。不然也由賢。鼻孔莫遣他人穿。又答國寶云。幻人誰拙復誰能。游戲何妨傀儡棚。凡事不堪君莫怪。儂家面目得人憎。又云。忽然識破虛空我。六合縱橫更有誰。正大壬辰。參知政事宗室思烈。行臺洛陽。以知非有重名。力致之。使參議臺事。城陷。不知所終。子升卿。有賦聲。早卒。

禪頌三首

昧已全拋大事憂。爲渠剛攪等閑愁。桑榆晚景無多子。針芥人身豈易投。閑日搆來忙日用。此生

迷却再生休。鼻頭捩轉從今始。看作回程火裏牛。

吾身非我底爲情。說着塵勞特地驚。五九盡時山更好。澗泉雲鳥自春聲。

放下情懷觸處安。生涯取取沒多般。褐衣檻褸聊遮赤。短髮鬚髯底用冠。一榻省緣資困歇。二匙

隨分了飢餐。也知苦澀人人笑。烈日初心不敢讓。

貞祐末。行臺都尉南征。獲武經進士李申之于盱眙。左右司郎中劉光謙達卿。潤文官李獻能欽叔。愛其才辯。欲活之。以避

嫌不敢也。乃託以問事機。令軍中羈管之。申之作詩贈主囚者云。一飯感君無地報。寸心許國只天知。明朝定作長淮鬼。馬革仍煩爲塞戶。又云。胸中萬古橫鍾阜。一死鴻毛斷不移。又獻書都尉云。金國歲歲南侵。計所得不能一二州。而軍力折耗殆盡。今歲此舉。亦曾慮人有議其後。何以禦之乎。爲公計者。不若此南軍大舉。斂兵而退。雖屢出無功。得全師而返。猶可自救。不然。師老食殫。困頓于堅城之下。讒間一行。則公受禍不久矣。某軍敗而死。固其所以。乞于盱眙城下。責以不降之罪。以一死見處。使人人人知之。則都尉亦于名教有功。書上之明日。申之謀遁歸。不果。乃殺之。欽叔說其臨刑。回面南向。欣然就戮。甚嗟惜之。予謂申之胸中萬古橫鍾阜。與王知非烈日初心不敢讓。皆烈士夫語。故附見于此。

無事道人董文甫

文甫字國華。潞人。承安中進士。爲人淳質。恬于世味。於心學有所得。人知尊敬之。而不知其所以得也。子安仁。亦學道。父子嘗閑居寶豐。閉戶不出。以習靜爲業。朝夕不繼。晏如也。國華歷金昌府判官。禮部員外郎。昌武軍節度副使。正大中。以公事至杞縣。自知死期。作書與家人及同官。又作詩貽杞縣令佐。詩畢。擲筆于地。以扇障面而逝。有和太白山明和尚牧牛圖詩。刻石於洛陽。其引云。夫人有等差。教分頓漸。上根之人。一聞千悟。不落階級。中智而下。必由漸進。此人牛次第。不得不立。心性動靜。微妙有無。學者所宜諦觀也。以人牧牛。是動而有制。從有以觀其微者也。

進進而不已。則漸至於回首馴伏。從無以觀其妙者也。有入于無。微及于妙。固善矣。又不如靜而無礙之爲愈也。靜而無礙。又不如兩忘雙泯之入神也。若夫人牛兩忘。明月獨照。恍然俱失所在。當是時也。吾將離形去智。神亦無功。同于大通。與道爲一。則向之人牛。亦筌蹄中一微塵耳。吾儒所謂盡心盡性者。無外於是。因借明和尙韻。再下一轉語。會心者必能知之。詩不錄。

秋夜

見即如無爐上雪。淡而有味水中鹽。齊行定惠千燈焰。淨識乾坤一鏡奩。

晝眠

莊周先我復天真。化蝶飛來管領春。我亦莊周周亦蝶。不知若箇是真身。

塞是堂

按劍人人駭夜光。蜀雞合道勝鸞凰。飛蛾可是無分別。直道油燈是太陽。

文中子續經

紛紛述作史才雄。聽似秋來百草蟲。不是春雷轟蟄窟。蚓蛇會得化成龍。

予嘗以王氏六經爲問。先生云。王氏六經是機道設教。雖孔子

亦然。但後人不能知之耳。因以此詩見示。

臨終詩四首

無情喪主沒錢僧。送上城南無事人。檢盡傳燈無盡錄。更無公案遮番新。生有地。死有處。萬牛不能移一步。一輪明月印天心。此是渠儂住處住。

白髮三千丈。紅塵六十年。只今無見在。虛費草鞋錢。

今古一輪月。分明印碧霄。門門蟾影到。處處桂香飄。不起眼中暈。何勞指上標。真空渾照破。歸去杖頭挑。

隱德

薛繼先

繼先字曼卿。猗氏人。少日三赴廷試。南渡後。隱居洛西山中。課童子學。事母孝。與人交。謙遜和雅。所居人化之。子純孝。字方叔。有父風。客有詐爲曼卿書。就方叔取物者。曼卿年已老。狀貌如少壯。人客不知其爲曼卿。而以爲方叔也。而與之書。曼卿如書所取物付之。雖其家人。亦不以語之也。監察御史石玠子堅。行部過曼卿。曼卿避不見之。或言君何無鄉曲情耶。曼卿曰。君未之思耳。凡今時政。未必皆善。石御史一有所劾。則必謂自我發之。同惡相庇。他日並鄰里有受禍者。其畏愼類此。正大末。司農卿楊慥叔玉。丞康錫伯祿。薦曼卿與汴人高仲振、武陟宋可、武清張潛、磁陽曹珏、大名王汝梅隱操不減古人。朝廷議授以官。以兵亂不果。曼卿喜作詩。工于賦物。如松

化石云。瘦見千年傲霜骨。鍊成一片補天心。時人稱焉。壬辰之亂。病沒於宜陽。仲振字正之。系出遼東。其兄領開封鎮兵。正之幼就舉選。年四十後。即以家業付其兄。挈妻子居嵩山。於書無不讀。而以易、皇極書爲業。安貧樂道。不入城市。山野小人。亦知敬之。王汝梅、張潛從之學。三人行山谷間。人望正之風袖翩然。如欲仙而未舉也。張、王說正之嘗遇異人。教之養生。呼吸吐納。日以爲常。靈氣時至。安坐不動。而骨節憂憂有聲。恍惚中時與真靈接對。所談皆世外事。旣不以語人。故無得而傳。潛字仲升。有志節。慕荆軻岳政之爲人。三十歲後。乃折節讀書。太學諸人。高其行義。有張古人之目。客崧山。從正之學易。五十歲始娶妻。妻魯山孫氏。亦有賢行。夫婦相敬如賓。負薪拾穗。行歌自得。大用與之同業。而生理優贍。憐高張之貧。時有餽餉。皆謝不受。鄉里爲仲升斷瓜田。瓜熟。仲升約中分之。以償其勤。衆不忍。但小摘而去。仲升亦棄瓜不收。衆如約。然後取食之。嘗行道中。拾得一斧。夫婦計度移時。乃持歸。就訪其主歸之。所居寺莊。有兄弟分財致諍者。其弟指仲升所居曰。我家如此。獨不畏張先生笑人耶。天興之兵。避於少室絕頂。時世已亂。寇敝暴橫。無復人理。仲升不甘與之處。閉口不食。七日而死。婦隨亦投絕澗中。汝梅字大用。律學出身。伊陽簿。秩滿遂不出。性嗜讀書。動有禮法。生徒以法理就學者。兼以經學授之。後生輩服其教。無敢爲非義者。可字予之。貞祐之兵。其姑嫁大姓藁氏。夫與子皆兵死。而貲產獨在。姑

以白金五十笏遺予之。予之受不辭。一日。姑得藥之疏。屬立爲後。挈之省外家。予之置酒會鄉鄰。且謂姑言。姑往時遺可以金。可以藥氏無子。故受之。姑今有子矣。此金藥氏物。非姑物也。我何名取之。因呼妻子昇金出。歸之藥氏。鄉里用是重之。大兵再駐山陽。軍中有聞予之名者。問知所在。質其子。使人招之。曰。肯從我者。禍福與公共之。不然。公之子死矣。親舊競勸之往。予之不從曰。吾有子無子。與吾兒之死與生。皆有命焉。豈以一子故。併平生所守者而亡之乎。其後予之竟以無子死。珏字子玉。早歲有賦聲。誠實樂易。世俗機械事。皆所不知。喜賓客。款於接物。無書生氣習。從之游者。樂之而不厭也。六人者。喪亂後。惟子玉居弘州。十二年乃終。

九日感懷

曼卿

衰年易感我今知。無訝騷人動楚悲。故國久拋兵劫後。佳辰多負菊華期。一時蘭艾同凋落。兩鬢雪霜仍別離。高世輸他陶靖節。悠然高興滿東籬。

過洛陽

予之

西來東去洛陽城。千尺浮圖了送迎。十日酒旗歌板地。白頭孤客可憐生。

寄人宰縣

仲升

縣務無難易。人才自異同。割雞良整屈。製錦要專工。積弊姦賊後。遺黎喘汗中。不存憂世志。底

用讀書功。嫉惡看平日。知君有古風。莫教循吏傳。獨載魯山翁。

載方言作
上聲呼

白髮感懷

子玉

少年豪舉氣如虹。今日蕭然一病翁。曉鏡祇添頭上雪。春風不綠鬢邊蓬。文章那作一錢直。燈火空勞半世功。擬築糟丘便歸老。醉鄉何者是窮通。

中州癸集第十

溪南詩老辛愿二十首

李講議汾二十五首

李戶部獻甫二十三首

司馬侍郎朴一首

滕奉使茂實八首

通理先生何宏中一首

醉軒姚先生孝錫三十二首

朱奉使弁三十九首

鑣然子趙滋一首

先大夫詩四十三首

敏之兄詩五首

三知己

溪南詩老辛愿

愿字敬之。福昌人。其大父自鳳翔來居縣西南女几山下。以力田爲業。敬之自號女几野人。年二十五。始知讀書。取白氏諷諫集自試。一日便能背誦。乃聚書環堵中讀之。書至伊訓。詩至河廣。頗若有所省。欲罷不能。因更致力焉。音義有不通者。搜訪百至。必通而後已。有一事闕十年者。由是博極羣書。於三傳爲尤精。至於內典。亦稱該洽。杜詩韓筆。未常一日去其手。作文有綱目不亂。詩律深嚴。而有自得之趣。性野逸。不修威儀。貴人延客。敬之麻衣草屨。足脰赤露。坦然於其間。劇談豪飲。旁若無人。高獻臣爲河南治中。聞其名。引爲上客。及獻臣爲府尹所誣。敬之亦被

訊掠。幾預一網之禍。自是人以敬之名爲諱。絕不與交。不二年。日事大狼狽。田五六十畝。歲入不足。一牛屢爲追胥所奪。竟賣之以爲食。衆雖嗷嗷。張口待哺。雅負高氣。不能從俗俯仰。迫以飢凍。又不得不與世接。其枯槁憔悴。流離頓踣。往往見之於詩。元光初。予與李欽叔在孟津。敬之自女兒來。爲之留數日。其行也。欽叔爲設饌。備極豐腆。敬之放筇而嘆曰。平生飽食有數。每見吾二弟。必得美食。明日道路中。又當與老飢相抗去矣。會有一日。辛老子僮仆柳泉韓城之間。以天地爲棺槨。日月爲含殮。狐狸亦可。螻蟻亦可耳。予二人爲之惻然。敬之佳句極多。如自憐心似魯連子。人道面如裴晉公。萬事直須稱好好。百年端欲付休休。院靜寬留月。窗虛細度雲。浪翻魚出浦。花動鳥移枝之類。恨不能悉記耳。

木栖云。吟窗醉几秋風晚。只許幽人箇裏知。三鄉光武廟云。萬山青遠一川斜。到其處知爲工也。

予嘗論敬

之。士之有所立。必藉國家教養。父兄淵源。師友講習。三者備而後可。喻如世之美婦。多出於膏腴甲族。薰釀含浸之下。閭閻間非無名色。一旦作公夫人。則舉步羞澀。曾大家婢不如。其理然也。故作新人材。言教育也。獨學無友。言講習也。生長見聞。言父兄也。至於傳記所載。西子乃苧蘿山采薪氏之女。越君臣教之容止。七日而納之王。遂能惑夫差。傾吳國。豈常理也哉。敬之落落自拔。耿耿自信。百窮而不憚。百辱而不沮。任重道遠。若將死而後已者三十年。亦可謂難矣。南渡以來。詩學爲盛。後生輩一弄筆墨。岸然以風雅自名。高自標置。轉相販賣。少遭指擿。終

死爲敵。一時主文盟者。又皆汎愛多可。坐受愚弄。不爲裁抑。且以激昂張大之語從臾之。至比爲曹、劉、沈、謝者。肩摩而踵接。李、杜而下不論也。敬之業專而心通。敢以是非白黑自任。每讀劉、趙、雷、李、張、杜、王、麻諸人之詩。必爲之探源委。發凡例。解絡脈。審音節。辨清濁。權輕重。片善不掩。微類必指。如老吏斷獄。文峻網密。絲毫不相貸。如衲僧得正法眼。徵詰開示。幾於截斷衆流。人有難之者。則曰。我雖不解書。曉書莫如我。故始則人怒之罵之。中而疑之。已而信服之。至論朋輩中。有公鑒而無姑息者。必以敬之爲稱首。蓋不本於教育。不階於講習。不出於父兄。而卓然成就如此。然則若吾敬之者。眞特立之士哉。

劉景玄。趙宜之。雷希顔。李欽叔。張仲經。杜仲梁。王仲澤。麻知幾。

亂後

兵去人歸日。花開雪霽天。川原荒宿草。墟落動新煙。困鼠鳴虛壁。飢鳥啄廢田。似聞人語亂。縣吏已催錢。

贈趙仲常

名憲。宜之從弟。詩有黃塵衰髮時隨脚。華髮蕭蕭老壓頭之句。

趙子年雖小。論詩樂最深。秋風凡幾首。冬日更多吟。老大吾無力。文章爾用心。荒山松竹底。莫厭數相尋。

過崧山

催老年光衰衰來。好懷知欲向誰開。箕山潁水春風裏。呼起巢由共一杯。

隆德故宮

蛇分鹿死已無秦。五十年來漢苑春。問着流鶯無一語。柳條依舊拂牆新。

同趙長水汎舟

洛水秦山晚自澄。孤洲煙樹綠相仍。波搖朗月浮金鏡。嶺隔華星斷玉繩。但覺轉船驚白鳥。豈煩揮鋏怒青蠅。風塵浩蕩飄蓬裏。愧似林宗陪李膺。

山寒

山寒春靜早關門。新月微光照短垣。可恨暮雲欺落景。却將殘靄助黃昏。

陋室

陋室何妨似燕窠。暮年終得返魚蓑。壺中日月時常好。枕上功名不足多。往古來今眞夜旦。高天厚地一置羅。鹿門幸有龐公樂。牛角徒爲甯戚歌。

亂後還三首

兵戈爲客苦思鄉。春暮還鄉却自傷。典籍散亡山閣冷。松筠憔悴野園荒。鶯銜晚色啼深樹。燕掠春陰入短牆。鄰里也知歸自遠。競將言語慰淒涼。

亂後還家春事空。樹頭無處覓殘紅。棠梨妥雪霏新雨。楊柳飄綿颺晚風。談笑取官驚小子。艱難爲客愧衰翁。殘年得見休兵了。收拾閒身守桂叢。

春來漂泊心情減。老去艱危氣力微。芳草際天愁思遠。干戈滿地故人稀。懷金躍馬時何有。問舍求田事已違。糲食弊衣聊自足。白頭甘息漢陰機。

題游彥明林園三首

先生未老厭儒冠。築屋栽籬守歲寒。經史日長常滿牀。魚蝦溪近得供盤。幽花入室無多種。瘦竹關情只數竿。蕭洒遠辭車馬跡。求官何必近長安。

城郭繁華斷往還。林園幽閑養高閒。花低煖藥斜窺水。竹亞晴梢巧避山。尊俎歲時君得意。風埃南北我何顏。丹房藥境游心久。不惜衰矜洗病孱。

不礙遙看冷翠微。儘教叢竹映窗扉。籬根傍水知魚樂。屋角鄰花鳥自歸。濁酒野芹安已久。華軒高馬到從稀。人間回首皆堪鄙。羨汝幽棲得所依。

贈劉庵主

劉遠貴族

蚤薄軒裳貴。高尋綺皓蹤。一囊閭里藥。六尺水雲筇。午枕眠芳景。晴簷望遠峯。柴門常不掩。應得野夫從。

函關

雙峯高聳大河旁。自古函關一戰場。紫氣久無傳道叟。黃塵那有棄繻郎。煙迷短草秋還綠。露浥寒花晚更香。共說河山雄百二。不堪屈指算興亡。

贈趙宜之二首

夫子今詞伯。胡爲遠帝京。青雲無轍迹。白髮有柴荆。鬼戲多年病。人高四海名。麟經方有缺。無惜繼丘明。

轉徙家無地。逢迎客有樽。光陰連病枕。天地一愚軒。霜雪青松古。風塵白壁溫。從渠投隙者。袞袞向金門。

送裕之往許州。酒間有請予歌渭城煙雨者。因及之

白酒留分袂。青燈約對床。言詩真漫許。知己重難忘。爽氣虛韓岳。文星照許昌。休歌渭城柳。衰老易悲傷。

寄裕之

青雲一別阮家郎。甚欲題詩遠寄將。好句眼前常踈過。佳人心上不曾忘。誰家秋月茅亭底。何處春風錦瑟旁。昌谷煙霞久寂寞。歡游還肯到三鄉。

山園

歲暮山園懶再行。蘭衰菊悴頗關情。青青多少無名草。爭向殘陽暖處生。

李講議汾

汾字長源。平晉人。系出鴈門。曠達不羈。好以奇節自許。避亂入關。京兆尹子容愛其才。招致門下。留二年。去之涇州。謁張公信甫。一見即以上客禮之。自是游道日廣。然關中無一人敢與相軒輊者。元光末。用薦書得從事史館。舊例史院有監修。宰相爲之。同修。翰長至置學士兼之。編修官專纂述之事。若從事則職名謂之書寫。特抄書小史耳。凡編修官得日錄。分受之。纂述既定。以藁授從事。從事錄潔本呈翰長。平居無事。則翰長及從事。或列坐飲酒賦詩。一預史事。則有官長掾屬之別。長源素高亢。不肯一世。乃今以斗食故。人以府史畜之。殊不自聊。高、張諸人。率以新進入館。史家凡例。或未能盡知。就其所長。且不滿長源一笑。故刊修之際。長源在旁。則蓄縮慘沮。握筆不能下。長源正襟危坐。讀太史公左丘明一篇。或數百言。音吐洪暢。旁若無人。旣畢。顧四坐。漫爲一語云。看秉筆。諸人積不平。而雷、李尤所切齒。乃以嫚罵官長。訟於有司。然時論亦有不直雷、李者。故證左相半。踰年不能決。右丞師公。以傷風化爲嫌。遣東曹掾置酒和解之。不得已乃罷。尋入關。明年驅數馬來京師。日以馬價佐歡。道逢怨家。則畫地大數而去。又明年。恆山

公仙在鄧之西山。長源往說之。署行尙書省講議官。旣而恆山與參知政事思烈相異同。頗謀自安。懼長源言論。欲除之。遁之泌陽。竟爲所害。長源孝友廉介。過人者甚多。寧寒餓而死。終不作寒乞聲向人。人亦以此愛之。平生以詩爲專門之學。其所得爲尤多。如洛陽才子懷三策。長樂鐘聲又一年。清鏡功名兩行淚。浮雲親舊一囊錢。煙波蒼蒼孟津渡。旌旗歷歷河陽城。長河不洗中原恨。趙括元非上將才。三輔樓臺失歸燕。上林花木怨啼鵲。空餘一掬傷時淚。暗墮昭陵石馬前。同輩作七言詩者。皆不及也。辛卯秋。遇予襄城。盃酒間誦關中往來詩十數首。道其流離世故。妻子凋喪。道塗萬里。奔走狼狽之意。雖辭旨危苦。而耿耿自信者故在。鬱鬱不平者不能掩。清壯磊落。有幽并豪俠歌謠慷慨之氣。此詩兵火中散亡。今就其少作。予所能記憶者錄之。

陝州

黃河城下水澄澄。送別秋風似洞庭。李白形骸雖放浪。并州豪傑未凋零。十年道路雙蓬鬢。萬里乾坤一草亭。八月崤陵霜樹老。傷心休折柳條青。

邠北

州北光風艷綺羅。南來扈從北人多。梨園法曲懷奴舞。月窟新聲倩女歌。紫禁衣冠出金馬。青樓阡陌瞰銅駝。薄游却憶開元日。常逐春風醉兩坡。

再過長安

細柳斜連長樂坡。故宮今日重經過。一時人物存公論。萬里雲山入浩歌。白髮歸來幾人在。青門依舊少年多。自憐季子貂裘敝。辛苦燈前讀揣摩。

汴梁雜詩四首

天津橋上晚涼天。鬱鬱皇州動紫煙。長樂觚稜青似染。建章馳道直于絃。犬牙磐石三千國。聖子神孫億萬年。一策治安經濟了。漢庭誰識賈生賢。

琪樹明霞五鳳樓。夷門自古帝王州。衣冠繁會文昌府。旌戟森羅部曲侯。美酒名謳陳廣座。凝笳咽鼓送華輜。秦川王粲何爲者。憔悴羈塵坐白頭。

樓外風煙隔紫垣。樓頭客子動歸魂。飄蕭蓬鬢驚秋色。狼藉麻衣浣酒痕。天塹波光搖落日。太行山色照中原。誰知滄海橫流意。獨倚牛車哭孝孫。

寥落關山對月明。客窗遙夜夢魂驚。二年岐下音書絕。八月河南風露清。萋萋暮愁生草色。迢迢秋思入蟲聲。誰知廣武英雄嘆。老却窮途阮步兵。

上清宮三首

憶昔秋風從茂陵。詞臣忝預漢公卿。瑤池宴罷西王母。翠輦歸來北斗城。石馬嘶殘人事改。劫灰

飛盡海山平。唯餘太一池邊月。伴我驂鸞上玉京。

蒼梧雲氣赤城霞。綿絡鈞天帝子家。仙掌高承九霄露。霓旌遙駐五雲車。昆明火劫驚人世。瀛海風濤撼客槎。醉裏忽逢王子晉。玉笙吹上碧桃花。

千劫塵緣謝吏曹。道山仙闕事遊遨。樓臺縹緲滄溟闊。宮殿森羅紫極高。幾代雲孫接仙李。千年王母醉蟠桃。詩成便欲還山去。猶待君王賜錦袍。

避亂陳倉南山。回望三秦。追懷淮陰侯信。漫賦長句

憑高四顧戰塵昏。鶉野山川自吐吞。渭水波濤喧隴阪。散關形勢輒興元。旌旗日落黃雲戍。弓劍霜寒白草原。一飯悠悠從漂母。誰憐國士未酬恩。

雪中過虎牢

蕭蕭行李戛弓刀。踏雪行人過虎牢。廣武山川哀阮籍。黃河襟帶控成臯。身經戎馬心逾壯。天入風霜氣更豪。橫槊賦詩男子事。征西誰爲謝諸曹。

清明

鳴珂振轂滿重城。春日綿綿老燕鶯。人在碧雞坊外住。澹隨流水過清明。

下第

學劍攻書護自奇。回頭三十六年非。春風萬里衡門下。依舊并州一布衣。

礪溪

封侯輸與曲如鉤。冷坐礪溪到白頭。老婦廚中莫彈缺。白魚留待躍王舟。

感寓述史雜詩五十首并引

正大庚寅。予行年三十有九。獻賦明廷。爲有司所病。遂有不遇時之嘆。皁衣斗食。從事史館。以素非所好。愈鬱鬱不得志。臥病中僻居蕭條。盡日無來人。緬維先哲。凡所以進退出處之際。窮達榮辱之分。立身行道。建功立事。關諸人事者。竊有所感焉。於是始自騷人屈平以來。下逮漢晉隋唐諸公。終之以遠祖雁門武皇。作爲述史詩五十首。以自慰其羈旅流落之懷。述近代則恐涉時事。故斷自唐以下不論。嗚呼。三百篇大抵皆聖賢感憤之所爲作也。余以愚忠謬信。獲譏於斯世久矣。非敢示諸作者。庶幾後世有揚子雲者出。或能亮予之宿心。是歲秋七月既望。并州人李汾引。

蘇客卿泰

游說諸侯獲上卿。賈人唇舌事縱橫。可憐一世癡兒女。爭羨腰間六印榮。

韓淮陰信

仗劍淮陰去復還。舉頭西望識龍顏。堂堂竟握眞王印。未害男兒辱胯間。

叔孫奉常通

秦時博士魯諸生。漏網驪山百丈坑。邂逅劉郎習綿蕞。便能彈壓漢公卿。

馬中令周

脚踏長安陌上塵。布衣西上欲誰親。君王不省常何策。憔悴新豐一旅人。

遠祖雁門武皇

死心唐室正諸侯。鐵馬南來隘九州。當日三垂岡上意。諸孫空抱腐儒羞。

擬張水部行路難

洛陽行人心欲折。半半西州信音絕。彈箏峽口兵塵高。半夜心懸隴山月。君不見。嗷嗷失羣鳥。淚盡眼流血。潼關晝閉漢使稀。安得慰我生離別。

雲溪曉泛圖

曉景淡明月。落影潭西丘。晴川挂煙樹。光拂雲河流。楓林入行色。關山生白頭。羨羨畫中人。億我秦川游。君帆渺何許。儻下滄浪州。滄浪吾有約。寄謝同盟鷗。

古月一篇爲裕之賦

古月天不收。敵君三萬秋。天孫弄明鏡。光湧雲間流。憶昔放逐江南州。金陵女兒歌權謳。草裹烏紗巾。散着紫綺裘。酒酣把玉笛。直欲捫參歷井騎斗牛。醉中呼兒搖雙舟。吾欲乘流下石頭。起來茫茫視八極。萬里只有元丹丘。丹丘子。游人間。風塵何爲往復還。玉華山人近招我。九日朝帝蒼梧山。

西歸

擾擾王城足是非。不堪多病決然歸。只因有口談時事。幾被無心觸禍機。日暮豺狼當路立。天寒鵲鴉傍人飛。終南山色明如畫。何限春風笳鼓肥。

避亂西山作

三月都門晝不開。兵塵一夕捲風回。也知周室三川在。誰復秦庭七日哀。鴉啄腥風下陽翟。草銜冤血上琴臺。夷門一把平安火。定逐恆山候騎來。

李戶部獻甫

獻甫字欽用。欽叔從弟也。兄欽止、欽若。皆中朝名勝。家故將種。而同時四進士。人門之秀。照映一時。欽用博通書傳。於左氏及地理之學爲精。爲人有幹局。心所到。則絕人遠甚。故時人有精神滿腹之目。歷咸陽簿。辟行臺掾。屬正大初。夏人請和。朝廷以馮子駿往議。欽用預行。夏使有口辯。馮善人。無以折之。往復之際。至以歲幣爲言。欽用不能平。從旁進曰。夏國與敝邑和好百年。今

雖易君臣之名。而爲兄弟之國。使兄而輸幣。寧有據耶。曰。兄弟且不論。宋日。曾與吾家二十五萬疋。典故具在。君獨不知耶。金朝必欲修舊好。非此例不可。欽用。作色曰。使者尙忍言耶。宋以歲幣餌君家。而賜之姓。岸然以君父自居。夏國君臣無一悟者。誠謂使者當以爲諱。乃今公言之。使者果能主此議。以從賜姓之例。敝邑雖歲捐五十萬。某請以身任之。夏使語塞。和議乃定。使還。朝廷錄其功。授慶陽總帥府經歷官。尋辟長安令。京兆行臺所在。供須之繁。急於星火。欽用所以處之者。常若有餘。縣民賴之以安。入爲尙書省掾。壬辰之兵。奏充行六部員外郎。守備之策。時相倚任之。以功遷鎮南軍節度副使。兼右警巡使。車駕東巡。死於蔡州之難。時年四十。所著詩書文。號天倪集者。留京師。欽用死。其家亦破。非同年華陰王元禮購得之。幾有人琴俱亡之恨。然則文字言語之傳與否。亦有數存於其間耶。

夏夜

銀潢淡淡沒疎星。一陣涼從雨後生。仰看浮雲成獨臥。數圍蛛網絡中庭。

九龍池春望

五年外地看清明。袖手低回過客亭。謝絮楚萍無定着。春光如我更飄零。

興慶池書所見

短短蒲菰刺水青。翠萍開處鑑波明。畫船轉過垂楊外。水面風來聞樂聲。

題黃華幽居圖

層層佛屋貼山腰。山下幽居勝午橋。物外人家無稅役。閑中生理足漁樵。雁跡遠障凌虛迴。人與高秋共寂寥。何處人間景如此。便應歸隱不須招。

長安行

長安道。無人行。黃塵不起生榛荆。高山有峯不復險。大河有浪亦已平。向來百二秦之形。祇今百二秦之名。我聞人固物乃固。人不爲力物乃傾。將軍誓守不誓戰。戰士避死不避生。殺人飽厭敵。自去。長安有道誰當行。黃塵漫漫愁殺人。但見蔽野雞羣鳴。河東游子淚如雨。眼花落日迷秦城。長安道。無人行。長安城中若爲情。

別春辭

東皇按轡來何遲。人間二月才芳菲。六十日春能幾時。不如意事常相隨。一聲啼鴉花片飛。把酒却與春別離。春緩歸。聽我歌。滔滔歲月如流波。貴憂孰與賤樂多。吾寧不欲列華鼎。馳鳴珂。香屏倚妓薦綺羅。人生賦分有定在。誰能買愁費天和。長安市上酒如海。跨驢徑上胭脂坡。酒酣醉舞雙婆娑。春自來去如予何。

秋風怨

疎星耿耿明天河。夜涼翠幕生微波。碧梧委葉傳金井。一夕秋風將奈何。春風令人和。秋風感人悲。妾愁自與秋風期。秋風爭管人別離。燈炮垂紅粉泥暗。龜甲屏風雲影亂。絡緯弔月啼不斷。蓮漏壓荷夜未半。涼颼蕭蕭入疎竹。枕底寒聲碎瓊玉。敲愁撼睡睡不明。花露盈盈泣魚目。秋風且莫吹。念妾守空閨。嫁狗隨走雞隨飛。九死莫作蕩子妻。郎薄倖。妾薄命。花自無言絮無定。碧雲暮合郎未歸。幾度粧成掩明鏡。

河上之役三首

河堤一決豈天窮。失在當年固白公。誰與麻岡開故道。暫教版籍見山東。

新築河堤要策勳。萬人採淨北塢薪。青青好借曹州柳。舊是中原一段春。

曹陷沒已久。

萬夫卷土障橫流。負土成山水未收。明日落成眞盛事。誰能作賦擬黃樓。

圍城

碧樹蒼煙起暮雲。長安陌上斷行人。百年王氣餘飛觀。萬里神州隔戰塵。身與孤雲向雙闕。愁隨落日到咸秦。山河大地分明在。莫爲時危苦愴神。

驟雨

龍戰雲騰擁日囚。鞭驅雷電走蛟虬。望中雨脚橫天落。觸處湍聲卷地流。梁苑樓臺失炎暑。漢家城闕動高秋。若爲借得天瓢去。倒瀉明河淨九州。

資聖閣登眺同麻杜諸人賦

高閣凌雲眼界寬。野煙碧樹有無間。天邊孤鳥飛不盡。陌上行人殊未還。魏國幾回事改。汴堤千古夕陽閑。愁來重倚欄干望。崧少西頭是故山。

南冠五人

司馬侍郎朴

朴字文季。溫公之猶子。宋兵部侍郎。以奉使見留。居於祁陽。授以官。託疾不拜。遨遊王公之門。以壽終。文季工書翰。有晉人筆意。興陵萬機之暇。嘗購其遺墨學之。有雪霽同韓公度登圓福寺閣。和李劼之詩。今略載於此。積雪日出杲。雪飛梅已殘。朋游要及時。閑鄰有遐觀。乘此蕪穢平。快覽天宇寬。霽色混銀界。曠望連江干。山如白毫相。滉溢清揚端。一氣轉浩渺。萬里皆瀾漫。優哉賦梁苑。想像排廣寒。此下不可讀。當俟善本考之。

無餘居士齋壁有沈傳師游道山岳麓詩石刻。穆仲等和之。因亦次韻

湘西勝景豈易論。羣山騰闖萬馬奔。鶴泉一麓驚鵬喙。松風十里藏祇園。當時侍御偶題寫。筆力

孰敢爭雄尊。東京少年妙詞藻。南陽舊族齊陰樊。天心月脇出奇語。使我展讀忘朝昏。差差戈劍隱一敵。落落旗鼓嚴千屯。無餘居士厲幽志。細研六藝方專門。凍飢嬌兒慣腸芼。啼飢瘦婦餘淚痕。惟君德義允相愜。每窮道妙角與根。他人勸酒驚逐魂。二子頻酌勤空樽。醉中詩成渺江海。風外幡影徒飛翻。卷藏篋笥已戢戢。風生襟袖何軒軒。嗟乎我亦有餘腐。陋哉羊政囚華元。

滕奉使茂實

茂實字秀穎。姑蘇人。初名祿。徽宗改賜焉。以太學正兼明堂司令。與樞密路允迪、翰林修撰宋彥通。奉使割三鎮太原。尋奉密詔。據城不下。國相怒。囚使人於雲中。欽宗北遷。秀穎謁見。涕泣請從行。主者不之許。放允迪、彥通南歸。茂實留雁門。與兄宗正丞福字伯壽。淮南發運使禕共居。久之。家人至自汴梁。秀穎往來并代之間。布衣終身。臨終。令黃幡裹尸而葬。仍大刻九字云。宋使者東陽滕茂實墓。士大夫哀其忠。爲之起墳於雁門。歲時致祭。好問兒時。先大夫教誦秀穎臨終詩。然亦僅能記末章數語而已。庚子春。自山東還鄉里。值鄉先生雁門李鍾秀挺。求秀穎詩文。鍾

秀云。喪亂以來。家所藏書。焚蕩都盡。避兵山中民家。偶於破箱中得秀穎詩一編。紙已敗爛。前序秀穎自作。可辨者百餘字。大略言能安於死生之分。而不能忘感慨不平之氣。又曰。蘇屬國牧羊海上。而五言之作自此始。予敢援以爲例。後叙是筆吏林泉野老彥古。彥古不著姓。年七十八。手錄三

滕始末。號東陽滕秀穎、鳳山、思遠記者。詩數百首。可讀者什六七。臨終一詩。缺三五字而已。非筆吏此集。則秀穎之事。無以見於世。予意先生名節凜然。不愧古人。其文字言語。宜有神物護持。雖埋沒之久。而光明發見。決有不可揜焉者。因備述於此。亦使彥古之名。託之而不腐云。

蔣字恐誤。當作禡。見南中高濟叔碑。

哀隆德守臣張確。確。浮休張舜民之弟。嘗爲烏延帥幕。獨不廷謁童貫。作詩弔之。

雕陽萬古一張巡。忠義傳家有世臣。顏子伏膺當入室。潘郎望拜肯同塵。圍城已陷天猶晦。仗劍臨危氣益振。餘子鄰邦盡曹李。偷生端作九泉人。

天寧節有感

節臨重十慶天寧。古殿焚香祝帝齡。身在北方金佛剎。眼看南極老人星。千官花覆常陪燕。萬里雲遙阻在廷。松柏滿山聊獻壽。小臣孤操亦青青。

汴梁故老云。徽宗本以五月五日生。以俗忌移之十月十日。故此詩有重十之句。

雨後蔬盤可喜偶成

過雨盤蔬日日新。從今休嘆庾郎貧。寒齏安取咄嗟辦。火食不憂生死隣。野苽何施雖可鄙。美芹欲獻去無因。干戈萬里風塵晦。慚媿平生肉食人。

五日

節物驚心動遠思。薰風又見洛蘭時。空尋好句書紈扇。無復佳人繫綵絲。酒注菖蒲唯欲醉。筒包菰黍不勝悲。明年此日當何處。風裏孤蓬自不知。

喜雨

早暎雨霑渥。豐穰都不疑。商羊應屢舞。布穀強多知。龍見寧非數。雲行自有時。當年班夏令。曾得近丹墀。

偶成

纖雲卷盡見秋容。古木交陰一掃空。雪壓羣山曉來雨。葉侵缺甃幾番風。欲歸未得人將老。屢送還來鬼亦窮。賴得子卿佳傳在。整冠時讀慰飄蓬。

立春

東皇布政物皆春。山色禽聲便可人。滿谷和風消積雪。半窗晴日動游塵。宮花插帽枝枝秀。菜甲堆槃種種新。拘窘經時成土俗。聊從一醉適天真。

臨終詩并序

某奉使亡狀。不復反父母之邦。猶當請從主行。以全臣節。或怒而與之死。幸以所仗節幡裹其尸。及有篆字九。爲刊之石。埋於臺山寺下。不必封樹。蓋昔年大病。夢遊清涼境界。覺而失病。

所在。恐於此有緣。如死窮微。則乞骸骨歸。悉如前禱。預作哀詞。幾於不達。方之淵明則不可。亦庶幾少游之遺風也。

蠶鹽老書生。謬列王都官。索米了無補。從事敢辭難。殊隣復盟好。仗節來榆關。城守久不下。川塗望漫漫。儉輩果不惜。一往何當還。牧羊困蘇武。假道拘張騫。流離念窘束。坐閱四序遷。同來悉言歸。我獨留塞垣。形影自相弔。國破家亦殘。呼天竟不聞。痛甚傷肺肝。相逢老兄弟。悼歎安得驩。波瀾卷大廈。一本難求安。就不違我心。渠不汗我顏。昔燕破齊王。羣臣望風奔。王蠋猶守節。燕人有甘言。經首自絕脰。感槩今昔聞。未嘗食齊祿。徒以世爲民。況我祿數世。一死何足論。遠或死江海。近或死朝昏。歛我不須衣。裹尸以黃幡。題作宋臣墓。篆字當深刊。我室尙少艾。兒女皆童頑。四海無置錐。飄流倍悲酸。誰當給衣食。使不厄飢寒。歲時一酹我。猶足慰我魂。我魂亦悠悠。異鄉寄沉冤。他時風雨夜。草木號空山。

通理何先生宏中

宏中字定遠。先世居雁門。叔祖青。出武弁。任忻州兵馬使。因家焉。祖行宣。西遊遇仙不返。行宣之子子奇、子霖。政和中中武舉高科。子奇秉義郎。武州宣寧尉。子霖忠翊郎。守豐州安豐砦。皆沒王事。定遠。子奇子也。幼倜儻。儀觀秀整。雅以奇節自許。宣和末。方賊擾江浙。定遠以太學武

舉進士。陳破賊三策。徽宗褒諭。謂非近日言事者所可比。已而破賊如定遠策。遂知名。宣和元年。集英殿試策。中第二。調滑州韋城尉。汴京被圍。州郡多避走。獨韋不下。兵退。統制武漢英奏辟。欽宗御札召赴軍前。以路塞不果。因請兵真定宣撫司。時副帥种師中兵已潰。宣撫司檄定遠副漢英守銀冶路。既而太原破。西路無完城。定遠等提兵並山而東。將赴援京師。俄漢英戰死。定遠收合散亡。立山棚七十四所。號令所及。千里而遠。艱食數月。人不敢相食。詔以爲武節大夫。河東河北兩路統制接應使。是後國朝兵日盛。所守唯銀冶一城而已。帥府募人生致定遠。天會五年二月。糧盡被擒。大帥昭刺憐其忠。解縛。授以官。定遠投牒於地曰。我常以此物誘人出死力。若輩乃欲以此嚇我耶。帥嘉其不降屈。又問欲還鄉否。定遠謀南奔。陽以願歸爲言。會監送使臣有先與定遠相攻劫者。愬之。囚西京府君廟二年。帥一日召之。授以官。又不拜。使之充軍。亦不從。取家屬填城黃龍府。益假塞不行。帥怒。褫衣欲斬之。定遠欣然就戮曰。得死所矣。擁之行。已數十步。帥終不忍。召還。問爾授官不願。充軍又不行。填城又不行。斬又不懼。畢竟欲如何。定遠徐曰。生死在公。奚問爲。帥怒解。繫之西京獄。得州人保任者數十族。乃放歸。請爲黃冠。時神霄宮廢。道士舊以徽宗爲東華君。將毀其像。定遠爲起紫微殿。遷像事之。年六十三。正隆四年病歿。自號通理先生。所著成眞通理二集藏於家。州將傅慎微幾先贈詩云。故人何定遠。造物不虛生。骨骼稜

稜瘦。詩篇字字清。世皆尊道藝。我獨見忠誠。尊酒分攜後。何時蓋復傾。其餘與朱少章輩唱酬甚多。皆爲所推重。載之墓碣之陰。

述懷

馬革盛尸每恨遲。西山餓踣更何辭。姓名不到中興曆。付與皇天后土知。

醉軒姚先生孝錫

孝錫字仲純。豐縣人。政和四年登科。調代州兵曹。國朝兵入雁門。州將議以城降。官屬恆怯。投死無所。仲純投床大鼾。略不以爲意。帥府就注五臺簿。未幾。移疾去。因家五臺。善治生。亭榭場圃。富於遊觀。賓客日盈其門。州境歲飢。出家所藏粟萬石振貧乏。多所全濟。鄉人德之。中年之後。以家事付諸子。放浪山水間。詩酒自娛。醉軒其自號也。資稟簡重。喜怒不形於色。棄官時年二十九。至八十三乃終。名士大夫。爲詩以弔者數十人。先生長於尺牘。所著雞肋集。喪亂以來。止存律詩五卷而已。今略載於此。次冠卿韻云。節物後先南北異。人情冷暖古今同。次趙獻之韻云。紅纈退風花着子。綠鍼浮水稻抽秧。溪墅早春云。久客交情諳冷暖。衰年病骨識陰晴。春日 and 德充云。煙染絲絲迷別浦。雨催紅糝綴長條。新詩云。愁邊日晷偏疑短。夢裏江鄉未當歸。盤無兼味慙留客。夢厭多歧不到鄉。賦雲云。酒敵餘威翻索寞。詩含幽思倍清新。雨云。岸漲魚吹沫。山

空石轉雷。雪云。舞風初學絮。帶雨不成花。峯山寺云。谷虛繁地籟。境寂散天香。雲生古木千章秀。山抱晴川一掌平。懷士會云。詩忙疎酒醺。俸薄減廚煙。感懷云。玄晏暮年常抱病。子山終日苦思歸。古詩尤有高超。恨不復見之矣。

挽詞今載於此。掌飲令皆特國云。山東夫子老河東。誰與先生嗅味同。早歲遺辭名宦裏。百年常樂聖賢中。醉軒風月千秋恨。蝸室樽壺一夢空。白

玉樓成人不見。空餘鄉淚託東風。司經劉迎云。百年陸陸曉蒼茫。曉向山林得老蒼。孤幹盤生陳柏樹。故基獨立魯靈光。謀生有道田園樂。閱世無心壽命長。何日車聲過通德。非公一灶影前香。高平李仲略云。蚤歲才猷著崎嶇。步世銀。非嫌食周粟。甘學抱吳關。高義追東漢。移文謝北山。孤風激食腐。應讓莫容。平水毛鷹云。蓋世清芬五十年。直疑湖海水雲仙。不台江夏無雙譽。便造南華第一篇。松菊就荒堪笑晚。尊鱸託興果誰賢。作城鬱鬱高名在。應與靈山萬古傳。西京都轉運使丹元子田彥昂云。淋浪風月三千首。游戲塵凡八十秋。三徑尚存元亮菊。五湖空負子皮舟。王元老云。夫子人之傑。魁終道最純。鄉閭連沛邑。族系出虞賓。清節冰壺瑩。孤標玉樹新。妙齡探桂窟。雅志傲蒲輪。事業傳衣鉢。風流表縉紳。斗南唯此老。月旦復誰人。忍死哭亡社。偷安笑具臣。斯文雖未喪。吾道竟難伸。彭澤不書來。東陵無負秦。直從強健日。收得自由身。把臂言猶在。迴頭跡已陳。發書占買鵝。絕筆感商麟。去矣騎箕尾。嗟哉厄已辰。終天從此別。窮壤向誰親。墮杵逢王果。留燈待沈彬。彭殤俱逝水。丘陌共荒榛。書帶緣新桐。笛聲起舊隣。絕絃雙墮淚。撫劍一傷神。豪樹悲長夜。山花作好春。龜趺平木杪。誰爲寫光塵。丞旨党世傑云。望西山以馳中兮。其下維德人。抱明月以螭盤兮。寧終屈而不伸。天昏廓以西關兮。羣飛紛其上翬。將搏擊以並征兮。惜衝風之落羽。蘭爲佩兮桂爲帷。誰招余者兮余從與歸。青雲誰振跡兮。願捷結之不素。玄豹自媚其文兮。亦何嫌於隱霧。詩書與友兮。琴尊與游。適意自安兮。樂閒自休。出吾餘以研桑兮。猶足以比素封之侯。惟清閒爲祕福兮。非有力能兼取。雖神仙猶可畏。曾莫樂於下土。數與數相乘除兮。常此尊而彼與。兩廢栖之下樂兮。心實往而跡藏。出非微而處非隱兮。吾獨蹈古人之所常。隨時委順以終老兮。噫先生爲不亡。

睡起

生涯甘分寄耕桑。山色圍門水遶牆。困病久懲耽酒癖。愛閑猶有和詩忙。簷冰滴砌春猶冷。野馬浮川日漸長。舊事老年多記憶。故園歸夢正悠颺。

柳溪別墅

安車隨意飽甘肥。晚食徐行理亦齊。山市日高人未集。柴門客至鳥先啼。溪橋散望攜筇渡。野寺牽吟信筆題。容膝易安聊自適。甕天閑看舞醯雞。

歲晚懷二弟

少易成歡老易傷。壯遊垂白未還鄉。煙塵無復音書到。魂夢猶疲道路長。爆竹又驚新薦歲。屠蘇空憶舊傳觴。年年此日遙相憶。鴻雁何時續斷行。

睡起

睡起日侵牖。開軒遙見山。曉風吹臘盡。芳草惹春還。煙暖鶯遷谷。雲低雁渡關。衰年人事減。遇酒得開顏。

次李平子登臺有感韻

落日孤雲帶遠岡。成樓煙瘴舊邊場。疲民卒歲方懷土。遠客憑高自憶鄉。漢使一朝延四皓。秦詩千古弔三良。行藏此意無人解。聊借青山送酒觴。

九日題峯山

不須歌吹上叢臺。千里晴川入座來。世事難憑休挂口。生涯見在且銜盃。無情趁暖花先老。有信迎寒鴈已迴。遙想故園親種菊。霜枝露藥向誰開。

次韻王無競見寄

客懷重倚仲宣樓。白草黃雲塞上秋。山色不隨塵世改。水聲還抱故城流。隙中畏景那堪玩。鏡裏衰顏祇自羞。多愧詩人苦相憶。遠傳佳句弔清愁。

閑居

無客訪衰殘。柴門盡日關。耽書真是癖。惜酒近成慳。苔徑行搜句。茅簷臥看山。却嫌明鏡裏。偏照鬢毛斑。

和成冠卿見寄

別恨頻添鬢雪深。百年懷抱鬱沉沉。標名不挂金銀榜。涉世空堅鐵石心。俗物何勞供一醉。殘僧正欲伴孤吟。朱絃三弄虛簷寂。唯有清風是賞音。

次韻秋興

老畏年光速。愁添旅夢多。西風著梧竹。歸思入煙波。夜永憑詩遣。顏衰得酒和。故溪千樹柳。誰復曬漁蓑。

感白髮

彈缺憑誰聽客歌。震雷那復化魚梭。梳頭白雪驚新有。障眼玄花比舊多。鄉間阻兵猶斷絕。羈懷

憑酒暫消磨。不須更問今朝客。門外元無雀可羅。

曉霽

一夜雲峯卷迅雷。殘紅狼藉點蒼苔。鶯聲豈解留春住。燕語虛勞喚夢迴。愁寂頓疑詩思減。衰殘偏感歲華催。柳溪魚鳥應相識。乘興無嫌日日来。

重九偶成

天邊今日又重陽。隴樹紅飛雁信霜。且插茱萸慰衰鬢。莫將詩句撓回腸。歌勤皓齒人俱醉。舞戀晴暉蝶也忙。來日預期扶宿酒。未應籬菊減秋香。

溪橋早春

輕黃未染柳梢勻。連日溪風卷塞塵。乍暖乍寒花信晚。相呼相應鳥聲頻。少勤謾挾經綸策。老懶空餘病患身。追憶故園桃李樹。年年紅紫爲誰新。

東軒琴示兒子沂

古人無復見。但有東軒琴。一鼓高山操。因窺古人心。正聲久沉埋。俚耳喧哇淫。正可自怡悅。不須求賞音。

花前獨酌二絕句

老將花酒作知音。起就花前酒自斟。莫便興來先酩酊。却妨真賞廢搜吟。
移得名花手自栽。花知不爲老人開。興來誰是樽前客。唯有提壺送酒盃。

題柳溪別墅

雨霽風和不動塵。柳邊攜酒賞晴春。頻來溪鳥渾相識。渡水穿花不避人。

芍藥

綠萼披風瘦。紅苞浥露肥。只愁春夢斷。化作彩雲飛。

次韻李相公偶成

簾鳥喚歸夢。竹風追夕涼。感時空有淚。却老分無方。流水依山白。孤雲帶日黃。無人共樽酒。散髮臥藜床。

村居偶成

靜愛柴門野興幽。杖藜徐步到巖丘。深林有獸爲先噪。廢圃無人泉自流。土瘠稅租隨力辦。年豐禾黍過時收。客來不慮無供給。白酒黃雞亦易求。

用峯山舊韻二首

舊步西風寺。窮幽未覺賒。松根纏石瘦。雲磴出巖斜。思爽餘三唱。詩成自一家。空餘幾兩屐。不

踏渡溪槎。

春水上堤沙。春晴散望賒。衰年花近眼。久客夢還家。映日孤鴻沒。迎風雙燕斜。平生江海意。早晚送浮槎。

題佛光寺

臧穀雖殊竟兩亡。倚欄終日念行藏。已忻境寂洗塵慮。更覺心清聞妙香。孤鳥帶煙來遠樹。斷雲收雨下斜陽。人間未卜蝸牛舍。遠目橫秋益自傷。

芭蕉

鳳翅搖寒碧。虛庭暑不侵。何因有恨事。常抱未舒心。

蜀葵

傾心知向日。布葉解承陰。空側黃金盞。誰人與對斟。

次韻公才對菊見懷

髮蓬新感二毛侵。尙阻清樽對菊斟。久擬芝蘭同臭味。莫疑魚鳥自高深。食貧豈復甘秦炙。客病空懷奏楚音。挂席無由上牛斗。漫憑流水送歸心。

寄田朝散善輔

粉署標名舊。山城識面新。青雲摧勁翮。空谷滯幽人。世路謀身拙。心田育德醇。久要知可卜。傾蓋已情親。

春日書懷

雲散交情薄。基翻世態新。山容猶帶臘。鳥語已回春。節物驚心遠。丘園入夢頻。東風如解語。端笑未歸人。

春日溪橋

留戀春光慰病顏。無情風雨卷春還。陰陰密綠籠溪暗。細細疎紅點徑斑。老去益憐詩思澀。懷來聊破酒腸慳。不嫌門外無車轍。得遂衰慵一味閒。

登樓有懷

老愧凭欄目力昏。百年懷抱向誰論。晴空雁起雲邊塞。夕照人歸郭外村。因記昔遊驚迅晷。暫將離恨付清樽。誰人肯似邊居士。遠駕朱輪過雀門。

題滕奉使祠

本期蘇鄭共揚鑣。不意芝蘭失後凋。遺老祇今猶涕淚。後生無復識風標。西陲雁度霜前塞。潯水樵爭日暮橋。追想生平英偉魄。凌雲一笑豈能招。

朱奉使弁

弁字少章。宋吉州團練使。天會六年。以通問見留。命以官。託目疾固辭。猝然以錐刺之。而不爲瞬。用是得歸。凡居雲朔二十年。自號觀如居士。有曲洧風月堂詩話行於世。

蘇子翼送黃精酒

仙經何物堪却老。較功無如太陽草。龍銜雞銜名雖異。菟公羊公事可考。蘇君真是神仙裔。橘井陰功貫穹昊。雲笈書成數萬言。銀闕珠宮用心早。獨知此物有奇効。福地名山爲儲寶。不憚林泉新斷掘。斥去杵臼謝篩擣。況從高士論麴糜。更課公田收秬稻。一朝靈液浮甕盎。三冬浩氣生襟抱。且欣軟飽得澆腸。漫說逆流工補腦。眼碧那憂散黑花。髮白故應還翠葆。賈傳只嫌松醪陋。劉墮敢誇桑落好。直須五斗論解醒。寧待三杯乃通道。誰知萬里落旄人。亦許匏尊自傾倒。爲君喚迴雪窖春。八載羈愁供一掃。曼倩宜分此日桃。安期莫詫他年棗。何煩更採石斛花。已覺容顏不枯槁。根連石室喜入夢。句擬桐溪媿摘藻。平生我亦愛書札。朱髓綠腸勤探討。幸君汲引成此志。鶴駕駸駸望仙島。吞腥啄腐非夙心。歲晚茲言良可保。

初春以蔓菁作醢。因憶往年避難大隗山。采蘋澗中爲醢。醢成汁爲粉紅色。而香美特異。乃信鄉人所言爲不誣矣。今食新醢。因成長韻。

藏蔬飽三冬。娟盤無蠹磨。陳齏解束縛。冰雹散刀几。春畦蕪菁苗。入眼漸可喜。青黃含風露。採摘從此始。持歸作新鑿。一飽競鮮美。芬香溢肺肝。甘脆響牙齒。捫腹幽窗下。芻豢詎能比。憶昔避難初。竄身重富裏。雲煙昏具茨。老稚且棲止。燕兵大搜索。焚蕩石牛底。脫命擲虎山。野哭紛四起。暮投山前店。茅棟例燒毀。潛伏窟室中。衣敝不蓋體。妻孥坐相對。生意薄於紙。晨朝行澗中。采芹澗邊洗。鄭人誇此齏。他菜非所擬。氤氲投瓦盎。觸鼻似蘭芷。一杯紅粉羹。析醒勝仙醴。乃知野人獻。涼薄未宜鄙。今來滯殊鄉。白首家萬里。猶能對葷羶。咀嚼出宮徵。回思十年夢。爭奪殊未已。飽食但謀身。吾願良有泚。

北人以松皮爲菜。予初不知味。虞侍郎分餉一小把。因飯素。授廚人與園蔬雜進。珍美可喜。因作一詩

吾老似出家。晚悟愧根鈍。滋旨却羶輩。禪悅要親近。偉哉十八公。茲道亦精進。舍身奉刀几。割體絕嗔恨。鱗皴老龍皮。鳴齒溢芳潤。流膏爲伏龜。千歲未須問。便堪奴笱蕨。詎肯友芝菌。跼蹐得一飽。萬事皆可擯。侍郎文懿後。落落衆推俊。澹然世味薄。內典得所信。香廚留淨供。頻食不言頓。晏然默不語。草木雷音震。得法於此公。骨髓傳心印。應憐持節人。餉此爲問訊。欲將無上味。爲我洗塵坌。食之不敢餘。感激在方寸。

予以年事漸高，氣海不能熟生，煖冷。旅中又無藥物，遂用火攻之策。灼艾凡二百壯，吟呻之際，得詩二十韻。

不作漳濱臥。年侵血氣衰。據鞍思少壯。攬鏡嘆清羸。有病方求艾。無營莫問耆。心知出下策。理勝遇中醫。陽燧神逾速。銅仙術盡施。論功鄙炮製。取穴辨毫釐。火帝恩光異。炎官績用奇。書螢比差似。珠蟻迫方知。付物嗟炮斃。觀形笑灼龜。煙微初炙手。氣烈漸鑽皮。閉目書徒展。支頭枕屢移。發狂還自哂。賈勇僅能支。朱鷄追風日。吳牛喘月時。忠言勞緩頰。善諛爲開眉。服氣工夫遠。燒丹歲月遲。衛生防後患。伐性釋前疑。展轉那成夢。呻吟且當詩。因心念民瘼。出位嘆身卑。欲已七年病。當從百世師。保身將保國。未可廢箴規。

元夕有感

朔雪餘千里。東風徧九州。關河中土異。燈火上元愁。綠蟻嘗新釀。青貂戀故裘。紫姑無用卜。世事正悠悠。

憶鍾離濬

浚都同聚讀書螢。楚岸春風憶送行。三十年前初識面。四千里外更關情。出疆我亦徒勞爾。入仕君今何似生。旅雁相逢須一問。要從郵上得新聲。

炕寢三十韻

風土南北殊。習尚非一躅。出疆雖仗節。入國暫同俗。淹留歲再殘。朔雪滿崖谷。禦冬貂裘敝。一炕且跼伏。西山石爲薪。黝色驚射目。方熾絕可邇。將盡還自續。飛飛湧玄雲。燄燄積紅玉。稍疑雷出地。又似風薄木。誰容鼠棲冰。信是龍銜燭。陽曦助喘息。未害搖空腹。惠氣生袴襦。仍工展拳足。豈惟脫膚鱗。兼復平體粟。負暄那用詫。執熱定思沃。收功在歲寒。較德比時燠。雖餘炙手焰。寧有爛額酷。矧當凝沍辰。炎帝獨回轂。玄冥真退聽。祝融端可錄。嗟予亦何者。萬里歌黃鵠。偃仰對窗扉。妍煖謝衾褥。壯懷羞寵媚。晚悟笑突曲。因思墮指人。暴露苦戰塚。頻年未解甲。蹈此鋒刃毒。遙知革輅中。盱食安豆粥。陪臣將命來。意懇誠亦篤。有奇不能吐。何術止南牧。君心想更切。臣罪何由贖。此身雖自溫。此志轉煩促。論武貴止戈。天必從人欲。安得四海春。永作蒼生福。聊擬少陵翁。秋風賦茅屋。

秋泉次韻

新醅潏潏溢瓶盆。漱石秋泉帶雨淦。翡翠盃深雲液凝。鸕鷀杓滿月波翻。照人光入樽罍瑩。流齒香隨語笑噴。已拚扶頭日三丈。朝醒未解任昏昏。

夜雨枕上

淅淅風聲止。淒淒雨氣涼。愁工繫客思。夢故遶江鄉。書疏親朋少。干戈歲月長。平城弭節地。可復見秋霜。

客懷

兵氣常時見。客懷何日開。形骸病自瘦。鬢髮老相催。已負秦庭哭。終期漢節回。風雷識我意。一雨洗氛埃。

歲序

歲序忽將晏。節旄嗟未還。低雲慘衆木。寒雨失羣山。喪亂關詩思。謳謠發病顏。夢魂識舊隱。時到碧溪灣。

白髮

白髮使車前。煙波思渺然。霜清穫稻日。風急授衣天。客館但愁坐。釣舟誰醉眠。乘槎會有便。真到斗牛邊。

有感

容貌與年改。鬢毛隨意斑。雁邊雲度塞。鳥外日銜山。仗節功奚在。捐軀志未閑。不知垂老眼。何日覩龍顏。

劉善長出示李伯時畫馬圖

俯首舉尾拳一蹄。掣轡欲嗅驕不嘶。奚官聳肩兩足垂。意貌自與造父齊。雖目麟鬚鳳凰臆。玉山禾遠未容食。籥雲追覓有餘地。置之畫圖人豈識。精神權奇孰可班。當在白兔青龍間。君知此馬從何來。龍眠胸中十二閑。

謝崔致君餉天花

三年北饌飽羶葷。佳蔬頗憶南州味。地菜方爲九夏珍。天花忽從五臺至。崔侯胸中散千卷。金甌名相傳雲裔。愛山亦如謝康樂。得此攜歸豈容易。應憐使館久寂寥。分餉明明見深意。堆槃初見瑤草瘦。鳴齒稍覺瓊枝脆。樹雞濕爛慚扣門。桑蛾青黃謾趨市。赤城菌子立萬釘。今日因君不知貴。乖龍耳僅免一割。沙門業已通三世。偃戈息民未有術。雖復加飡祇增媿。雲山去此縱不遠。口腹何容更相累。報君此詩永爲好。捧腹一笑萬事置。

戰伐

戰伐何年定。悲愁是處同。黃雲縈晚塞。白露下秋空。魚躍深波月。烏啼落葉風。誰知渡江夢。一夜繞行宮。

龍福寺資東坡羹戲作

山寺解塵鞅。溪邊有微行。手摘諸葛菜。自煮東坡羹。雖無錦繡腸。亦飽風露清。鉤簾坐捫腹。落日千峯明。

丙申中秋不見月

中秋萬里月。何處駕冰輪。底事隔年會。不憐今夕人。免疑停杵白。蟾豈避風塵。默識嫦娥意。承平賞更新。

十七夜對月

病骨怯風露。愁懷厭甲兵。人居絕域久。月向此宵明。輪仄初經漢。光分半隱城。遲遲不肯下。應識異鄉情。

人謂少章此詩似微升古塞外。而末章尤爲蕩絕。必有能辨之者。

睡軒爲趙光道作

深炷爐香睡息勻。蕭然一覺得天真。生涯聊示人間世。綠境都忘藥裹身。窺牖屢來從汝喚。叩門空去任渠嗔。更須滿壁圖雲水。臥想江湖渺莽春。

南齋即事

頻年行役夢庭闈。跣屐常嗟脚力疲。每訴酒巡嫌客惡。力營官事笑兒癡。雲山幸不持錢買。花竹何妨帶雨移。此味賁人元未識。恐緣詩好被渠知。

餞和父之并州

有北何堪說。如南未是歸。并門子徑往。漢節我方羈。筆硯論心久。干戈會面稀。新程相憶處。路入嶺雲微。

獨坐

草凍慵抽碧。桃癡懶暈紅。黃雲猶漠野。紫塞漫春風。使節空留滯。侯圭未會同。塔除雪不掃。獨立數歸鴻。

寒食

絕域年華久。衰顏淚點新。每逢寒食節。頻夢故鄉春。草綠唯供恨。花紅只笑人。南轅定何日。無地不風塵。

上巳

行行春向暮。猶未見花枝。晦朔中原隔。風煙上已疑。常令漢節在。莫作楚囚悲。早晚鸞旗發。吾歸敢恨遲。

送春

風煙節物眼中稀。三月人猶戀褚衣。結就客愁雲片段。喚回鄉夢雨霏微。小桃山下花初見。弱柳

沙頭絮未飛。把酒送春無別語。羨君纔到便成歸。

天問絕句

穴邊酣戰君臣蟻。波上羣嬉婢妾魚。苦樂不同同一字。問天此理竟何如。

客夜

城月四更上。窗風一室幽。纖雲縈雁塞。重霧逼貂裘。兵革何年息。乾坤此夜愁。殊鄉兩行淚。騷屑洒清秋。

據抱

客滯殊方久。山圍絕塞深。秋風入橫笛。夜月傍沾襟。造膝他時語。捐軀此日心。飛霜滿明鏡。髮短不勝簪。

重九

九日今何地。寒深紫塞霜。敢嫌蘆酒濁。且對菊花香。歲月雙蓬鬢。乾坤百戰場。賜奠知未舉。夢自識鴛行。

次韻劉太師苦吟之什

長城五字屹逶迤。可笑偏師敢出奇。句補推敲未安處。韻更癡絮益難時。凝迷竟作禽填海。辛苦

眞成蟻度絲。却羨彌明攻具速。劉侯漫說也能詩。

善長命作歲除日立春

土牛已着勸農鞭。韋索仍專捕鬼權。且喜春盤兼守歲。莫嗟臘酒易經年。東風漸入江梅夢。朔雪猶迷塞柳天。元會明朝定何處。羈臣揮淚節旄前。

次韻子文秋興

逸興常時有。逢秋一倍多。山長含楚雨。天遠接吳波。尋壑同元亮。浮家伴志和。釣竿行入手。還着向來蓑。

冬雨

冬雨不成雪。北風寒未深。山藏千疊秀。雲結四垂陰。迴洒凌朝閣。殘聲入夜衾。端能洗兵甲。足慰此時心。

寒食感懷次韻吳英叔

疾風甚雨老難禁。嶺外無錫誰解吟。雙鬢客塵諳世變。兩眉鄉思儘愁侵。榆錢何處迎新火。杏粥頻年繫此心。落日高城魂易斷。天臨牛斗五湖深。

春陰

關河迢遞繞黃沙。慘慘陰風塞柳斜。花帶露寒無戲蝶。草連雲暗有藏鴉。詩窮莫寫愁如海。酒薄難將夢到家。絕域東風竟何事。祇應催我鬢邊華。

寒食

清明六到客愁邊。雙鬢星星只自憐。兵氣尙纏巢鳳閣。節旄已落牧羊天。紙錢灰入松楸夢。錫粥香隨榆柳煙。北向雁來寒霧隔。音書不比上林傳。

李任道編錄濟陽公文章。與僕鄙製合爲一集。且以雲館二星名之。僕何人也。乃使與公抗衡。獨不慮公是非者紛紜於異日乎。因作詩題於集後。俾知吾心者不吾過也。庚申六月丙辰江東朱弁書

絕域山川飽所經。客蓬歲晚任飄零。詞源未得窺三峽。使節何容比二星。蘿寫施松慙弱質。蒹葭倚玉怪殊形。齊名李杜吾安敢。千載公言有汗青。

朱弁者。蓋亦有深意云。

濟陽公謂宇文叔通。叔通受官。而少章以死自守。恥用叔通見比。故此詩以不敢齊名自託。至于書年爲庚申。與稱江東

秋夜

秋夜雖漸永。未抵客愁長。秋月雖已圓。不照寸心方。將心貯此愁。莫作萬斛量。爲月憐此夜。誰共千里光。空令還家夢。欲趁征鴻翔。

附見

鑑然子趙滋

滋字濟甫。本出馮翊。其祖貞元間來爲南京漕司戶籍判官。卒官下。妻子不能歸。遂爲汴人。濟甫少日出閭里間。其曉音律。善談笑。得之宣政故家遺俗者爲多。及長。厭於游蕩。乃更折節取古人書讀之。學書學畫學詩學論文。立志既堅。力到便有所得。爲人強記默識。不遺微隱。唐以來名人詩文。往往成誦如目前。考論文義。解析絡脈。殆若夙昔在文字間者。畫入能品。詩學亦有功。如黃石廟等作。今代秉筆者。或亦未可輕議。閑閑趙公書法。爲今代第一手。學者多倣之。但得其形似而已。濟甫筆勢飛動。頗得公不傳之妙。宗室胙公。文采風流。照映一時。而濟甫以布衣從之游。商略法書名畫。胙公亦以眞賞稱焉。隆德太一故宮。樓觀臺沼。門戶道路。花木水石。悉能歷數之。聽者曉然。如親到其處。至於宋名賢所居第宅坊曲。與其家行輩羣從。孫息姻婭排比前後。雖生長鄰里者。不加詳也。嘗過長清一禪寺與僧談。僧言五派傳授圖大不易作。濟甫笑曰。易與耳。因案筆作圖坐中。他日以舊本證之。不毫末差也。丁酉歲歿於東平。時年五十九。

黃石廟

狂豪擊車代無人。神石一砭志乃信。吹噓風雲遮楚秦。炎精熾然四百春。一縮尙吝續後塵。江山

有待終此身。望望久愁橫目民。朝陽淒淒霜未休。江燕竟來江北游。山回鼎移海橫流。天風何時清九州。草泥自古跽王侯。神棄不卹誰當羞。割牲醺酒空千秋。

先大夫詩

鄉先生權參知政事代郡楊公叔玉。謨先人墓銘。今略載於此。先生姓元氏。字德明。秀容人。唐禮部侍郎次山之後。自幼讀書。世俗鄙事。終其身不挂口。爲人誠實樂易。洞見肺腑。雖童子以言欺之。亦以爲誠然也。先大夫歿。遺產無幾。先生布衣蔬食。處之自若。家人不敢以生理累之。僮奴有竊拾東家之粟者。立命還之。貧人負債。則往往令折券以貸之也。累舉不第。放浪山水間。未嘗一口不飲酒賦詩。春秋四十有八。終於家。先生作詩。不事彫飾。清美圓熟。無山林枯槁之氣。居東山福田精舍。首尾十五年。東嶠其自號也。有集三卷。藏於家。銘曰。貪夫徇財。智士死名。宇宙古今。萬轍混并。我機弗張。我戶弗扃。天宇泰然。物莫敢撓。飲芳食菲。崑岫杳冥。玉佩瓊琚。御風泠泠。魯山之醇。次山之清。閱世幾傳。猶有典刑。邈哉先生。明昌承安間。科舉之學盛。大丈夫非賦不談。人知先人有聲場屋間。其以詩文爲業。則不知也。先人捐館後十年。好問避兵南渡。遊道日廣。世始知有元東嶠之詩。楊尙書之美云。彼美元夫子。學道知觀瀾。孔孟澤有餘。曾顏膏未殘。林觀察顯卿云。文章變古名新體。孝弟傳家守舊規。雷內翰希顏云。詩句妙九州。孝友化一

川。王右司仲澤云。讀書楓樹林。曳杖白石灣。至今文彩餘。虎子仍斑斑。李長源云。衣冠巢許自高雅。岩壑夔龍非棄捐。餘人不能悉紀。家集亂離以來。凡三失之。今所存者。特吾益之兄及門生輩所記憶者耳。小子不肖。暗於事機。不能高蹈遠引。戀嫖升斗。微倖萬一。以取縶維之禍。殘息奄奄。朝夕待盡。誠懼微言將絕。謹以古律詩四十首。附之中州集之癸冊。庶幾來者知百餘年間。作詩如先人。而人或未之見。其餘抱一槩之操。泯泯默默。終老而無聞者。豈勝計哉。是又可爲嘆也。

桃源行

山中三月山桃開。紅霞爛熳無邊涯。音崖山家藏春藏不得。落花流水人間來。憶昔攜家竄岩谷。秦人半向長城哭。回頭塵土失咸陽。繒弋徒勞羨鴻鵠。冬裘夏葛存大朴。小國寡民皆樂俗。晝永垣籬雞犬閑。春晴門巷桑榆綠。漁郎偶到本無心。仙境何緣得重尋。今日武陵圖上看。唯見雲林深復深。

送德溫同舍赴簾試

太常侍祠水蒼珮。內相夜下金蓮燭。皇家結網未曾疎。亦有佳人在空谷。一從唐賦變遼律。仰視折楊猶雅曲。雲臺勳業一青衫。被髮操戈踵相屬。筋疲力涸僅乃得。墨水一升凡幾辱。英雄俛首入穀中。舉世悉然非子獨。子家口衆親又老。歲月旨甘須寸祿。薦書聞說過南宮。冷煖人情到僅

僕。我初與子偕計吏。人後人前隨碌碌。不慚齊客售鼓瑟。頗爲荆人悲獻玉。一詩今日送君行。萬里秋風看鴻鵠。功名前路知不免。雞黍後期良未卜。錦標無用咤龍頭。帛書且當傳雁足。

雨後

十日山中雨。今朝見夕陽。乾坤覺清曠。草棘有輝光。竹影搖殘滴。松聲送晚涼。南窗聊自適。無用說羲皇。

覽鏡

四十宜未老。年年添髮絲。直教隨牒去。也是挂冠時。臺閣多新賦。山林有逸詩。悠然一樽酒。滿酌不須辭。

室人生朝

新酒清渾共。糟床洗盞嘗。平時唯欲醉。此日重難忘。容服慙王霸。山林得孟光。白頭翁媼。萬事聽諸郎。

太原古城惠明寺塔秋望

西山萬古壯陪京。一日汾流入廢城。浩浩市聲爭曉集。啍啍原隰但秋耕。晉公老去詩仍在。
晉公晉陽官舍春日詩云。白頭官舍裏。今日又春風。越石亡來恨未平。千尺浮圖暮煙底。瓦盆濁酒爲誰傾。

薄遊同郝漕子玉賦

全晉山河百戰場。登臨歷歷見興亡。夷居虜雜尤堪嘆。霸氣沉雄亦未量。石甕煙霞詩秀潤。駘祠風月酒淋浪。書生不是功名具。慚愧山翁問葛強。

山中秋夕

黃卷有餘習。青燈共晚涼。只知書味永。不覺鬢絲長。老檜千年物。幽蘭一國香。平生陶靖節。此夕邈相望。

寄宗人彥達

交城人

杯酒無緣接舊歡。空將書尺問平安。要君知我詩成處。落日西風正倚欄。

榴花

山茶赤黃桃絳白。戎葵米囊不入格。庭中忽見安石榴。嘆息花中有真色。生紅一撮掌中看。模寫雖工更覺難。詩到黃州隔千里。畫家辛苦費鉛丹。

過鳳凰山

在雁門

鳳凰聞說似天壇。北去南來馬上看。想得松聲滿嶺谷。秋風無際海波寒。

瓶形嶺早發

在繁峙界

海濤蕭瑟雪花乾。人在羊腸百八盤。閑客不知名利苦。見時應作畫中看。

寒食再遊福田寺

春山寂寂掩禪扉。複嶺盤盤入翠微。布襪青鞋供勝踐。粥魚齋鼓薦玄機。日烘幽徑綠煙暖。風定曉枝紅雨稀。曾是西堂讀書客。不應啼鳥也催歸。

家園假山

八尺飛來峯。蒼然立於獨。細看甲乙字。疑是平泉族。山非一草石。見石山亦足。便恐東岫雲。來我簷下宿。今朝鑿盆池。明朝種松菊。自笑住山人。何時返巖谷。

同侯子晉賦雁

沉沉江浦雲。浩浩朔漠雪。微生幾寒暑。翅老飛欲折。樓中見新過。夕照送明滅。欹枕數聲來。疏窗耿殘月。悲鳴或天性。南北隨所愜。誰念孤旅人。年年爲愁絕。

寒林圖爲侯子晉賦

川光茫茫風景暮。一雪無情天地素。長安閉門千萬家。亦有行人踏長路。新豐煙火灞橋水。畫史工作荒寒趣。雪中故事知幾何。偏識詩翁忍寒處。君不見淮西城下鵝鵲鳴。官軍夜斫吳淞營。只如党家麋俗亦不惡。銀燭金荷天未明。拈出雪詩三十韻。蹇驢席帽可憐生。

雪詩三十韻見坡集。

贈客彥文相過之什

程太原人

剝啄誰叩門。開門得吾友。握手一大笑。慰我離羣久。之子富才具。事業可力取。瞻望青松姿。衰遲愧蒲柳。金閨滿鵷鷺。什伯自爲偶。寂寞林野人。過從但隣叟。盤飧無兼味。筍蕨才適口。窮達俱偶然。相逢且杯酒。

枕上

往時見白髮。談笑輕歲月。誰謂明鏡裏。蕭蕭不勝鐸。山林蹉跎久。世慮初未絕。觸物重興懷。忽忽不自恤。遭逢有奇耦。才用隨巧拙。如何杜陵叟。自比稷與契。茫茫拊塵編。何時卒吾業。

秋暮王氏園亭

細徑雲林底。危亭澗水湄。秋先殞黃葉。寒未老紅葵。嚼句幽禽答。尋花晚蝶隨。無人共幽興。思與野僧期。

六言

北闕三臺五省。東山萬壑千巖。琴書中有真味。風月外無多談。

山園梨葉有青紅相半者戲作一詩

霜輕霜重偶然中。一葉雖殊萬葉同。不信世間閑草木。解隨兒女作青紅。

詩

少有吟詩癖。吟來欲白頭。科名不肯換。家事幾曾憂。含咀將誰語。研磨若自讎。百年閑伎倆。直到死時休。

尊酒

土灰論遠計。木石笑浮生。但有一尊酒。何須千載名。

憶山中二絕句

東寺留連飲。張園爛熳遊。兒童望歸路。一日幾登樓。
秋色山中好。山翁醉不迴。不知籬下菊。霜後幾叢開。

山中雨後

遶屋湍聲轉。臨崖老樹摧。雷轟一雨去。雲壁兩山開。

遣興

張翰一盃酒。林逋千首詩。性唯便自適。材敢論時施。狡兔從三窟。鸛鵒分一枝。青山有佳色。只似往年時。

發翼州留別恩禪師

詩拙非同社。情親本故鄉。共知成遠別。且復暫相將。池古蓮花淨。窗深檜葉香。何時重攜酒。來宿贊公房。

賁公子詠

高堂紅燭鼓聲齊。舞徧纖腰月未西。一曲纏頭一雙錦。驕驄空自惜障泥。

蓮葉觀音。恩禪師所藏。同路宣叔賦

瑞相分明一葉中。華嚴性海共圓通。補陀自有丹青變。畫史區區可得工。

謝張使君夢弼餽春肉

牙豬肋厚一尺玉。鹽花入深蒸脫骨。韭芽蓼甲春滿盤。走送茅齋慰幽獨。山人食貧才一粥。幾被艾生嘲苜蓿。食前方丈非素懷。頗憶懸貺繞高屋。呼來鄰叟共一飽。爲說使君方繼肉。飢民待哺今幾家。無策贊君慚此腹。區區一肉見歌詠。說食書生良未足。却愁今夕夢寐間。有物踏破園蔬綠。

仙雞詩并序

繁峙義興鎮酒家韓氏子畜一雞。以善鬪雄其鄉。一日。敵家以藥飼雞。使不知痛。求與韓雞對。韓雞鬪久果被傷。口下頰不收。垂死矣。一賣藥道人過其門。曰。我能活此。韓欣然使療之。里中諸兒隨看者一二十輩。皆使向壁立。道人以雞置籠中。探手良久。若摩拊然者。已而取瓢水

嘆之。置瓢籠上。即出門。兒曹怪其久不還。竊視之。雞喙已復生矣。道人布袍草冠。腋下懸青囊。落魄嗜酒。夜宿寺閣上。韓氏子與里中人奔走求之。并所臥草薦不在矣。是時明昌七年。仲規弟爲此鎮酒官。予亦在焉。作仙雞詩以記之。

老雄健鬪夸擅場。韓郎抱歸神色揚。豈知點兒出徼倖。毒手一發不得妨。毳毛散灑尙可養。利觜一哆何由張。青囊道人何許來。自言掾藥吾有方。垂髫嚙水濯殘血。半喙隨手生新黃。筠籠半開聞膈膊。草冠已往徒驚忙。神仙世有寧虛荒。惜哉詭激不可量。世人驚勇天且剿。況於物也資強梁。敷榮枯枿變金石。未若與世鍼膏肓。何須變化示狡猾。知君辦作淮南王。蓬萊東望雲茫茫。愛而不見心爲狂。刀圭不願換凡骨。且欲共醉無何鄉。

燈下讀林和靖詩

落葉落復落。清霜今幾番。疎燈照茅屋。山月入頽垣。老愛寒花淡。幽嫌宿鳥喧。卷中林處士。相對兩忘言。

觀西巖張永淳畫雁

慘淡經營下筆難。畫成不似卷中看。知君連夜江湖夢。折葦蕭蕭沙水寒。

從趙敷道覓石榴

仙人囊中五色露。得種昔與蒲桃俱。猩猩染花開五月。已覺秋實懸庭除。張園一酸齒欲裂。君家兩株蜜不如。竹馬兒童厭梨栗。綠囊聊爲剝紅珠。

雪行

五更臙背滿靴霜。殘雪離離草樹荒。身在景中無句寫。錯教人比孟襄陽。

韻眠畫馬

驪黃求馬世皆然。滅沒存亡自一天。當日鹽車人不識。只今空向畫中傳。

歲暮

蔌蔌霜力勁。沉沉山氣冥。北風半夜起。吹動一天星。

送張翼州致政還都

狀元行簡之父

一札恩書下紫宸。東門祖道畫圖新。路人也解賢疎傳。河內猶思借寇恂。父子文章千載事。田園

松菊自由身。玉京才過梨花節。靈沼行春莫厭頻。

用宋退傅張公閑遊靈沼探春回故事。

春雪

幾日韶華雪更侵。龍公試手本無心。寒留整整斜斜態。暖入融融洩洩陰。著柳直疑香絮重。擁培還似落花深。前頭桃李應無恙。剩破相如買賦金。

楸樹

道邊楸樹老龍形。社酒澆來漸有靈。只恐等閑風雨夜。怒隨雷電上青冥。

七夕

天河唯有鵲橋通。萬劫懽緣一瞬中。惆悵五更仙馭遠。寂寥雲幄掩秋風。

觀柘枝伎

腰鼓聲乾揭畫梁。綵雲擎出柘枝娘。簾間飛燕時窺影。鑑裏驚鸞易斷腸。輕細不妨重疊錦。迴旋還恐碎明璫。杖頭白雨催花急。拂散春風兩袖香。

敏之兄詩

敏之諱好古。性識穎悟。讀書能強記。務爲無所不關。年二十就科舉。時先東岩君已捐館。太夫人年在喜懼。望其立門戶爲甚切。及再上不中。意殊不自聊。又娶婦不諧。日致惡語。遂以狷介得疾。嘗作望月詩。有莫怪更深仍坐待。密雲或有暫開時之句。人或言詩境不開廣。非佳語也。嘆曰。吾得年不永。境趣能開廣否。未幾沒于北兵之禍。年三十一。

中秋無月

佳辰無物慰相思。先賞空吟昨夜詩。莫怪更深仍坐待。密雲或有暫開時。

讀裕之弟詩彙。有鶯聲柳巷深之句。漫題三詩其後

阿翁醉語戲兒癡。說着蟬詩也道奇。吳下阿蒙非向日。新篇爭遣九泉知。

鶯藏深樹只聞聲。不着詩家畫不成。慚愧阿兄無好語。五言城下把降旌。

傳家詩學在諸郎。剖腹留書死敢忘。先人臨終。有剖腹留書之語。背上錦囊三箭在。直須千古說穿楊。

題江村風雨圖

渡口舟橫水拍空。墨雲傾雨樹號風。江山不到紅塵眼。半幅煙綃想像中。

中州樂府

中州集

五三八

吳內翰彥高五首

蔡丞相伯堅二十二首

蔡太常正甫一首

高內翰士談三首

劉內翰鵬南一首

鄧千江一首

趙內翰獻之一十首

任南麓君謨一首

馮臨海士美一首

李承旨致美四首

劉龍山致君二十一首

劉記室無黨二首

党承旨世傑五首

王內翰子端二十二首

王隱君逸賓一首

密國公子瑜七首

禮部閑閑趙公六首

胥莘公和之一首

許司諫道真二首

馮內翰子駿一首

溪南詩老辛敬之二首

李右司欽叔三首

王右司仲澤一首

李扶風正臣一首

景伯仁三首

宗室文卿一首

高仲常二首

王予可三首

王監使正之一首

趙內翰子充二首

孟內翰友之一首

張太尉信甫一首

王玄佐一首

趙愚軒宜之三首

先東巖君二首

折治中元禮一首

吳內翰彥高

人月圖

南朝千古傷心事。猶唱後庭花。舊時王謝。飛向誰家。恍然一夢。仙肌勝雪。宮髻堆鴉。江州司馬。青衫淚濕。同是天涯。

彥高北遷後。爲故宮人賦此。時宇文叔通亦賦念奴嬌先成。而頗近鄙俚。及見彥高此作。茫然自失。是後人有求作樂府者。叔通即批云。吳郎近以樂府名天下。可往求之。

訴衷情

夜寒茅店不成眠。殘月照吟鞭。黃花細雨時候。催上渡頭船。鷗似雪。水如天。憶當年。到家應是。重稚牽衣。笑我華顛。

春從天上來

海角飄零。嘆漢苑秦宮。墜露飛螢。夢裏天上。金屋銀屏。歌吹竟舉青冥。問當時遺譜。有絕藝、鼓瑟湘靈。促哀彈。似林鶯瀝瀝。山溜泠泠。梨園太平樂府。醉幾度春風。鬢變星星。舞破中原。塵飛滄海。風雪萬里龍庭。寫胡笳幽怨。人憔悴、不似丹青。酒微醒。對一窗涼月。燈火青檠。

好問曾見王防禦公玉說。彥高此詞。句句用琵琶故實。引據甚明。今忘之矣。

滿庭芳

離挽銀河。青冥都洗。故教獨步蒼蟾。露華仙掌。清淚向人霑。畫棟秋風嫋嫋。飄桂子時入疎簾。冰壺裏。雲衣霧鬢。掬水弄春纖。厭厭成勝賞。銀槃潑露。寶鑑披奩。待不放楸梧。影轉西簷。坐上淋漓醉墨。人人看、老子掀髯。明年會。清光未減。白髮也休添。

風流子

書劍憶游梁。當時事。底處不堪傷。蘭楫嫩漪。向吳南浦。杏花微雨。窺宋東牆。鳳城外。燕隨青步障。絲惹紫游韁。曲水古今。禁煙前後。暮雲樓閣。春草池塘。回首斷回腸。年芳但如霧。鏡髮成霜。獨有蟻尊陶寫。蝶夢悠颺。聽出塞琵琶。風沙浙瀝。寄書鴻鴈。煙月微茫。不似海門潮信。能到潯陽。

蔡丞相伯堅

大江東去二首

離騷痛飲。問人生、佳處能消何物。江左諸人成底事。空想岩岩青壁。五畝蒼煙。一丘寒玉。歲晚憂風雪。西州扶病。至今悲感前傑。我夢卜築蕭閑。覺來岩桂。十里幽香發。磈磊胸中冰與炭。一酌春風都滅。勝日神交。悠然得意。離恨無毫髮。古今同致。永和徒記年月。

倦游老眼。放開身、管領黃華三日。客子秋高茅舍外。滿眼秋風欲滴。澤國清霜。澄江爽氣。染出
千林赤。感時懷古。酒前一笑都釋。千古粟里高情。雄豪割據。戲馬空陳迹。醉裏誰能知許事。
俯仰人間今昔。三弄胡床。九層飛觀。喚取穿雲笛。涼蟾有意。爲人點破空碧。

水調歌頭

雲間貴公子。玉骨秀橫秋。十年流落冰雪。香齒紫貂裘。燈火春城咫尺。曉夢梅花消息。繭紙寫銀
鉤。老矣黃塵眼。如對白蘋洲。世間物。唯有酒。可忘憂。蕭閑一段歸計。佳處着君侯。翠竹江村
月上。但要綸巾鶴氅。來往亦風流。醉墨薔薇露。洒遍酒家樓。

月華清

樓倚明河。山蟠喬木。故國秋光如水。常記別時。月冷半山環珮。到而今、桂影尋人。端好在、竹西
歌吹。如醉。望白蘋風裏。關山無際。可惜瓊瑤千里。有年少玉人。吟嘯天外。脂粉清輝。冷射藕
花冰蕊。念老去、鏡裏流年。空解道、人生適意。誰會。更微雲疎雨。空庭鶴唳。

江神子慢

賦瑞香

紫雲點楓葉。岩樹小、婆娑歲寒節。占高潔。纖苞煖、釀出梅魂蘭魄。照濃碧。茗椀添春花氣重。芸
窗晚、濛濛浮霽月。小眠鼻觀先通。廬山夢舊清絕。蕭閑平生淡泊。獨芳溫一念。猶未衰歇。種

陳迹。而今老、但覓茶煙禪榻。寄閑寂。風外天花無夢也。鴛鴦債、從渠千萬劫。夜寒回、施幽香與春愁客。

聲聲慢

涼經寄內

青蕪平野。小雨千峯。還成暮陞寒色。裁剪芸窗。憶得伴人良夕。遙憐幾重眉黛。恨相逢、少於行役。梨花淚。正宮衣春瘦。曉紅無力。應怪浮雲夫婿。不解趁新醅。醉眠涼月。怨入關河。西去又傳音息。誰知倦游心事。向年來、苦思泉石。人未老。約閭峯、多占秀碧。

石州慢

高麗使還日作

雲海蓬萊。風霧鬢鬟。不假梳掠。仙衣捲盡雲霓。方見宮腰纖弱。心期得處。世間言語非真。海犀一點通寥廓。無物比情濃。覓無情相博。離索。曉來一枕。餘香酒病。賴花醫却。艷艷金尊。收拾新愁重酌。片帆雲影。載將無際關山。夢魂應被楊花覺。梅子雨絲絲。滿江干樓閣。

尉遲盃

紫雲暖。恨翠雛、珠樹雙栖晚。小花靜院相逢。的的風流心眼。紅潮照玉盃。午香重、草綠宮羅淡。喜銀屏。小語私分。麝月春心一點。華年共有好願。何時定、粧鬟暮雨零亂。夢似花飛。人歸月冷。一夜小山新怨。劉郎興、尋常不淺。況不似、桃花春溪遠。覺情隨、曉馬東風。病酒餘香相

半。

驀山溪

清明綠野。玉色明春酒。燕地雪如沙。爲喚起、斗南溫秀。鬢絲禪榻。夢覺古揚州。瑤臺路。返魂香。好在啼粧瘦。春前入眼。似是章臺柳。欲典鸛鷺裘。悞金車、香迎馬首。綠陰青子。後日便東風。秋千散。暮寒生。月到西廂後。

鷓鴣天二首

解語宮花出畫簷。酒尊風味爲花甜。誰憐夢好春如水。可奈香餘月入簾。春漫漫。酒厭厭。曲終新恨到眉尖。此生願化雙瓊柱。得近春風煖玉纖。

秀樾橫塘十里香。水花晚色靜年芳。煙脂雪瘦薰沉水。翡翠盤高走夜光。山黛遠。月波長。暮雲秋影蘸瀟湘。醉魂應逐凌波夢。分付西風此夜涼。

江城子

半年無夢到春溫。可憐人。幾黃昏。想見玉徽。風度更清新。翠射娉婷雲八尺。誰爲寫。五湖眞。好風歸路軟紅塵。煖冰魂。縷金裙。喚起一天。星月入金尊。留取木犀花上露。揮醉墨。洒行雲。公有詩。八尺五湖明秀峯。又云。十丈琅玕倒冰玉。明年爲寫五湖眞。正用此詞意。魏道明作注。

義有不通。故表出之。

蔡太常正甫

江城子

王溫季自北都歸。過予三河。坐中賦此。

鵲聲迎客到庭除。問誰歟。故人車。千里歸來。塵色半征裾。珍重主人留客意。奴白飯。馬青芻。東城入眼杏千株。雪模糊。俯平湖。與子花間。隨分倒金壺。歸報東垣詩社友。曾念我。醉狂無。

高內翰士談

玉樓春

爲伯求作。

少年人物江山秀。流落天涯今白首。形容憔悴不如初。文彩風流仍似舊。百花元是仙家酒。千歲靈根能益壽。都將萬事付天公。且伴老人開笑口。

木蘭花減字

西湖睡起。飛絮游絲春老矣。漲綠涵空。十頃玻璃四面風。時平事少。天與湖山供坐嘯。他日西州。却怕羊曇感舊游。

朝中措

瑯琊山色最清雄。心賞待衰翁。路轉峯回如畫。新亭半濕青紅。風流賓從。清閑歲月。且共從

容。莫笑尊前老大。猶堪管領春風。

劉內翰鵬南

鷓鴣天

雪照山城玉指寒。一聲羌管怨樓間。江南幾度梅花發。人在天涯鬢已斑。星點點。月團團。倒流河漢入盃盤。翰林風月三千首。寄與吳姬忍淚看。

鄧干江

臨洮人

望海潮

上關州守

雲雷天澍。金湯地險。名藩自古皋蘭。營屯繡錯。山形米聚。喉襟百二秦關。鏖戰血猶殷。見陣雲冷落。時有鷗盤。靜塞樓頭。曉月依舊玉弓彎。看看定遠西還。有元戎閫令。上將齋壇。區脫盡空。兜零夕舉。甘泉又報平安。吹笛虎牙閑。且宴陪珠履。歌按雲鬟。未拓輿靈。醉魂長繞賀蘭山。

趙內翰獻之

望海潮

代州南樓

雲朔南陲。全趙寶符。河山襟帶名藩。有朱樓繚緲。千雉回旋。雲度飛狐絕險。天圍紫塞高寒。弔興亡遺跡。咫尺西陵。煙樹蒼然。時移事改。極目春心。不堪獨倚危欄。惟是年年飛鴈。霜雪知

還。樓上四時長好。人生一世難閑。故人有酒。一尊高興。不減東山。

暮山溪

賦崇福荷花。崇福在太原晉溪。

雲房西下。天共滄波遠。走馬記狂游。正芙蓉、平鋪鏡面。浮空欄檻。招我倒芳尊。看花醉。把花歸。扶路清香滿。水楓舊曲。應逐歌塵散。時節又新涼。料開徧、橫湖清淺。冰姿好在。莫道總無情。殘月下。曉風前。有恨何人見。

好事近

密雪聽窗知。午醉晚來初覺。人與膽瓶梅蕊。共此時蕭索。倚窗閑看六花飛。風輕止還作。箇裏有詩誰會。滿疎籬寒雀。

浣溪沙二首

檯轉爐薰自煥香。錦衾收拾却遮藏。二年塵暗小鴛鴦。落木蕭蕭風似雨。疎櫺皎皎月如霜。此時此夜最淒涼。

火冷薰爐香漸消。更闌撥火更重燒。愁心心字兩俱焦。半世清狂無限事。一窗風月可憐宵。燈殘花落夢無聊。

望海潮

敬高麗作。

雲垂餘髮。霞拖廣袂。人間自有飛瓊。三館俊游。百銜高選。翩翩老阮才名。銀漢會雙星。尙相看脈脈。以隔盈盈。醉玉添春。夢雲同夜惜卿卿。離觴草草同傾。記靈犀舊曲。曉枕餘醒。海外九州。郵亭一別。此生未卜他生。江上數峯青。恨斷雲殘雨。不見高城。二月遼陽。芳草千里路傍情。

卜算子 譜太白詩語。

明月在青天。借問今時幾。但見宵從海上來。不覺雲間墜。流水古今人。共看皆如此。唯願當歌對酒時。長照金尊裏。

鷓鴣天二首

金絡閑穿御路楊。青旗遙認醉中鄉。可人自有迎門笑。下馬何妨索酒嘗。春正好。日初長。一尊容我駐風光。歸來想像行雲處。薄雨霏霏洒面涼。

千頃平波溢岸清。草香沙煖水雲晴。輕衫短帽垂楊裏。楚潤相看別有情。揮彩筆。倒銀鉶。花枝照眼句還成。老來漸減金釵興。回施春光與後生。集句。

鳳樓梧

霜樹重重青嶂小。高棟飛雲。正在霜林杪。九日黃花才過了。一尊聊慰秋容老。翠色有無眉淡掃。身在西山。却愛東山好。流水極天橫晚照。酒闌望斷西河道。

任南麓君謨

永遇樂

月已中秋。菊還重九。夜久涼重。滿地清霜。半天白曉。孤唱聞耕壠。蕭蕭窗几。依然琴硯。但覺鼠窺風動。悔生平、趨前猛甚。晚退却成無勇。興衰更換。妍媸清混。造物大相愚弄。三疊羞人。五交賈鬻。侯伯寧無種。而今此念。消除都盡。唯有故山歸夢。吾廬更、雙溪清遠。萬峯翠擁。

馮臨海士美

江城子

胭脂坡上月如鉤。問青樓。覓溫柔。庭院深沉。窗戶掩清秋。月下香雲嬌墮砌。花氣重。酒光浮。清歌皓齒豔明眸。錦纏頭。若爲酬。門外三更。燈影立驂驄。結習未忘吾老矣。煩惱夢。赴東流。

李承旨致美

婆羅門引

保德西樓作

汗融畏日。豈知高處有風清。倚欄襟袖涼生。坐看崩雲脫壤。不礙亂峯青。待目窮千里。却怕傷情。河分古城。聽裂岸、怒濤驚。好是烽沉幽障。鼓臥邊亭。西樓老子。更無用、胸中十萬兵。酒到處、莫放盃停。

虞美人

佳人酒暈紅生頰。灩灩霞千疊。雨餘紅淚濕黃昏。誤認當年人面倚朱門。飄零又送青春暮。悵望劉郎去。教人不恨五更風。只恨馬蹄無處避殘紅。

鷓鴣天

萋萋蕤蕤雨後村。芳塵不到五侯門。曾隨曉淚撩詩思。又向春風入燒痕。春去後。憶王孫。啼紅南浦記芳溫。夕陽樓外連天遠。乞與騷人怨楚魂。

回文菩薩蠻

斷腸人去春將半。歸客倦花飛。小窗寒夢曉。誰與畫愁眉。

劉龍山致君

鷓鴣天四首

滿樹西風鎖建章。官黃未裹貢前霜。誰能載酒陪花使。終日尋香過苑牆。修月客。弄雲娘。三吳清興入淋浪。草堂人病風流減。自洗銅餠養蜜嘗。騎鶴峯前第一人。不應着意怨王孫。當時豔態題詩處。好在香痕與淚痕。調鴈柱。引蛾顰。綠窗絃牽苦能纂。砌臺歌舞陽春後。明月朱扉幾斷魂。

樓宇沉沉翠幾重。輾轡亭下落梧桐。川光帶晚虹垂雨。樹影涵秋鵲喚風。人不見。思何窮。斷腸。今古夕陽中。碧雲猶作山頭恨。一片西飛一片東。壁月池南翦木栖。六朝宮袖窄中宜。新聲蹙巧蛾顰黛。纖指移簫鴈着絲。朱戶小。畫簾低。細香輕夢隔浩溪。西風只道悲秋瘦。却是西風未得知。

南歌子

榴破猩肌血。萱開鳳尾黃。舊閑風簾雪肌涼。一枕濃香魂夢。到巫陽。雲紵描瑤草。蓮腮洗玉漿。碧梧深院小藤床。此意一江春水。正難量。

攤破浣溪沙

蠶欲眠時日已曛。柔桑葉大綠團雲。羅羅猶小。陌上看行人。翠實低條梅弄色。輕花吹墮麥初勻。鳴鳩聲裏。過盡太平村。

浣溪沙四首

貼體宮羅試袂衣。冰藍嬌淺染東池。春風一把瘦腰支。戲縷寶鈿呈翡翠。笑拈金剪刀下醺醺。最宜京兆畫新眉。

萬疊春山入寸心。章臺西去柳陰陰。藍橋特爲好花尋。別後魚封煙漲闊。夢迴鸞翼海雲深。情

知頓着有如今。

繡館人人倦踏青。粉垣深處簫錢聲。賣花門外綠陰輕。
簾幕風柔飛燕燕。池塘花暖語鶯鶯。有誰知道一春情。

摩腹椎腰春事非。樂天猶恨小樊歸。多生餘念向來癡。
往事半隨殘夢轉。飛詞不盡短封題。竹奴應笑減腰圍。

謁金門

簾半窄。四座綠圍紅簇。歌盡玉臺連夜燭。懽緣仍恨促。
休唱蓮舟新曲。煙水畫船搖綠。腸斷鴛鴦三十六。紫蒲相對浴。

劉記室無黨

烏夜啼二首

菱鑑玉篦秋月。蕙爐銀葉朝雲。宿醒人困屏山夢。煙樹小江村。
翠甲未消蘭恨。粉香不斷梅魂。離愁分付殘春雨。花外泣黃昏。

離恨遠縈楊柳。夢魂長遶梨花。青衫記得章臺月。歸路玉鞭斜。
翠鏡啼痕印袖。紅檣醉墨籠紗。相逢不盡平生事。春思入琵琶。

党承旨世傑

青玉案

紅紗綠蕚春風餅。趁梅驛。來雲嶺。紫桂岩空瓊簾冷。佳人却恨。等閑分破。縹緲雙鸞影。一甌月露心魂醒。更送清歌助清興。痛飲休辭今夕永。與君洗盡。滿襟煩暑。別作高寒境。

感皇恩

賦壘
羅花。

碧玉撚柔條。藍袍裁葉。明豔黃深軟金疊。道裝仙子。謫墮蕊珠仙闕。爲春閑管領、花時節。漢額粧穠。楚腰舞怯。襞積裙餘舊宮褶。東君着意。留伴小庭風月。任教鷓鴣喚、羣芳歇。

鷓鴣天

雲步凌波小鳳鉤。年年星漢踏春秋。只緣巧極稀相見。底用人間乞巧樓。天外事。兩悠悠。不應也作可憐愁。閒簾放入窺窗月。且盡新涼睡美休。

感皇恩

一葉下梧桐。新涼風露。喜鵲橋成渺雲步。舊家機杼。巧織紫綃如霧。新愁還織就、無重數。天上何年。人間朝暮。回首星津又空渡。盈盈別淚。散作半空疎雨。離魂都付與、秋將去。

月上海堂

用前人韻。

傲霜枝。鼻團珠。蓄冷香霏。煙雨晚秋意。蕭散繞東籬。尚彷彿、見山清氣。西風外。夢到斜川栗里。斷霞魚尾明秋水。帶三兩、飛鴻點煙際。疎林颯秋聲。似知人、倦游無味。家何處。落日西山紫翠。

王內翰子端

大江東去

癸巳暮冬小
雪家集作

山堂晚色。滿疎籬、寒雀煙橫高樹。小雪輕盈如解舞。故故穿簾入戶。掃地燒香。團欒一笑。不道因風絮。冰澌生硯。問誰先得佳句。有夢不到長安。此心安穩。只有歸耕去。試問雪溪無恙否。十里淇園佳處。脩竹林邊。寒梅樹底。准擬全家住。紫門新月。小橋誰掃歸路。

謁金門

雙喜鵲。幾報歸期渾錯。儘做舊愁都忘却。新愁何處着。瘦雪一痕牆角。青子已粧殘萼。不道枝頭無可落。東風猶作惡。

鳳樓梧

衰柳疎疎苔滿地。十二欄干。故國三千里。南去北來人老矣。短亭依舊殘陽裏。紫蟹黃柑真解事。似倩西風。勸我歸歟未。王粲登臨寥落際。鴈飛不斷天連水。

菩薩蠻回文三首

斷腸人恨餘香換。塵暗鎖窗春。小花簷月曉。屏掩半山青。
客愁楓葉秋江隔。行遠望高城。故人新恨苦。斜日晚啼鴉。
白雲孤映遙山碧。樓倚一天秋。斷腸隨鴈斷。來鴈與書回。

清平樂

賦杏花

今年春早。到處花開了。只有此枝春恰到。月底輕顰淺笑。
風流全似梅花。承當疎影橫斜。夢想雙溪南北。竹籬茅舍人家。

烏夜啼

淡煙疎雨新秋。不禁愁。記得青帘江上。酒家樓。
人不住。花無語。水空流。只有一雙橋燕。肯相留。

訴衷情

夜涼清露滴梧桐。庭樹又西風。薰籠舊香猶在。曉帳煖芙蓉。
雲淡薄。月朦朧。小簾櫳。江湖殘夢。半在南樓。畫角聲中。

清平樂應制。

瓊枝瑤月。簾捲黃金闕。宮鬢蛾兒雙翠葉。點綴離南鬪雪。
東風扇影低還。紅雲不隔天顏。夜夜

華燈萬樹。年年碧海三山。

水調歌頭

秋風禿林葉。却與鬢生華。十年長短亭裏。落日冷邊笳。飛鴈白雲千里。況是登山臨水。無賴客思家。獨鶴歸何晚。已後滿林鴉。望蓬山。雲海闊。浩無涯。安期王鳥何處。袖有棗如瓜。一笑那知許事。且看尊前故態。耳熱眼生花。肝肺出芒角。漱墨作枯槎。

謁金門

賦玉簪

秋蕭索。燈火新涼簾幕。翠被不禁臨曉薄。南樓聞畫角。想見玉壺冰萼。一夜西風開却。夢覺烏啼殘月落。幽香無處着。

王隱君逸賓

浣溪沙

夢中作

林樾人家急暮砧。夕陽人影入江深。倚欄疎快北風襟。雨自北山明處黑。雲從白鳥去邊陰。幾多秋思亂鄉心。

密國公子瑜

朝中措

襄陽古道灞陵橋。詩興與秋高。千古風流人物。一時多少雄豪。霜清玉塞。雲飛隴首。楓落江皋。夢到鳳凰臺上。山圍故國週遭。

春草碧

幾番風雨西城陌。不見海棠紅。梨花白。底事勝賞忽忽。政自天付酒腸窄。更笑老東君。人間客。賴有玉管新翻。羅襟醉墨。望中倚欄人。如曾識。舊夢回首何堪。故苑春光又陳迹。落盡後庭花。春草碧。

青玉案

凍雲封却駝岡路。有誰訪、溪梅去。夢裏疎香風似度。覺來唯見。一窗涼月。瘦影無尋處。明朝畫筆江天暮。定向漁蓑得奇句。試問簾前深幾許。兒童笑道。黃昏時候。猶是簾纖雨。

秦樓月

寒仍暑。春來秋去無今古。無今古。梁臺風月。汴堤煙雨。水涵天影秋如許。夕陽低處征帆舉。征帆舉。一行驚鴈。數聲柔櫓。

沁園春

壯歲耽書。黃卷青燈。留連寸陰。到中年贏得。清貧更甚。蒼顏明鏡。白髮輕簪。衲被蒙頭。草鞋着

脚。風雨瀟瀟秋意深。淒涼否。瓶中匱粟。指下忘琴。一篇梁父高吟。看谷變陵遷古又今。便離騷經了。靈光賦就。行歌白雪。愈少知音。試問先生。如何即是。布袖長垂不上襟。掀髯笑。一盃有味。萬事無心。

西江月

一百八般佛事。二十四考中書。山林朝市等區區。着甚由來自苦。過寺談些般若。逢花倒箇葫蘆。少時伶俐老來愚。萬事安於所遇。

臨江仙

倦客更遭塵事冗。故尋閑地婆娑。一尊芳酒一聲歌。盧郎心未老。潘令鬢先皤。醉向繁臺臺上問。滿川細柳新荷。薰風樓閣夕陽多。倚欄凝思久。漁笛起煙波。

禮部閑閑趙公

水調歌頭

四明有狂客。呼我謫仙人。俗緣千劫不盡。回首落紅塵。我欲騎鯨歸去。只恐神仙官府。嫌我醉時真。笑拍羣仙手。幾度夢中身。倚長松。聊拂石。坐看雲。忽然黑霓落手。醉舞紫毫春。寄語滄浪流水。曾識閑閑居士。好爲濯冠巾。却返天台去。華髮散麒麟。

昔擬栩仙人王雲鶴贈予詩云。寄與閑閑傲浪仙。枉隨詩酒墮凡緣。黃塵遮斷來時路。不到蓬山五百年。其後玉龜山人云。子前身亦城子也。予因以詩記之云。玉龜山下古仙真。許我天台一化身。擬折玉蓮騎白鶴。他年滄海看揚塵。吾友趙禮部庭玉說。丹陽子謂予再世蘇子美也。亦城子則吾豈敢。若子美則庶幾焉。尙婉辭翰微不及耳。因作此以寄意焉。

青杏兒

風雨替花愁。風雨罷。花也應休。勸君莫惜花前醉。今年花謝。明年花謝。白了人頭。乘興兩三甌。揀溪山。好處追遊。但教有酒身無事。有花也好。無花也好。選甚春秋。

梅花引

過天門關作

山如峽。天如席。石頭樹老冰崖坼。雪霏霏。水洄洄。先生此道。胡爲乎來哉。石頭馬滑馬蹄蹶。昂頭貪看山奇絕。短童隨。皺雙眉。休說清寒。形容想更飢。杖頭倒挂一壺酒。爲問人家何處有。將冰髯。煖朝寒。何人畫我。霜天曉過關。

大江東去

用東坡先生韻

秋光一片。問蒼蒼。桂影其中何物。一葉扁舟波萬頃。四顧粘天無壁。叩枻長歌。嫦娥欲下。萬里揮冰雪。京塵千丈。可能容此人傑。回首赤壁磯邊。騎鯨人去。幾度山花發。澹澹長空今古夢。

只有歸鴻明滅。我欲從公。乘風歸去。散此麒麟髮。三山安在。玉簫吹斷明月。

缺月挂疎桐

擬東坡作。

烏鵲不多驚。貼貼風枝靜。珠貝橫空冷不收。半濕秋河影。缺月墮幽窗。推枕驚深省。落葉蕭蕭聽雨聲。簾外霜華冷。

秦樓月

簫聲苦。簫聲吹斷夷山雨。夷山雨。人空不見。吹臺歌舞。危亭目極傷平楚。斷霞落日懷千古。懷千古。一盃還酌。信陵墳土。

胥莘公和之

阮郎歸

寄李都運有之。

人情冷暖共高低。疎慵非所宜。老夫碌碌本無機。閑教造物疑。彫木槁。鬢絲垂。山林先有期。故人只道挂冠遲。此心應不知。

許司諫道真

行香子

秋入鳴皋。爽氣飄蕭。挂衣冠、初脫塵勞。窗間岩袖。看盡昏朝。夜山低。晴山近。曉山高。細數

閑來。幾處村醪。醉模糊、信手揮毫。等閑陶寫。問甚風騷。樂因循。能潦倒。也消搖。

眼兒媚

濁醪筍得玉爲漿。風韻帶橙香。持盃笑道。鵝黃似酒。酒似鵝黃。世緣老矣不思量。沉醉又何妨。臨風對月。山歌野調。儘我疎狂。

馮內翰子駿

玉樓春

宴河中瑞雲亭

長原迤邐孤塵臥。野色微茫河界破。草承行屨綠雲深。花觸飛丸紅雨妥。高亭初試煎茶火。醉玉漸離春滿座。行盃莫厭轉籌頻。佳節等閑飛鳥過。

溪南詩老辛敬之

臨江仙

河山亭留別
欽叔。格之。

誰識虎頭峯下客。少年有意功名。清朝無路到公卿。蕭蕭華屋。白髮老諸生。邂逅對床逢二妙。揮毫落紙堪驚。他年聯袂上蓬瀛。春風蓮燭。莫忘此時情。

李右司欽叔

春草碧

紫簫吹破黃州月。蔌蔌小梅花。飄香雪。寂寞花底風鬟。顏色如花命如葉。千里浣兵塵。凌波襪。
心事鑑影鸞孤。箏絃鴈絕。舊時雪堂人。今華髮。斷腸金縷新聲。杯深不覺琉璃滑。醉夢遶南雲。
花上蝶。

江梅引

爲飛伯賦青梅

漢宮嬌額倦塗黃。試新粧。立昭陽。萼綠仙姿高髻碧羅裳。翠袖卷紗閑倚竹。暝雲合。瓊枝薦暮涼。
璧月浮香搖玉浪。拂春簾。瑩綺窗。冰肌夜冷。滑無粟。影轉斜廊。冉冉孤鴻煙水渺渺三湘。
青鳥不來天也老。斷魂些。清霜靜楚江。

浣溪沙

何中環勝樓感懷

垂柳陰陰水拍堤。欲窮遠目望還迷。平蕪盡處暮天低。
萬里中原猶北顧。十年長路却西歸。倚樓懷抱有誰知。

王右司仲澤

水龍吟

從商帥國器獵同裕之賦

短衣匹馬清秋。慣曾射虎南山下。西風白水。石鯨鱗甲。山川圖畫。千古神州。一時勝事。賓僚儒雅。快長堤萬弩。平岡千騎。波濤卷。魚龍夜。落日孤城鼓角。笑歸來。長圍初罷。風雲慘澹。貌

猶得意。旌旗閑暇。萬里天河。更須一洗。中原兵馬。看鞬囊鳴咽。咸陽道左。拜西還駕。

李扶風正臣

滿江紅 示婦

紙帳春溫。春睡穩。窗槐搖綠。吾老矣。不堪重着。翠園紅簇。千古清風荆布在。一家樂事糟糠足。笑杜陵。憔悴漫多情。須燕玉。求鳳意。傳新曲。驂鸞夢。從渠續。問臨邛何賤。會稽何辱。跌畝豈無天下士。斧斤不到山中木。但莫教。風雨兩雛鳩。危枝宿。

景伯仁

鳳樓梧

倦客情。淙淙似縷。小院無人。臥聽秋蟲語。歸意已攙新鴈去。晚涼更作瀟瀟雨。架上秋衣蠅點素。冷菊戎裝。尙被春花妬。別有溪山容杖屨。等閑不許知人處。

天香 二首

市遠人稀。林深犬吠。山連水村幽寂。田里安閑。東隣西舍。准擬醉時歡適。社祈零禱。有簫鼓。喧天吹擊。宿雨新晴。壠頭閑看。露桑風麥。無端晴。亭暮驛。恨連年、此時行役。何似臨流。蕭散。緩衣輕幘。炊黍烹雞自勞。有脆絲。甘紅薦芳液。夢裏春泉。糟床夜滴。

百歲中分。流年過半。塵勞繫人無盡。桑柘周圍。萱茅低架。且喜水親山近。倦飛高鳥。算也有、閑枝棲穩。紙帳紉衾。日高睡起。懶梳蓬鬢。閑塔土花碧潤。緩芒屨、恐傷蝸蚓。倒掩衡門空解。草玄誰信。俗駕輕雲易散。賴獨有蓬峯破孤悶。世事悠悠。從教莫問。

宗室文卿

從郁字文卿。本名瑀。字子圭。衛紹王改賜焉。父金紫公。有中庸集。文卿以父任充符寶。章宗試一日百篇。賜第。朝廷經略西蜀。宗室綱遣太尉中孚之子公輔。說吳玠稱藩。文卿私謂梁經父言。誘人以叛。豈有天下者所宜爲。其後蜀事竟不成。識者稱焉。仕至安肅刺史。

西江月

題鄧鄂王化呂仙翁祠堂

壁斷何人舊字。爐寒隔歲殘香。洞天人去海茫茫。玩世僊翁已往。西日長安道遠。春風趙國臺荒。行人誰不悟黃梁。依舊紅塵陌上。

高仲常

梅花引

蒿火目。蕤羹腹。書生寧有封侯骨。長須奴。下澤車。艱關險阻。誰教涉畏途。半生落漠長安道。一事無成鬢鬢老。南轅胡。北轅吳。功名富貴。情知不可圖。槐安夢。鼓笛弄。馳驟百年塵一閃。陶

淵明。張季鷹。一盃濁酒。焉知身後名。有溪可漁。林可繳。須信在家貧也樂。熊門春。沮江雲。幾時作箇。山間林下人。

貧也樂一

將進酒二

城下路。淒風露。今人犁田昔人墓。岸頭沙。帶蒹葭。漫漫昔時。流水今人家。黃埃赤日長安道。倦客無漿馬無草。開函關。閉函關。千古如何。不見一人閑。六國擾。三秦掃。初謂商山遺四老。馳單車。致緘書。裂荷焚芟。接武曳長裾。高陽真得盃中趣。身到醉鄉安穩處。生忘形。死忘名。二豪侍側。劉伶初未醒。

王子可

小重山

予可自解。細霜。脂粉也。

寶樹簾鉤捲月窗。樓衣金樣襪。汎餘香。卿卿榮耀寵恩光。三竿日。顰翠楚山長。螺髻憂浮觴。鳳奩塵瑩恨。淅裊霜。賣珠樓外串離腸。春殘夢。今夜擬高唐。

生查子

夜色明河靜。好風來千里。水殿謫仙人。皓齒清歌起。前聲金埤中。後聲銀河底。一夜嶺頭雲。遶遍樓前水。

長相思

風煖時。雨晴時。熏褶羅衣人未歸。螭蛾愁欲飛。
枕瓊霞。瑣窗紗。簾月樓空燕子家。春風掃落花。

王監使正之

梅花引

山之麓。河之曲。一灣秀色盤虛谷。水溶溶。雨濛濛。有人行李。蕭蕭落葉中。人家籬落炊煙濕。天外雲峯迷淡碧。野雲昏。失前村。溪橋路滑。平沙沒舊痕。丹楓下。瀟湘夜。橫披省見王維畫。畫無聲。慘經營。何如幻我。清寒此道行。馬頭風急催行色。疑是山靈嫌俗客。釣魚磯。綠蓑衣。有人坐弄。滄浪猶未歸。

趙內翰子充

南歌子

澗草萋萋綠。林鶯恰恰啼。汀沙過雨便無泥。喚得芒鞋隨意。到前溪。
浦溆渾堪畫。雲烟總是題。江湖老伴一蓑衣。真箇斜風細雨。不須歸。

虞美人

同孟利器
尋春

春來日日風成陣。桃李飄零盡。樹頭樹底覓殘紅。只有郭西梨雪照晴空。酬春須得如川酒。酒債尋常有。葛巾欹側倩人扶。大似浣花溪上醉騎驢。

孟內翰友之

菩薩蠻回文

睡驚秋近鳴蟲砌。蒼鬢摻勻霜。影孤燈翳冷。長歎浩歌狂。

張太尉信甫

信甫名中孚。世爲安定望族。初以父任知寧環鎮戎三州。天會中。宋亂。渭帥劉錡遁走。諸將推信甫攝帥事。時左副元帥軍已次官池。信甫乃詣行營。約衣冠禮樂無變宋舊。則當送款。從之。即日事定。授鎮洮軍節度使。兼經原經略安撫使。改陝西諸路節節制使。及地入於宋。信甫留臨安。皇統中。理索北歸。就拜行臺兵部尙書。天德二年。參知政事。貞元初。新都城。遷尙書左丞。以病乞身。出爲濟南尹。改南京留守。未幾薨。弟忠彥。字才甫。歸國授招撫使。世宗朝。終於吏部尙書。信甫昆弟天性友愛。起行陣間。而文雅俱有可稱。信甫自號長谷老人。才甫季弟某義谷。有三谷集傳於家。

山河百二。自古關中好。壯歲喜功名。擁征鞍、彫裘繡帽。時移事改。萍梗落江吳。聽楚語。厭蠻歌。往事知多少。蒼顏白髮。故里欣重到。老馬省曾行。也頻嘶、冷烟殘照。終南山色。不改舊時青。長安道。一回來。須信一回老。

王玄佐

賢佐一字玄佐。名澹。咸平人。爲人沉默寡欲。邃於易學。若有神授之。又通星曆緯識之學。明昌初。德行才能。召至京師。命以官。不拜。朝廷重其人。授信州教授。未幾。自免去。再授博州教授。郡守以下皆師尊之。一日。守酒客。適中使至。中使漠然少年。重賢佐名。強之酒。守從旁救之曰。王先生不如輩酒。勿苦之也。中使乃止。是夕。賢佐棄官遁歸鄉里。宣宗即位。聞其名。議驛召之。以道梗不果。車駕南渡。人有自咸平來者。說賢佐年六十餘。起居如少壯人。宣宗重其人。常以字呼。遣王曼卿授遼東宣撫使。不拜。又詔宰相以書招之云。阻奉仙標。渴思道論。敬佇下風。瞻系何極。先生嘉遯林藪。脫屣浮榮。究大易之盈虛。洞玄象之終始。道尊德重。名動天朝。推其緒餘。足利天下。然君子之道。出處語默。何常之有。或拂衣而長往。或濡跡以揅時。故當其無事。則采薇山阿。餌木岩岫。固其宜矣。及多難之際。社稷傾危而不顧。蒼生倒懸而不解。其自爲謀則善矣。仁人之心。固如是乎。某等猥以不才。謬膺重任。四郊多壘。各將誰執。徒積慚汗。坐視何益。日夜

以思。庶幾得明利害而外爵祿者。在天子左右。同濟太平。今聖上明發不寐。軫念元元。屈已下賢。尊師重道。歎先生之絕識。仰先生之高風。雖黃帝尊廣成之道。唐虞重穎陽之節。不是過也。先生懷寶遺世。如某輩之不肖。固在所棄。獨不念累世祖宗之基業。億兆生靈之性命。忍忘之耶。昔商岩四老。定儲嗣而整來。東山謝安。爲蒼生而一起。今安危大計。非特定儲之勢也。強敵侵逼。又非東晉之時也。生民塗炭。亦已極矣。豈先生建策於明昌之初。獨無一言於貞祐之日乎。想先生幡然而改。惠然而來。審定大計。轉危爲安。然後披蕙幌。拂雲扃。未爲晚耳。敬聽車音。某雖不肖。請擁篲而先之。書達。竟不至。遼東破時。年九十餘矣。

洞仙歌

賦襟賞屏
山所錄

圓剛定質。混物非凡類。仁處其中靜忘意。任蝶蜂狂遠。燕雀喧爭。心君正。惟取清白自治。黃衣從淡泊。此箇家風異。偶合陰陽棄神智。怕旁人冷眼。嫌太孤高。樽俎地。聊許松梧同器。待他日。山林不相容。請援手仙葩。要充仙贊。沮物作渾物。

趙愚軒宜之

行香子三首

鏡裏流年。綠變華顛。謝西山、青眼依然。人生安用。利鎖名纏。似燕營巢。蜂課蜜、蟻爭羶。詞

苑羣仙，場屋諸賢，看文章、大筆如椽。閑人書冊，且枕頭眠。有洗心經、傳燈錄、坐忘篇。

潦倒無聞。坐慣家貧。眼昏花、心口猶存。人皆笑我。我儘教人。拚醉吟風。閑釣月。困眠雲。遯

遁交親。語款情真。且相從、莫浪辛勤。西山歸隱。不用移文。看菊成叢。松結子。竹生孫。

山擁垣牆。水滿溪塘。幾人家、籬落斜陽。又還夏也。一霎人忙。正稻分畦。蠶卸簇。麥登場。老

子徜徉。閑日偏長。鬢鬆鬆、只管尋涼。綠陰何處。旋旋移床。有道邊槐。門外柳。舍南桑。

先東岩君

好事近

丞相韻首倡。及高子文屬和。附于此。

夢破打門聲。有客袖攜團月。喚起玉川高興。養松簷晴雪。蓬萊千古一清風。人境兩超絕。覺我

胸中黃卷。被春雲香徹。

天上賜金奩。不減壑源三月。午盃春風纖手。看一時如雪。幽人只慣茂林前。松風聽清絕。無奈

十年黃卷。向枯腸搜徹。

蔡丞相

誰打玉川門。白絹斜封團月。晴日小窗活火。響一壺春雪。可憐桑苧一生顛。文字更清絕。直擬

駕風歸去。把三山登徹。

高子文

折治中元禮

中州樂府

元禮字安上。世爲麟撫經略使。父定遠。僑居於忻。遂占籍焉。明昌五年。兩科擢第。學問該洽。爲文有法度。仕至延安治中。死于葭州之難。坊州有詩云。籬落層層景。軒窗面面山。至其處。知爲工也。

望海潮

從軍舟中作

地雄河岳。疆分韓晉。潼關高壓秦頭。山倚斷霞。江吞絕壁。野煙縈帶滄洲。虎旆擁貔貅。看陣雲截岸。霜氣橫秋。千雉嚴城。五更殘角月如鉤。西風曉入貂裘。恨儒冠誤我。却羨兜鍪。六郡少年。三明老將。賀蘭烽火新收。天外岳蓮樓。想斷雲橫曉。誰識歸舟。剩着黃金換酒。羯鼓醉涼州。

附錄

自題中州集後

鄴下曹劉氣儘豪。江東諸謝韻尤高。若從華實評詩品。未便吳儂得錦袍。

又

陶謝風流到百家。半山老眼淨無花。北人不拾江西唾。未要曾郎借齒牙。

又

萬古騷人嘔肺肝。乾坤清氣得來難。詩家亦有長沙帖。莫作宣和閣本看。

又

文章得失寸心知。千古朱絃屬子期。愛殺溪南辛老子。相從何止十年遲。

又

平世何曾有稗官。亂來史筆亦摧殘。百年遺藁天留在。抱向空山掩淚看。

附

錄

元好問

題中州詩集後

家鉉翁

世之治也。三光五岳之氣。鍾而爲一代人物。其生乎中原。奮乎齊魯汴洛之間者。固中州人物也。亦有生於四方。奮於遐外。而道學文章爲世所宗。功化德業被於海內。雖謂之中州人物可也。蓋天爲斯世而生斯人。氣化之全。光岳之英。實萃於是。一方豈得而私其有哉。迨夫宇縣中分。南北異壤。而論道統之所自來。必曰宗於某。言文脈之所從出。必曰派於某。又莫非盛時人物範模憲度之所流衍。故壤地有南北。而人物無南北。道統文脈無南北。雖在萬里外。皆中州也。況於在中州者乎。余嘗有見於此。自燕徙而河間。稍得與儒冠縉紳遊。暇日獲觀遺山元子所哀中州集者。百年而上。南北名人節士鉅儒達官所爲詩。與其平生出處。大致皆采錄不遺。而宋建炎以後。銜命見留與留而得歸者。其所爲詩。與其大節始終。亦復見記。凡十卷。總而名之曰中州集。盛矣哉。元子之爲此名也。廣矣哉。元子之用心也。夫生於中原。而視九州四海之人物。猶吾同國之人。生於數百年後。而視數百年前人物。猶吾生並世之人。片言一善。殘編佚詩。搜訪惟恐其不能盡。余於是知元子胸懷卓犖。過人遠甚。彼小智自私者。同室藩籬。一家爾汝。視元子之宏度偉識。溟滓下風矣。嗚呼。若元子者。可謂天下士矣。數百載以下。必有謂余言爲善者。

1. 和服大斗 第四十卷圖

(全二册)

統一書号：10018·138

定价：2.20元